

**SEVENTH LEGISLATIVE ASSEMBLY OF MIZORAM  
( SEVENTH SESSION )**

**LIST OF BUSINESS**

FOR NINTH SITTING ON FRIDAY, THE 16<sup>th</sup> OCTOBER, 2015  
( Time 10:30 A.M. to 1:00 P.M. and 2:00 P.M. to 4:00 P.M. )

**QUESTIONS**

1. **Questions** entered in separate list to be asked and oral answers given.

**PRIVATE MEMBERS' BUSINESS**

2. \* **Resolutions**

-----  
---  
\* Please see Bulletin Part-II No. 108, dated the 8<sup>th</sup> October, 2015 for relative precedence of Private Members' Resolutions to be moved.

NGURTHANZUALA  
Secretary

**SPEAKER** : Rethete ngaituah mi chu a eng a thawl e, Mangan ni chuan LALPAN ani chu a chhanhim ang. LALPAN ani chu humhimin a tinung ang a, Leiah hian malsawmin a awm ang.

(Sam 41:1-2)

Tunah zawhna 128-na kan la ang a, a zawttu hi pali lai an awm a, Pu K. Sangthuama, Dr. Ngurdingliana, Dr. K. Beichhua leh Er. Lalrinawma te an ni a. An zinga upa ber Pu K. Sangthuama kan ko ang a, a dang hi chu zawhbelhna lamah khan in lo tang mai dawn nia, khawngaihni. Tunah a neitu Pu K. Sangthuama zawt turin i lo sawm ang.

**Pu K. SANGTHUAMA** : Pu Speaker, ka lawm e. Dr. Ngurdingliana MLA zahawm tak, Dr. K. Beichhua MLA zahawm tak leh Er. Lalrinawma MLA zahawm tak, kan palia kan zawhna intawm Excise & Narcotics Department Minister zahawm tak chhan atan No. 128-na :

- a) Mizoramah zu lei theihna permit engzat nge pek chhuah a nih tawh?
- b) Mizoram pumpuiah zu zawrhna dawr engzat nge awm tawh?
- c) Mizoram pumpuiah nikhatah zu engzat man nge hralh chhuah a nih (average) in?
- d) Zu zawrhna khua leh veng min hralh thei em?
- e) Zu zawrh phalna pek hnuah sorkar-ah revenue engzat nge lut tawh? Dan bawhchhia mi engzat nge hrem ni tawh?
- f) MLPC hman atanga vawiin ni thleng hian sorkarin zu cheng engzat man nge a zawrh tawh?
- g) Zu man atang hian profit cheng engzat nge sorkarin a dawn tawh?
- h) Excise duty tax cheng engzat nge a dawn tawh?
- i) Tun dinhmunah MLPC Act hman a nih hnu hian ram pawn atangin zu engzat man nge lak luh a nih tawh?
- j) MLPC Act hman a nih hnu hian sorkar-in zu atangin chhiah engzat nge a hmuh tawh?
- k) Permit hmang dik lo an awm em?
- l) Awm ta se, mi engzat nge?

**SPEAKER** : Awle, a Department neitu Pu R. Lalzirliana, Minister zahawm tak chhang turin sawm ang.

**Pu R. LALZIRLIANA, MINISTER** : Pu Speaker, MLA zahawm tak Pu K. Sangthuama. Dr. Ngurdingliana, Dr. K. Beichhua leh Er. Lalrinawma te zawhna chhanna chu hei hi a ni e.

- a) Mizoramah zu lei theihna permit 56,631 pek chhuah a ni tawh.
- b) Tun dinhmunah hian Mizoram pumpuiah zu zawrhna dawr 22 a awm tawh.
- c) Nikhata zu hralh chhuah zat hriat ngaihna a awm lova, a chhan chu Corporation te leh mimal te sumdawna a ni a, an nitin hralh zat hi Department-ah an report lova, chuangin kan hre lo a ni.
- d) Zu zawrhna khua leh vengte chu:

**Aizawl District** : (1) Dawrpui (2) Zarkawt (3) Chawlhmun  
(4) Ramhlun Venglai (5) Khatla (6) 1<sup>st</sup> MAP, Armed Veng

**Lunglei District** : (1) Venglai (2) Bazar Veng (3) Ramthar Veng

**Serchhip District** : (1) Serchhip Bazar Veng (2) Serchhip Bazar Hnuai Veng (3) P&E  
Veng (4) New Serchhip (5) Thenzawl Bazar Veng

**Champhai District** : (1) Grape Grower Society, Champhai (2) A.K. Lalremsiam, Champhai (3) Vengsang, Champhai

**Kolasib District** : (1) Rengtekawn, Bairabi Road (END Complex)

**Total = 18**

- e) Zu zawrh phalna pek hnuah sorkar-ah revenue ₹ 24,82,83,107/- a lut tawh. Dan bawhchhia mi 1495 hrem an ni tawh.
- f) MLPC Act, 2014 hman atangin mimal leh Corporation ten zu an zuar a, sorkar erawh chuan a zuar lo.
- g) Zu man atang hian profit engzat mah sorkarin a dawng lova, amaherawhchu, zu atang hian Excise Duty ₹ 19,44,69,543.00 (i.e. 16.1.2015-31.8.2015) hmuh a ni tawh.
- h) MLPC Act, 2014 hman atanga Excise Duty hmuh tawh zat chu ₹ 19,44,69,543.00 (i.e. 16.1.2015 – 31.8.2015) hmuh a ni.
- i) Ram pawn atanga zu lakluh hi warehouse leh company te inkar thil (private business) a ni a, chuvangin zu an lakluh zat man hi kan hriatpui lo.
- j) Helai hi chu nichina Excise Duty kan tih nen khan a inang mai a. MLPC Act, 2014 hman a nih hnu hian sorkarin zu atangin chhiah ₹ 19,44,69,543.00 (i.e. 16.1.2015 – 31.8.2015) a hmu tawh.
- k) Awm e.
- l) Permit hmang dik lo man tawh zat chu mi 507 an ni.

**SPEAKER** : Zawhbelhna, Er. Lalrinawma.

**Er. LALRINAWMA** : Pu Speaker, ka lawm e. Kan Minister zahawm tak chhanna atanga ka zawhbelhna chu Zawhna : (i) ah khan a zat hriat a nih loh thu kha min hrilh a. Hei hi Way Bill emaw an bungraw lakluh hi chhinchhiah a ni lo em ni? Taxation kaltlangin emaw bungraw lo lut hi chhinchhiah a ni lo a nih chuan a mak dawn hle a. Chuvang chuan, ka zawhna chu Way Bill an hmang ve lo nge heng an bungraw lakluh hi engmah chhinchhiah a ni lovin heng agent-te hian an la lut tawp mai em ni, tih kha ka zawhna a ni e.

**SPEAKER** : Pu T. Sangkunga.

**Pu T. SANGKUNGA** : Pu Speaker, ka lawm e. He thil hi a pawimawh baw a, a zawttu kan MLA zahawm tak takte pawh kha an thahnem a chuvangin zawhbelhna ah siam nual ka duh a. Pakhatnaah chuan MLPC Act hnuai a zu zawrhna permit pek a nih hnu hian zu zawrh hrim hrim hi kan tum nge zu nghei thei si lo, zu tha hmu pha baw si loten tlawm zawka zu tha an

lo in ve theihna turin permit hi pek a ni tih ka'n zawt duh a. A dawtlehah chuan local zu tha lo tak tak zawrh hi MLPC Act hnuiaia zu zawrh a nih hnu hian a tlem sawt nge a la ngai reng tih ka zawt leh duh a. 3-na ah chuan MLPC Act a zu zawrh a nih hnu hian Rangvamual leh a chhehvela motor ding khup, driver rui tak tak, chak tak taka tlan thin kan tawh thin te kha a tlem sawt nge, a la ngai reng nge a tam zawk? tih ka zawt duh a.

4-na ah chuan local zu chhe tak tak kan in khan thalaite hian thih hma phah nge zu tha zawrh a nih hnu hian an thi har zawk tih ka zawt duh a. A dawlelah chuan kan MLA zahawm tak Pu Lalruatkima'n MLPC Act hnuiaia zu zawrh a nih hnu hian police 100 chuang lai mai zu leh a related case ah an thi e a'n tih kha MLPC Act hnuiaia zu zawrh hnu in thar ta te nge ni a, kum 10/20 kalta vela zu chhia lo in tawh avanga thi tih, kan Minister zahawm tak hi ka zawt duh a. Zu tha in thar thihpui nge, tunhma atanga lo in thin tawh te tih kha a zawhna awmzia chu a ni a.

Tin, hei hi hriatchian theih a nih loh chuan, khang thi te kha tunhma atanga lo in tawh nge in thar tih hriatchian a nih theihna tur hian a zirchiangtu committee hi din hial a tha lawm ni tih kha ka'n zawt leh duh. Tin, engtik atangin nge MLPC Act hmang hian zu zawrh tan a nih, a zawrh tan ni? Zu tha zawrh a nih chinah hian tax an hmuh zat an sawi tawh a. Tin, a hmaa, MLPC Act hnuiaia zu zawrh a nih hma a Dan lova zu tam tak zawrh atang khan tax kan la em? Lo la ta ila engzat nge kan hmuh tih ka zawt duh a.

A dawt leh ah chuan, Myanmar leh Assam ramria zu, a senchi quality tha si lo tam tak pho tuar, kan thalaiten an lei nasat em em, ramri pawh a kan in tirh ngam mang lohna kha hetia zu tha chi, permit nei a zawrh a nih hnu hian kan lei tlem sawt nge, a la ngai reng nge, a tam zawk tih ka zawt duh a. Tin, a dawt lehah chuan, nu leh pate'n kan fate zu nghei thei si lo hi local zu chhe tak tak in turin nge kan duh tlawm deuh taka zu quality tha in turin tih ka zawt duh a. A dawt leh ah chuan, nu thenkhat an pasalte zu nghei thei si lo, zu permit awm hmaa R.V vela tlaivar dawn dawn a zu zuk in thin nupui te nge thlamuang ang, tuna permit awm hnu zu tha chi tlawm zawka lei a, mahni in a an nupuite bula in keuh keuh hian an nupuite kha an thlamuang zawk ang em tih kha ka zawt duh a.

A dawt leh ah chuan, MLPC Act hnuiaia zu zawrh hi ti tawp thut ta ila mipui atang hian zuar leh teh u hei thalai te zu chhe in an thi mai dawn ti a demand hi a tam viauin kan ring em tih kha ka zawt leh duh a.

A hnuhnung ber atan chuan, MLPC Act hnuiaia zu zawrh hnu hian zannah hmeichhiate an ralmuang ta lo hle nge an dinhmun hi a la ngai reng tih kha a pawimawh em avangin ka'n zawt deuh duah duh a ni.

**SPEAKER** : Dr. K. Bechhua kha a phar hmasa a . Hei 2/3 a ni a Pu Ruatkima kha a zawttu zingah khan a tel ve tiraw? A tel loh chuan duhtawh tawh mai ang, a tam tawh e.

**Dr. K. BEICHHUA** : Pu Speaker, ka lawm e. 1-naah chuan, Permit pakhat lak man cheng engzat nge? 2-naah chuan, State hian zu hi distilled kan tum em? Distillery te neih tuma hmalaknan a awm em? 3-na ah chuan, bonded ware house nei tur hian tender float a ni em? mi engzatin nge chhang? Tute nge tunah hian bonded ware house hi run? 4-naah chuan, MLPC Act kan introduce hnu hian yeast alcohol kan tih ang chi hi sorkar hian a hmuchhuak em, kan nei em tih kha ka zawhna a ni e.

**SPEAKER** : Duhtawh mai ang, kha 2/3 in an zawt tawh a.

**Pu LALRUATKIMA** : Pu Speaker, khawngaihin, Excise zawhna hi ka nei teuh a, a chhuak hman dawn chuang lova, chuang chuan helai hi min rawn sawr khawm ve silova, helaia tel awm tak a ni a. Ka zawhna hi a har deuh nge, min lo hrethiam la ka'n zawt zar zar a nge. Kan Minister zahawm tak ka zawh duh chu, cost card hi engtik atanga hman tan nge a nih? VAT rate engzah percentage nge? Ad Volerum hi engzah percentage nge? Import permit fee zu case khat atangin engzah nge kan lak, chuta tang chuan percentage engzat nge kan hmuh tawh? Raiser supplier tute nge, engzah nge kan neih?tih te leh name of label chi hrang hrang engzat nge lakluh a nih ?tih te leh Name of mono carton? kha ka'n zawt tel a ni.

\*Speech not corrected

**SPEAKER** : Minister zahawm tak kha chhang turin sawm ila, zawh belhna kha hetah chuan a awm thei tawh lovang.

**Pu R. LALZIRLIANA, MINISTER** : Pu Speaker, zu in ngai lo emaw kan tih Pu Ruatkima te, Pu Sangkunga te ho an tui riau mai a, zawhna an ngah riau mai kan hre seng a nge maw. Zawhna neitu Er. Lalrinawma zawhna kha, way bill lampang chu keimahni chan a ni hran lova, Taxation Deptt. lam chan a ni a, kha kha chu kan hre mai lova, Taxation Deptt. lamah a latute khan an la turah ka ngai a.

Tin, Pu Sangkunga zawhna kha a tam khawp mai a. Zu chhe in thin tunhnaia police thi mi 100 dawn lai te kha zu chhe in thin nge tuna MLPC Act hman hnu zu in avanga thi tih kha doctor ka ni tlat lova ka hre lova. Tuna zu kan zawrh hnu hian zu tak hi chu tumahin an la thihpui awm lo in ka hria a, thihpuina hman em pawh a la ni lova, a la rei lo em mai a, chu chu rinthu mai a chhan ve mai kha a tawkin ka hria a.

Hemi zu kan zawrh hnu hian local zu hi chu a tlem sawt a amaherawhchu, a la awm tho mai a, RV kan tih lamah te pawh a la awm tho va. Chutiang a nih lai chuan niminah khan

kohhran Upa Pu K. Rinthanga khan khulai RV vel a kal ngun a, a thianghlim tawh zia kha a rawn sawi a, kha kha ka tawmpui ve mai a. Thalaite hi zu chhia in turin nge kan duh zu tha in turin tih kha chu a nghei thei lo te tan chauh kan ti a, tunah hian zu in duh si nghei thei chuang si lo, chungten a zu tha zawk an lo in na atan sorkar in permit te a pe ta niin a lang a.

Tin, zu nghei theilo, hemi statistics fel tak neih hi a pawimawh khawp mai a. Zu zawrh tak avanga zu in an tam leh tam loh te pawh hi chiang taka statistics neih hi a tha khawp mai a. Hengte hi kan NGO lam nge, kan kohhran lam nge ni, a tuipui zual deuh hi chuan nei se a tha in ka hria.

Tin, MLPC Act hman hma khan zu atang hian Excise Duty lak ve tho a ni a, a chhan chu CRP-te, Assam Rifles-te leh Pioneer tih velte khan an lak luh loh theih loh avangin, Excise Duty tlem tlem lak ve tho a ni.

Tin, ram pawnah, Tiau ah te, Bagha lamah te, state pawnah tunhma kha chuan lei an tam thin khawp mai an ti a. Tunah erawh chuan Tiau lama kan unaute ho pawh khian zu hralhna an hre mang ta lova, helam ngenchhana zu zuar an ni a. Tunah chuan zu hralhna an hre tawh lo, a buaithlak khawp mai an tih hi chu Champhai vel thianten an sawi kha ka hria a ni.

Tichuan, MLPC Act tihtawp ni thut ta se, zu tha in kan duh ti tu hian pawh an ti angem? tih ang chi deuh kha awmin ka hria a. Tuna permit 50,000 chuang hi chuan tihtawp thut chu an duh lo ngei anga. Tin, a permit nei lo pawh mimal tha ti ve reng si, committee leh engemaw ah chuan tha ti lova lo ngawi reng, lo sawi ve lem lo, a sawite aw ring tak hi a tam mai a, chungho chuan a lawmawm chu an ti ngawt thung ang chu. Tin, mi in an pasalte RV a zu in nge tha a in rin tunah hian, mahni in a zu in mai? Hei hi chu mi nupa inkar thil a ni a, ka chhang thiam vak lo. A kim tawh mai em? (Pu T. SANGKUNGA : Hmeichhiate kha, Pu Speaker, hetia MLPC Act hnuaia zu zawrh hian an ralti sawt nge, an la ralti chuang lem lo? tih kha pakhat a ni a.)

Tunah hi chuan an raltit sawt thu hi khawi atang mahin an sawi ka la hre lova. Tin, zana han len vel pawh hian thlamuang takin an leng a, rui pawh hi ka hmu ngai chuang lova. Engmah harsatna hmeichhiain an neih kan la hre lo a ni.

**Pu T. SANGKUNGA** : Pu Speaker, ka zawhna la chhan loh pawimawh ber ka tih pakhat chu, za chuang thi te kha MLPC Act hman tawh hnua zu zawrh in nge ni, a Commission din kha a nia ka tih. Mi za lek an ni a, police tan hriat a har miah lo. Zu in thar nge an nih a, hman atanga lo in tih kha chu issue a awm reng tur a ni a, chanchinbuah te pawh a awm a. Chuvang chuan committee, a zir chiang tur a din theih angem tih kha ka zawhna kha a ni a.

**Pu R. LALZIRLIANA, MINISTER** : A Commission pawh kha han din tehreng ila, Pu Speaker, anmahni kha an thi daih tawh si a, zuk check leh theih pawh kha an ni dawn si lova, a buaithlak ngawt ang a. A Commission kha chu din a tul lo ah i ngai mai ang.

MLA zahawm tak Pu Lalruatkima zawhna kha, tunah mai hi chuan ka hriat loh kha a tam ang a. Zawhna kha a awm ve tho a, a zawt hnem khawp a, chu chu a la chhuah theih leh kan la chhang ang a. Tin, kan chhan theih awm chhun chu permit 1 ah hian cheng engzatnge, Pu Beichhua zawhna ₹ 540/- a ni. A form lei nan khan ₹ 20/- a ni a, tin, challan an tih vel nan khan ₹ 20/- a ni a, ₹ 500/- kan ti thin a, chu nen chuan a vaiin ₹ 540/- ang a nih chu.

Tin, state hian distillery, zu siamna hmun te hi neih ve kan tum em? a ti a. Heng hi chu a raw material-te, kan grape-te emaw, eng eng emaw, tha zawk kan neih hunah chuan neih te pawh a la tha ang chu. Tin, bonded warehouse hi tute nge tih ami kha, neitu tih kha? (Dr. K. BEICHHUA : Tender a ni em? Tender-ah mi engzatin nge chhang? Tute nge a neitu? tih kha a ni) Tender ni lo. A diltu hi 7 lai kha nge mawni an ni a, chung zingah chuan :

- 1) RTP Bonded Warehouse, proprietor Pu Rothangpuia S/o Challianchhunga.
  - 2) SS Enterprise Bonded Warehouse, proprietor Sam Syuhlo S/o S. Hiato.
  - 3) Raphael Enterprise Bonded Warehouse, proprietor Lallianzuali Hauva D/o Thansanga.
- Hemite hnenah hian pek a ni.

Tichuan, VAT lampang pheih hi chu keini tih ve a ni lova, Taxation lam khawih a ni a, kan hre lova. Tin, zu case 1 zelah hian ₹ 100/- lak a ni a; beer-ah hian ₹ 50/- lak a ni. A dang kha chu zawhna dangah khan a awm a, tunah ka rawn keng lo a, ka chhang thei mai lo tlat.

**Pu K. SANGTHUAMA** : Pu Speaker, zawhna ni lovin, khawngaihin, minute 2/1. Khu Rangvamual leh Phunchawng vel khu, ni e, nimin khan han kiang duak khan sawi a awm a. Mahse, kan bial a ni a, kan kal reng reng a. Engpawhnise, sawrkar hian, Excise-ho leh Police-ho hian thlahthlam lo sela, zu sa an la tam mai a. Sawrkarin phalna a pek tawh avangin tlemin kan inthlahdah deuh nge ni, chulaiah chuan tan la deuh hlek selangin. Kan sawi fo thin angin khulai khu luh chhuah ka a ni a, hnamdang tam tak an lo kal a, chuvang chuan, tlemin thlah zalen lutuk lo ila. Permit tha tak hetilaiah kan issue tawh a (SPEAKER : Rawtna kha chu office-ah i sawi thei ang chu maw le). Chuvangin, khuti laiah khuan kan thlahdul zel chuan a dikin kan hre lova. Chuvangin, sawrkar hian khulaiah khuan tan la deuh se tih kan rawt a nih chu.

**Pu LALRUATKIMA** : Pu Speaker, khawngaihin, a la chhan kim loh rual rual khan, ka zawhna kha a technical deuh hlek avangin tunah hian zawhna an la rawn chhawp chhuah loh zingah a tel a, an la rawn chhang lo nge ni. Chu laiah chuan zu case 1 ah (SPEAKER : Ngawi rawh, i duhtawk teh ang) import permit fee ah khan ₹ 100/- leh beer ah ₹ 50/- kan la a, engzah nge kan hmuh tawh tih kha, khawngaihin, min chhang thei em aw? Tin, nimin lamah khanin ka sawi tawh a, Excise Department hi RTI hmanga an va zawhin, 'RTI Act hnuaiah kan awm lo.' an ti a.

Eng dan hmangin nge an awm loh tih kha, khawngaihin, kan Minister zahawm tak khan min hrilh thei em aw. (Pu T.T. ZOTHANSANGA : Pu Speaker, kha kha a zawt tho a, a dang a chhuah hunah khan a rawn chhuak ve mai dawn a ni) ..... A chhuak dawn tawh lo, Excise in an sawi dawn tawh lo tlat. Ka zawhna piah lam a ni, ka supplement na a ni kha kha.

\*Speech not corrected

**SPEAKER** : Zawhna dangah i kal tawh mai ang u. 129-na, a neitu Pu R. Vanlalvena zawt turin i sawm ang.

**Pu R. VANLALVENA** : Pu Speaker, ka lawm e. Ka zawhna 129-na Food, Civil Supplies & Consumer Affairs Minister zahawm takin min chhan atan-

- a) Buhfai, mimal hnen atangin thlakhatah engzatnge sawrkarin a lei?
- b) Buhfai hi Mizoram quota F.C.I atangin engzatnge kan dawn?
- c) Engvangin nge F.C.I dawr lova mimal kan dawr?
- d) Food Security hi engtik atangin nge Mizoram kan hman ve dawn? Ka lawm e.

**SPEAKER** : Department neitu Minister zahawm tak chhang turin i sawm ang.

**Pu JOHN ROTLUANGLIANA, MINISTER** : Pu Speaker, member zahawm tak Pu R. Vanlalvena Starred Question 129-na chhanna chu-

- a) SPAB-in buhfai hi thlatin 80,000 Qtls. mimal hnena lei theihna min phal sak a. Nimahsela, buhfai hi mimal hnen atangin buhfai kawl lai (stock position) atanga chhut a thlakhat chhunga mamawh zat ang zelin lei thin a ni. Chuvangin thlakhat a buhfai mimal hnen atanga lei thin hi a tam lam bithliah a awm lo.
- b) Govt. of India, Ministry of Consumer Affairs in Mizoram tan buhfai FCI kaltlanga thlatina min pek chu 52,210 quintals a ni.
- c) FCI atanga buhfai thlatina kan lei 52,210 qtls. hian Mizoram mamawh a daih loh avang leh 52,210.00 qtls. bak hi chu Economic Cost hnuaiyah ₹ 3,134/- per qtl-a lei a ngaih avangin approved supplier hnen atangin Economic Cost man aia tlawm zawk ₹ 2,575/- per qtl-in kan mamawh hi lei a ni.
- d) Mizoramah Food Security hi November, 2015 atanga hman tan tum a ni.

**SPEAKER** : Zawhbelhna. A neituin zawt hmasa sela, Pu Vena sawm ang.

**Pu R. VANLALVENA** : Pu Speaker, ka lawm e. Mimal hnen atanga sorkarin buhfai a lei khan FCI-a kan lei aiin a hlep nge, a hloh? Thlatin hlep ni ta se engzatnge kan hlep tih ka zawh belh e.



**SPEAKER** : Pu K.Sangthuama'n zawt law law se.

**Pu K. SANGTHUAMA** : Pu Speaker, ka lawm e.

(1) Tuna Supplier hi a hun chhung tawp tawh si, engvangin nge quotation koh lova a term extend sak a nih? Thla engzatnge extend a nih?

(2) Quotation koh thuai theih a ni angem?

**SPEAKER** : Pu Rinawma sawm ang.

**Er. LALRINAWMA** : Pu Speaker, ka lawm e. Zawhna chhanna : (a) naa Mimal hnen atangin thla khatah sorkarin engzatnge a lei tih kan hre lo lai kha a fello in ka hria a. Chulai chu Supply Minister ber tena kan chhan theih loh chuan, hei hi kan hriat loh chuan engtingnge buhfai man zat pawh kan hriat chhuah theih ang tih kha rilruah a awm deuh a. Chuvang chuan khalai kha a vel tal pawn min chhang thei em tih ka zawt e.

**SPEAKER** : Pu Ruatkima'n rawn zawt law law se, dan piah lamah.

**Pu LALRUATKIMA** : Pu Speaker, ka lawm e. Mimal hnena buhfai lei kha a chhang hniam ber kha tunge? Engzatin nge a chhan? tih leh Engvanga in withdraw ta daih nge a nih? tih kha ka zawt e.

\*Speech not corrected

**SPEAKER** : Minister zahawm tak chhang turin sawm ila, a dang a awm thei tawh lovang.

**Pu JOHN ROTLUANGLIANA, MINISTER** : Pu Speaker, zawhna neitu Pu Vena zawhna - FCI atanga kan lei loh a, mimal hnen atanga kan lei hian a man a tlawm zawk a. Quintal khatah ₹ 559/-in a inthlau a ni.

Tin, member zahawm tak Pu Sangthuama zawhna - In hriat angin food security kan buaipui em em a, kan official-te lam pawh an buai em em a. Tin, kan Danin a phal bawk si avangin thla 6 atan kan extend a ni. Tin, a supply-tu kha 'Rem Rem Enterprise' a ni a.

Tin, Pu Ruatkima rawn zawhna – Engvangin nge a in withdraw leh tih lai kha chu ka chan lam a ni lo. A in withdraw lehtu chan lam a ni.

A chhang hniam ber chhanna kha kan hre lova, tuna a chhang hniam ber kha a in withdraw avang khan a chhang hniam ber dawttu kha kan pe a. Chu chu quintal-ah 2575 a ni. Kan hre lo alawm, a in withdraw daih a, (interruption.....Pu Lalruatkima - Statement-ah a lang vek a, engatinge Minister berin i hriat loh aw, khawngaihin). A in withdraw hnuah kha chuan ka hnen a rawn thleng tawh lova, in withdraw lo zawng kha a ni lo thleng (Pu Ruatkima..... an offer hnuah a

in withdraw a, a dik lo alawm, Minister table kha a thleng ngei ngei tur a ni) A in withdraw hnuah khan arawn ti thleng lova, a in withdraw tawh si ah kha chuan ka hnen a lo thleng tawh lova; withdraw lo zawng kha a lo thleng a, kan approve mai a ni.

Tichuan, thlakhatah quintal engzatnge an lei tih kha an hre chiang lo min ti a. Hei hi Pu Speaker, nimirah khan ka wind-up naah khan ka sawi tawh a. Thlatin quintal 80,000 lei theihna min pe a, tunhma chuan kan lei thin a. Amaherawhchu, VIP quota-te, tin, mimala special permit-te kan tihtawp vek avang khan buhfai surplus a awm tak avangin thla 5 chhung hi chu quintal 40,000 chauh kan lei tawh a. Tin, tun thla chho mekah hian quintal 50,000 kha kan order veleh a. Khatiang khan a inang lo a ni. Amaherawhchu, Finance lamin min phalsak chu, he SPAB-in min phalsak chu quintal 80,000 thleng thlatin kan indaih lohna lei kha min phalsak a. Kan mamawh dan azirin, leh stock position azirin kan lei tamin kan lei tlem a ni, Pu Speaker.

**SPEAKER** : Zawhna 130-naah kan kal ang a. A neitu Pu Lalruatkima, MLA zahawm takin zawt se.

**Pu LALRUATKIMA** : Pu Speaker, ka lawm e. Ka starred question No.130-na Land Revenue & Settlement Department changtu Minister zahawm tak chhan atan –

- (a) District Hrqs/Sub-Town/Notified Town-a Cadastral Survey-ten ram an the vek tawh, Pass/LSC etc mipui tan a Khulna man sang lutuk vang leh chhan dang vangtea Pass lak chhuah loh engzatnge awm? In hmun Pass hi awlsam zawka lakchhuah a nih theih nan kalpui ruahmanna siam tum a ni em?
- (b) In hmun LSC/Pass siam ve duh ngawih ngawih Zokhaw lam tan awlsam zawka In hmun pass siam turin ruahmanna siam tum a ni em? tih ka zawt e.

\*Speech not corrected

**SPEAKER** : Department changtu Minister zahawm tak chhang turin i sawm ang.

**Pu R. ROMAWIA, MINISTER** : Pu Speaker, MLA zahawm tak Pu Lalruatkima zawhna starred question No.130-na chhanna chu -

- (a) District Hrqs./Sub-Town/Notified Town-a Cadastral Survey-ten ram an teh vek tawh, Pass lakchhuah loh awmzat dik tak hi hriatchian fak theih a ni lo. In hmun Pass hi awlsam zawka lakchhuah a nih theih nan ruahmanna siam mek a ni.
- (b) In hmun LSC/Pass siam ve duh ngawih ngawih Zokhaw lam tan awlsam zawka In hmun Pass siam turin tun dinhmunah ruahmanna siam tumna a awm rih lo.

Hetah hian District Hrqs/Sub-Town/Notified Town-ah te hian Cadastral Survey kan han ti mek chu a ni a, Zoram pum chu kan la cover zawh loh avangin henga lang pha lo hi chu kan la indaih loh em avangin siam turin hmalakna kan la nei thei rih lo a ni. \*Speech not corrected

**SPEAKER** : Zawhbelhna, Pu Ruatkima sawm ang.

**Pu LALRUATKIMA** : Pu Speaker, kan Minister zahawm tak khan 'la lakchhuah loh zat kha kan hre thei lo' lai tak kha chu khawngaihmin min enfiah sak sela. Office-in kan kawl vek tho mai a, khang documents zawng zawng kha In hmun la pekchhuah loh hrim hrim kha. Tih fel tawh si, LSC process vek tawh, khul chhuah loh mai chauh kha a ni a, Office lamin hriat loh kha chu a mak khawp mai, tih kha ka'n sawi tel duh a.

Tichuan, Pu Speaker, LSC mortgage-ah an duh ve thin a, heng mite hi Revenue Tax kan hmuhna tur te an ni bawk si a. Ngaihtuahna a hman theih lawm ni? tih kha ka zawt tel a.

Tin, The Mizoram Land, Revenue Laws, 2013 kan hman mek hi enthat tum anga sawi kha enge a thlen chin? Engtikah nge peih fel a nih dawn? tih kha ka zawt tel duh a.

Tin, ka zawhna dang lehah chuan SAAB din lohna District Headquarters Aizawl telin, engtikah nge din a nih ang? tih leh AMC-in Property Tax an lak tawh hnuah chuan Land Revenue Tax kan han tih, Land Tax-a kha Zoram chhiahte nen khan la lo tur awm khan TV ah kan lo ngaithla a, amaherawhchu, 'The Mizoram Land Revenue Laws' hian chu chu a sawi ve si lova, chulaiah chuan mipui kan chiahi khawp mai a, Property Tax leh Land Revenue dan a chhiah khawn hi enge a danglamna, chulaiah chuan a inkawp dawn em? Pek kawp tur nge pek kawp loh tur tih kha ka'n zawt duh a ni e.

\*Speech not corrected

**SPEAKER** : Zawhbelhna dang a awm loh chuan Department neitu Minister zahawm takin chhang se.

**Pu R. ROMAWIA, MINISTER** : Pu Speaker, thingtlang khuaa mi te pawh hian mortgage turin LSC thei ve se kan duh khawp a, amaherawhchu, kan la indaih loh avang khan kan ti hlei thei lova. Amaherawhchu, hetilaia mortgage khawpa thingtlangmi khawsa thei hi chuan hemi a notified town emaw, sub town emaw, district headquarter emaw, capital-ah emaw hi chuanin In hmun lo ram pakhat tal hi chu an lo nei duh khawp mai a. Chung atangte chuan mortgage-in thil an ti ve thei thova.

Tin, kan Land Revenue Act 2013 House-ina lungual taka kan pass kha a takin kan han hman dawn chuan engemaw hetilai chu siam leh a tha mang e, tih kha kan nei neuh neuh a. Chung chu kan officer ten uluk takin an han en a. Tun Session-ah pawh hian kan ti hman dawn emaw ka ti a, mahse, kan hman ta lova. A leh pek Session lamah te chuan kan introduce hman ngei kan beisei a.

Tin, SAAB hi keini chuan kan inngahna a ni lo thei lova, hei sorkar V/C-a a innghat lo thei lo ang hi a ni a. Khawtinah hian heng ang notified town leh sub-town velah te chuan SAAB hi awm ngei se kan duh a. Site Allotment Advisory Board hi. Chutah chuan notice te pawh kan han chhuah thin a, rin ai hian a khaw neitute hi an lo hmanhmawh vak lova, khaw thenkhatah phei chuan an V/C thuneihna chhuhtu niawm hiala ngai te hian an ti duh mang lova, chungte chu kan remind kan remind thin a. Anni SAAB in an rawn recommend ngawt hi chu tunah pawh hianin kan department-ah hian a tlang zar zar a, him dam tak niin kan ngai a. Chutiang ang chu kan dinhmun a ni a, hetah hian kan in remind deuh reng a ni SAAB tur hian.

Tin, AMC in property tax a tih chungchangah khan keini Revenue lam ngaihndanah chuan a land record zawng zawng leh engkim nei, a LSC leh a area record zawng zawng neitu kan nih avang hian khawpui chhunga ram, a land bik a hi chu kan la lak zel turah kan ngai a. A land atanga hman tangkaina lo awmchho lampang building a ni emaw, thil engpawh lo ni se, khang ang kha chu AMC te pawh in an lak turah kan ngai a. A land record nei tha ber tu leh a land allot tu ber kha, kha chu kan chan turah kan ngai a ni khawpui ah hian. Tin, a land tax chumiah chuan a land tax-a kan la collect zel turah kan ngai.

\*Speech not corrected

**SPEAKER** : Awle, 131-naah kal ila, hei Pu Ruatkima baw, han zawt se.

**Pu LALRUATKIMA** : Pu Speaker, ka lawm e, ka Starred Question 131-na Environment & Forests Department changtu Minister chhan atan –

- (a) Environment & Forests Department-in Reng Dil hi a enkawl em? A enkawl chuan 2010 – 2015 chhungin engzatnge a Dil enkawl nan a sen ?
- (b) Reng Dil chei turin ruahmanna engte nge sorkar in a neih ? tih ka zawt e.

\*Speech not corrected

**SPEAKER** : Aw, Minister zahawm tak a changtu lo sawm ila chhang turin.

**Pu LALRINMAWIA RALTE, MINISTER** : Pu Speaker, Aizawl West-II bialtu member zahawm tak Pu Lalruatkima Starred Question No. 131 chhanna chu -

- (a) Environment & Forests Department hian Reng Dil hi a enkawl a, theih tawkin humhalh a ni.

Pu Speaker, a dil hrim hrim enkawl nan hian hemi a tuitling lai tak a enkawl nan kha chuan sen a awm lova. Amaherawhchu, a area-ah hian Watch Tower sak nan IFM hnuaiah ₹ 4.00 lakh sen a ni a. Tin, TFC grant-in Forest Guard Quarter cheng nuaih sawm man sak a ni baw, chu chu kum 2014-15 chhung a mi a ni. A hma 2010 leh 2014 inkar a hi chu sawilan tur kan han hmu mai lo a ni.

- (b) Reng Dil chei tur hian sorkar-in Eco-Tourism Project a siam a, a concept note pawh North Eastern Council a thehluk turin buatsaih tawh a ni.

**SPEAKER** : Zawhbelhna Pu Ruatkima phawt.

**Pu LALRUATKIMA** : Pu Speaker, ka lawm e. Khu Reng Dil khu a khua ni lovin 'Reng Dil' han tih deuh kher te khu a dik mai thei a, a khua nen khuan kan hriat pawlh lo thei lova. A 'Dil' a khu a ni a, kan han sawi lai tak a khu. Culture Heritage ah a puan chi em aw te ka ti a. A chhan chu khulaiiah khuan tunhma atanga lo awm hmasa ten eng angin nge Mizoram hun hmasa lampang hrihtute an nih avangin helai hi chu Art & Culture lampang ten an concern mai thei a.

Tin, kan zawhbelhna chu Wet Land Development Project te hi a siam theih lawm ni? Hetiang hian a catchment area te, khang ang zawng zawngte kha enkawl ngai tak mai leh lei ina a hnawhkha zel theih a nih avangin khulaiiah Dil pawimawh tak mai khawthlang lama awm a khu ruahmanna Wide Land Development Project ang chi te kha siam theih a ni angem tih kha ka'n zawt tel a ni.

\*Speech not corrected

**SPEAKER** : Dr. Ngurdingliana zawt law law se.

**Dr. NGURDINGLIANA** : Pu Speaker, ka lawm e, Session hmasa khan zawhna ka siam a, Khawruhlian I.B. sak tur a ka rawn dil Department atanga min rawn chhan dan kha a lungawi loh thlak khawp mai a, a bung lutuk a. A piah lawk Darlawnah I.B. a awm thova, 'Khawruhlian hian an mamawh lo' tih khan min rawn chhang a. A Forest Department hmalaknaah an hmalakna (SPEAKER: Rengdil lam daih) Rengdil atangin Khawruhlian ka lut. Chu chu Pu Speaker, ram pum dap tur a ni a, khati em ema inchhan kha chu a tul lovin ka hria a, chuvangin kan Minister zahawm tak hi khilaia kan mamawhna a san tehlu nen tunah PHE Rural Watson Division te, Forests Department te nena tuihna humhalh kawnga hna tha tak kan thawh mek laia, khatia han inchhan kha tha lo ka ti a, chu chu kan Minister hnenah pawh ka thlen tawh a. Vawiih chhanna concrete tak kan zawt a ni e. Ka lawm e.

**SPEAKER** : Awle, Minister zahawm tak sawm ila chhang turin.

**Pu LALRINMAWIA RALTE, MINISTER** : Pu Speaker, zawhna neitu MLA zahawm tak Pu Lalruatkima zawhna han zawhbelhna leh sawibelhna kha a pawimawh khawp mai a. Mizoramah hian bio-diversity ah chuan khumi Lungkulh Reserve kan tih te, Reng Dil, Dil pahnih a awm a, Reng Lal te siam ni a rin. Khumi tluka hausa khu Mizoramah hian a awm lovang tih a ni, kan mithiamte chhut danah chuan, Sakei atanga Fanghmir thlengin tihna ang a

nih chu entirnan. Tin, phul atanga thing lian ber thlengin tih ang zawng pawhin sawi ta ila, Sangha thlengin. Chu chu a ni a.

Tin, khumi ah khuan Reng lal kulh hlui te pawh kha a awm a ni a, archeological site pawimawh em em a awm a ni a. Chuvang chuan Cultural heritage site han tih te pawh kha a awm khawp mai a, tang tlangin ti thei pheila chu a lawmawm khawp ang tih kha kan comment zui duhna a ni a.

Tin, State bio-diversity board ah hian bio-diversity site a puang tur hian ngen a ni a. Chu chu State bio-diversity pawh hian a pawm tawh a, notification siam mai tur a ni a. A chhehvel te remtihna te DFO ten lak fel a ni tawh bawk a. Hetiang anih chuan mumal zawk leh awmze nei leh zualin research beite pawh Puan In kaiha an luh a, tropical rain forest chungchanga zir chiang duh te tan pheila chuan Puan In kaiha han luhna tlak zinga ngaih a ni a. Pu Ruatkima sawi ang khan Sanitation khu harsatna lian tak a niin a lang a, a bik takin a dil chhak zawkah khuan hnahtel tawih avang ringawt pawh khuan a dil khu a pawn chak ve a, chungte chu a bika sum dah a awm lo chung pawhin engtintin emaw kan DFO te leh kan RO ten an han enfiah a, a haifai a sangha tan pawh a tha tura ngaih a ni.

Tin, a rawn sawi ang khan Wet Land Development ah hian telh ve turin dil thin a ni a hemi dil chang lo pawh. Amarawhchu, hemi Centrally Sponsored Scheme Wet Land Development hnuai ah hian kan Dil ve ho hi duh aini a area a zim thin a ni. Chulaiah chuan harsatna kan nei thin a, funding min tihsak theih loh avang hian a puitling hlei thei lo a ni, engpawhnise, kan sawi tak ang khan NEC lamah te concept note thehluh a ni a. Heng hi a tlang hlauh te a nih chuan kan hotuten min bawhzui saka kan ti tlang hlauh thei te anih chuan mumal zawkin enkawl theih kan in beisei a. State Sorkar pawh chutah chuan kan tang hle a ni tih kan sawi duh a ni. Member zahawm tak Chalfilh bialtu in assurance pe tura min tihna a ni awm mah a, kan chhanna hmasa lamah khan a chhanna tawngkam hi mawi lo deuh deuh a awm palh thin tih ka chiang a, ama hnen ngeiah pawh khan Pu Speaker ka sawi a. Dah tumna awm lo ve ti ta mai lova, “A piah lawkah chu chu a awm bawk a an mamawh lo” in tihsak mai kha chu ama hnenah pawh hmaichhanah ka sawi tawh a, min lo ngaidam sela. Question lo kal leh heng zawng zawng hi kan approved a nih rual hian lo hmuh kim loh palh te a awm thei a rilru kan intihnatna kawngah khan ngaihdam ka han dil a.

Tin, Forest hi kan Tourism Minister in nimen lama a sawi ang khan Tourism lamah harsatna kan neih takah pheila chuan Forest Department lam hianin a enkawltu tur anmahni OE atang te a daily labour ang te a IB Chokidar ang rengin enkawl ve mai theih zel anih avang hian Mizoramah helama kan harstana puhru tur hian Range Officer awmna chin angah hi chuan mamawhna en in dil belh zel mai ila a tha dawn lawm ni tih hi tunhnai te maiah hian kan nei a ni. Intiam ang em chuan kan sawi ngam lova Pu Speaker

a sum te kan intum te anih loh avangin engpawhnise kawng kan rawn zawng zel ang tih kha kan Member zahawm tak khan min lo hriat sak ka duh a ni.

**SPEAKER** : Zawhna 132-naah kan kal ang a, a neitu Member zahawm tak Pu R.L.Pianmawia i lo sawm ang.

**Pu R.L. PIANMAWIA** : Pu Speaker, ka lawm e. Food, Civil, Supplies & Consumer Affairs Department changtu Minister zahawm tak chhan atan.

Darlawn Godown chhe tawh sak thar tura hmalak a ni em ?

**SPEAKER** : Chhang turin changtu Minister i lo sawm ang.

**Pu JOHN ROTLUANGLIANA, MINISTER** : Pu Speaker, ka lawm e. Pu R.L.Pianmawia starred question 132-na chhanna chu -

Ni e. Non Lapsable Central Pool Resources (NLCPR) hnuuia Darlawn Godown sak tharna tur Fund dil mek a ni.

**SPEAKER** : Zawhbelhna, a neituin zawt hmasa se.

**Pu R.L. PIANMAWIA** : Pu Speaker, kan Minister chungah khan lawmthu ka'n sawi a. Ka bial chhung Sakawrdaiyah Godown tha tak min sak sak a, khi khi engtikah nge min hawn sak theih ang? Tin, Godown tha lo tam tak kan nei tho mai a, Zohmunah leh Vervek ah te, heng hi thawmthat tura hmalak theih dan a awm angem?

**SPEAKER** : Er. Rinawma

**Er. LALRINAWMA** : Pu Speaker, ka lawm e. Tawi tein kan zawt anga. Ka bial Chhiahtlang-ah khian khaw luh tirh lamah khian Godown a awm a Food, Civil Supply godown tur a ni e an ti a. Khi khi min enfiah sak thei em tih kha kan zawt duh a ni e.

**SPEAKER** : Pu Thanliana i sawm ang .

**Pu LALTHANLIANA** : Pu Speaker, ka lawm e. Zawhbelhna hi ka ti ve ngai lova, kan ti ve ang e. Ka belhna chu Food, Civil Supplies Department hian Buhfai special in a la pe chhuak thin em? Tin, pe chhuak thin ni ta se, record te hi vawn thin a ni em? tih kha ka zawt e.

**SPEAKER** : Dr. K. Beichhua sawm ang zawt belh turin.

**Dr. K. BEICHHUA** : Pu Speaker, ka lawm e. Tun hnaia Godown abolished kha engzatnge tih leh abolished tur tih dah let kha engzatnge ? tih ka zawt a. Kan Speaker biala abolished tak kha dah leh tumna a awm em tih ka zawt e.

**SPEAKER** : Awle, Dr. Ngurdingliana i sawm ang.

**Dr. NGURDINGLIANA** : Pu Speaker ka lawm e. A hmunah min ensak tawh a, Khawruhlianah khian Godown min sak leh thei ang em? tih kha ka zawtbelh duh a ni.

**SPEAKER** : Minister i lo sawm ang.

**Pu JOHN ROTLUANGLIANA, MINISTER** : Pu Speaker ka lawm e. Pu R.L.Pianmawia zawhbelhna - Sakawrdai Godown kha engtikah nge min hawn sak theih ang tih kha a ni a, hei Godown hi tunah sak mek kan nei a, term hmasa ami Godown 17 kha a then sak zawh tawh la luah loh kan nei bawk a. Heng kan la luah loh te hi PWD lam atanga min handover loh avangin kan luah thei lo a ni. Tin, a final bill kha kan la pe thei lova, chu chu anni pawhin a then te phei chu kan PWD lam te pawh in harsatna an tawh vang a ni. Tin, Godown chhe ho kha engtikah nge min sak sak theih ang tih kha, tunah hian kan Finance Minister Speech ah pawh khan kan hmu a Godown 28 lai mai sak tur a ni a, khang atang te pawh khan a ngaihtuah dan tur kan rawn ngaihtuah dawn nia. Member zahawm tak Er.Rinawma zawhna pawh kha kha tho kha a nih ka ring. I biala Godown awm sa la luah loh te kha, min la handover loh vang a ni.

Tin, member zahawm tak Pu Thanliana zawhna special permit pek a la ni em buhfai chungchangah tih kha. Keini chuan kan hriatpuiah chuan special permit kan pe tawh lo va. An lo ti ru a nih chuan a ruk hi chu kan hre chiah lo a ni.

Tin, Pu Ngurdingliana zawhna pawh kha Khawruhlian-ah khan a khilai dan te pawh kan la rawn ngaihtuah dawn a nia.

Tin, member zahawm tak Dr.Beichhua zawhna kha chu Pu Speaker, zawhna dangah hian a la awm a, kha kha ka rawn keng chiah lo va. Chuvang chuan kha kha chu ka chhang lo mai a nge min lo hrethiam dawn nia.

**SPEAKER** : Awle, zawhna No.133 naah kan kal ang a. Zawhna neitu Pu Nihar Kanti Chakma, MLA zahawm tak zawt turin i sawm ang.

**Pu NIHAR KANTI CHAKMA** : Pu Speaker, ka lawm e. Ka zawhna Starred Question No.133 na, Public Health Engineering Minister zahawm tak chhan atan -  
 (a) Tlabung Greater Water Supply Scheme thawhzawh a ni tawh em ?  
 (b) Estimate amount engzatnge ? tih ka zawt e.



**SPEAKER** : Awle, department neitu Minister zahawm tak chhang turin i sawm ang.

**Pu ZODINTLUANGA, MINISTER** : Pu Speaker, member zahawm tak Pu Nihar Kanti Chakma Starred Question No.133 na chhanna chu –

- (a) Tlabung Greater Water Supply Scheme hi thawhzawh a la ni lo a. Thawhzawh la ni lo mahse January, 2015 atangin tui hi pump chhuah a ni a, mipuiah pawh sem mek a ni.
- (b) Approved Estimate Amount chu ₹ 4,41,00,000/- (cheng nuai zali leh sawmli pakhat) a ni e.

**SPEAKER** : Zawhbelhna.

**Pu NIHAR KANTI CHAKMA** : Pu Speaker, zawhbelhna –

- (1) Engtikah nge zawh anih theih ang ?
- (2) Contractor hming min hrilh thei em ?
- (3) Tlabung Water Supply Scheme hian mi engzatnge population wise emaw household emaw, a chawm theih ang ? Engtikah nge min hawn sak theih ang ? tih kha ka zawt a ni e.

**SPEAKER** : Awle, Pu Robiaka'n han zawt leh se.

**Pu LALROBIAKA** : Pu Speaker, a relevant tho in ka ring a. Phaileng Water Supply Scheme kha kan zawt ve duh a. Kan zawh duhna chhan a chu Unstarred Question-ah khan physical leh financial-ah khan 100% zo tawh a chhan a ni a. Amaherawhchu tunah khuan commission pawh a la nih loh mai piah lamah an la zo lo nasa a ni. Chu chu englai kha nge dik lo a, engvanga khatia chhan ngawt nge anih tih lai kha ka rawn zawt a ni.

**SPEAKER** : Aw, Phaileng tan khan a lo in ring lo mai thei a, mahse a chhan theih leh, Pu Rinawman zawt leh law law se.

**Er. LALRINAWMA** : Pu Speaker, ka lawm e. Ka zawhbelhna -

- (1) Physical achievement leh financial achievement hi percent engzatnge ka zawt a.
- (2) Mipakhat tan tui litre engzatnge hisap sak an nih ?
- (3) Tin, a dang lehah chuan Tlungvel tui lakna atan hian Tuirini khuah tumna hi a awm awm niin ka hria a. Hei hi a awm tak tak em tih kha ka zawhna a ni e.

**SPEAKER** : Awle, Tlungvel te chu a la in ring lo mai thei a, (interruption) zawtbelh rawh.

**Pu JOSEPH LALHIMPUA** : Pu Speaker, Runtlang 'E' Leite Combine Water Project hi 2008 MLA inthlan dawnah kan Chief Minister zahawm tak hnena kan ngen, kan sorkara kan tih tur zinga kan telh a ni a. Tunah hian kum 6 kum 7 a liam tawh a, Leiteah chuan Reservoir

an siam tawh a. Mahse tui an la pump haw lo a, a la lut lo a. Runtlangah pheih chuan Reservoir pawh a la awm lo a. Deparment-ah chuan completed tih niin ka hria a, hei kum 3 vel chu hmalakna an chawl tawh a. Hei hi khawngaih takin kan Minister zahawm tak hian min lo ennawn sak sela. Kan hotupa ber intiamna a ni a, tun term-ah hi chuan min peih sak hram se la tih kan ngen e.

**SPEAKER** : Awle, hei zawhna hun a zo a. Minister kha kan chhan tir law law dawn nge, a laklawh em ? Anih leh Minister zahawm takin zawhna hrang hrangte han khaikhawm se, han chhang sela.

**Pu ZODINTLUANGA, MINISTER** : Pu Speaker, kan member zahawm tak Pu Nihar Kanti Chakma, zawhna neitu zawhna kha – Tlabung Greater Water Supply Scheme hi Government of India, Ministry of Urban Development hnuai atanga project rawn kal a ni a. A tui pump ngawr ngawrte khu chu kan zo tawh a, tui te pawh khu sem a ni a. Amaherawhchu, a final installment la turin Utilization Certificate te, Progress Report te, a thlalak te engkim thawn tawh a ni a. Hemi final installment lo thlen hma chuan tih tur tam tak a la awm a. Chuvang chuan a zawh hun tur mai hi kan la hre lo a. Central sorkarin a last installment min pek hunah zo thei turah kan in ngai a. Tin, a contractor hming hi ka lo hre mai lo a, khalai kha chu ka chhang thei mai lo a. Ziakin kan lo hrilh dawn nia. A zawh hun tur kha a hriat mai theih loh a ni tih kha ka rawn sawi duh a.

Member zahawm tak Pu Robiaka zawhna Phaileng chungchang pawh kha, a last installment kan la hmuh loh avangin hnathawh tur pending tam tak khu a la awm a. Chungte chu tunah hian theih tawpin kan buaipui a. Central sorkar-ah official te pawh kan inthawn a. State sorkarin kan tih tur .....

**Pu LALROBIAKA** : Pu Speaker, khalai tak kha a nia. Physical leh financial la zawh loh na na na, zawh tawh ang a chhanna siam thin a kha, a va fair lo ve ? Khatiang kha anih dan ang khan tarlang mai ila, a tha mai lo em ni ?

**Pu ZODINTLUANGA, MINISTER** : Pu Speaker, a dik khawp mai, kan lo endik dawn nia khalai kha. Member zahawm tak Er.Rinawma zawhna kha – Physical progress chu nichina kan sawi tawh ang khan 95% a ni a. A hnathawh bak la awmchhun chu Tlabung Greater Water Supply Scheme-ah kha chuan filter bed leh filter media dah leh staff quarter te, laboratory building te kha la zawh loh lai chu a ni.

Tin, Tlungvel te, hmun hrang hrangah tui in tur tha an neih theihna tur atan hma lak chhoh mek a ni a. Mizoram hmun hrang hrangah tui la hmu lo te leh tui kham lo te improve theihna tur atan hma lak chhoh mek a ni a. Tlungvel bik pawh hi khang zingah khan a tel leh tel loh chu tunah tak chuan ka chhang thei lo a ni.

**Er. LALRINAWMA** : Pu Speaker, khawngaihin, thil pakhat. Ka zawhna financial achievement kha min la chhan loh chu thu hran ni se. Mipakhatin tui litre an dawn tur zat kha a pawimawh riauin ka hria a, khalai kha min chhang thei em aw.

**Pu ZODINTLUANGA, MINISTER** : Pu Speaker, financial achievement hi a percent zawng chuan ka sawi thei mai lo va. Estimated Amount kha ₹ 441 lakh a ni a, pawisa min la rawn pek loh chu ₹ 119.17 lakh a ni. A pawisa ang zawng kha chuan a dik mai, a percent ang zawng kha chuan ka chhang thei lo a ni.

Tin, member zahawm tak Pu Joseph Lalhimpuia zawhna Runtlang 'E' chungchang kha, ni e, amah hian a rawn sawi thin a. Hemi water supply project kha kan engineer te kan va zawt a. A system kha fuh lo a lo awm a, a pipeline an lakna te a lo bo vek tawh mai a. Tui pipe-te a system a dik lo a ni. Chung chu titha turin ruahmanna kan siam mek a ni tih kha ka chhanna a ni e.

**SPEAKER** : Awle, Tlabung atanga hmun hrang hranga kal kha, chhan vek chu a har ang. MLA zahawm tak Pu Chalrosanga Ralte in he House a awm loh phalna a rawn dil a. Kan phalsak a ni tih kha he House hi kan hriattir ni se.

Zawhna hun kan hmang zo a, resolution-ah kan kal dawn a. Resolution inang mi eng emaw zatin an thelut a. Chuvangin, kan ballot a, khata hming rawn lang kha a changtuah kan siam ta mai a ni. Tunah hian Resolution ballot kha pakhatna pawttu chu Pu Vanlalzawma a ni a. Hei hi Member zahawm tak Dr. K. Beichhua te, Pu Lalthanliana te pawhin hetiang hi an nei ve a, Pu K. Sangthuama nen. Mahse ballot ah khan Pu Vanlalzawma hmingin a chhuak a.

**Pu LALRUATKIMA** : Pu Speaker, keini pawh kan nei Er. Lalrinawma te nen khan.

\*Speech not corrected

**SPEAKER** : Hemi inkalpawhna tha zawk nei ila tihah hian in tel ve vek a maw ?

**Pu LALRUATKIMA** : Tel vek Pu Speaker, khatah khan an rawn ziak lang ve lo mai mai a niang. I chhiar rau rau kha chuan a neitute zingah khan kan tel ve tho.

\*Speech not corrected

**SPEAKER** : Awle, a tha e. Helaiia hming kan neih hote kha ka lo chhiar a, an tel vek chuan a tha e. Engpawhnisela, ballot-a tih a ni a, chutah chuan Pu Vanlalzawma hi a move tu tur tih a ni a. Bulletin-ah khan Part-II, No. 108-na tahrik ni 8-ah khan kan rawn thawn vek che u a ni. Tunah hian Pu Vanlalzawma, an vaia aiawha move turin i sawm ang.

**Pu VANLALZAWMA** : Pu Speaker, ka lawm e. Tuna i rawn chhiar chhuah ang khan vawiin Private Members Resolution hunah hian ka thu thehluh kha a lo lang leh nawlh a, a lawmawm hlein ka hria a. Kar hmasa khan tun ang hunah khan ka resolution kha a lo chhuak tawh a, chumi tum chuan a thu hetiang hi a ni a. “UN-in tualto hnamte dikna chanvo a puan chhuahna “UN declaration on the rights of indigenous peoples” a hlawhtlin thuai theihna turin theihtawp chhuahin hma lak ni rawh se”, tih ka put luh kha tlem her danglamin he House zahawm tak hian min lo pass sak tawh a, a lawmawm ka ti a, lawmthu kan sawi nawn leh ni rawh se.

Hei vawiinah hian kan ngaihthlak tawh ang khan ka thu rawn move tur hi midangte pawhin an theh lut a. Tin, vawiinah hian thu pathum pawimawh tak vek mai he ram tan leh hemi tana pawimawh tak vek mai a lo lut a. Chung zawng zawng chu a khawia pawh sawi ila a pawimawh em em vek a. Chutih lai chuan ka resolution a rawn chhuak leh nawlh a. Chutah chuan hetiang hian ka rawn ti a, “Mipuiten inkalpawhna kawngpui chhia avanga harsatna kan tawh mek sutkian thuai a nih theihna turin chak leh zualin hma lak ni rawh se” tih a ni a. Chutih mek lai chuan ka sawi ang khan khami thu chiah ni lo thu dang pahnih lo luta hi kan chhiar chhuak leh hrim hrim ang a Zoram mipui ten kan hriat atan. He House hian kan ram hi kan vei a, he hnam hi kan vei a. Chuvangin, Private Members Resolution-ah pawh hetiang hian thu te kan lo ti lut a ni tih kha kan sawi leh duh a. Pakhatnaah chuan Tuikuk, Mizoram mi leh sa dik tak, koh kir leh an nih pawha lo kir leh duh tawh lo te chu Electoral Roll atanga paih/thaibo a nih theih nan Mizoram Sorkar-in hma a la ang, a lo tih tawh chu a hlawhtlin thuai theihna turin theihtawp chhuah ni rawh se, tih hi Member pahnihin an rawn theh lut a. Mahse a chhuak lo hlauh va. Chutihlai chuan thu pawimawh tak tak mai, Member pakua-in an rawn theh luh chu Central Sorkarin India ram state hnufual bik te special status categories a pek thin tuna a tih tawp tak hi titawp lovin pek chhunzawm zel se kan ti, tih hi Pu Speaker, i dinglama mi 9 ten an rawn theh lut bawk a. Amaherawhchu, a chhuakah a tang lo va, pathumnaah chuan a lo lang a. Hengte pawh hi kan sawi kai duhna chhan chu he ram tana thil pawimawh tak, House-ina kan ngaih pawimawh, a pawimawh em em a ni kan tih, kan sawi hman dawn em ka hre lova resolution kan sawi dan te pawh a ni thei ang a. Hengte pawh hi a awm a tih he House kaltlang hian Zoram mipuite pawn hria se kan ram tan, mi thenkhatin kan MLA te thu mai mai leh awm mai mai anga insawi te pawh a awm a. Chutiang chu a ni ngawt lo a ni tih kha vawiinah kan sawi lang hmasa duh a. Khami thu thehluttute kha i dinglama mi pakua lai an ni a. Chungte pawh chu he House-in kan hriat piahlahmah hian Zoram mipuite pawh hian hre ta se tih hi thil tul tak te pawh niin ka hria a, thu hmahruai ang deuhin kan sawi hmasa a ni a.

Tichuan, ka resolution lamah chuan kan lut ang a, nichina ka chhiar tawh ang khan “Mipuiten inkalpawhna kawngpui chhia avanga harsatna kan tawh mek sutkian thuai a nih theihna turin chak leh zualin hma lak ni rawh se”, tih a ni a. He thu hi kan

thiante nena kan han sawiho pawhin kan uluk ve khawp mai a. Kei ai hian sawi ta se an sawi thiam zawk pawhin ka ring a. Amaherawhchu, ka move turah a lo tla leh si a, nichina kan sawi tawh ang khan.

Hei a sorkar lam te pawh kan ngaihtuahnaah an lang nghal a, chutih lai chuan a ruling lam tan te pawha lem harlo, sawiho va, phur taka kan sawi tlan theih tur ang wording hman kha kan ngaihtuahnaah a awm a, ti hian kan rawn chhep chhuak a ni a.

Hman deuh November thla khan Dr. K. Beichhua khan hetiang lam hawi tak hi a lo ti tawh bawk a. Chutah chuan “Mizoram chhunga inkalpawhna kawngpui leh leilawn (bridge) chhe ta lutuk hi tun aia chak zawkin siam that hna thawh ni tawh rawh se’ tih kha a lo awm tawh bawk a. Kha kha khami tum khan hnawl a ni a. Engpawhnisela, a wording te pawh kha a mam nalh tawklo te pawh a ni mahna. Tun tumah hi chuan uluk takin, theihpatawpa ulukin ruling lam leh opposition lam tepawhin lungruak taka kan pass ngei theihna turin a wording te pawh kan rawn uluk a. Tichuan, kan sawi mek lai hian hei kan hre vek a, tunah hian Mizoram hmun hrang hrangah inkalpawhna kawng a tha tawk lova, vawiinni thlengin chanchinbuah te pawh kan hmu a. Khaw thenkhat chuan road block te an siam a. Tin, area hrang hrangah khatiang khan harsatna tawkin mipuite an awm a ni a. Ka rilrua lo awm hmasa berah chuan hetiang road block han tih hi a titu han nih chu a nuam miah lovang. A hahtlak si a, a boruak te pawh a nuam lo dawn mange tih ka ngaihtuahnaah a awm a, an rilru tur te kan ngaihtuahpui hian an khawngaihthlakin ka hria a. Chuvangin, he House zahawm tak hian he Resolution hi pass ila, tunah hma kan la mek tho va kan Sorkar pawn, chak leh zuala hma lak dan a awm em aw tihna rilru atanga rawn lut a ni tih kha kan sawi duh a.

Tin, hei ka ngaihtuahnaa awm chu mipui rilru hi a ni mah mah a tunah chuan. Mipui rilru, thingtlang lam unaute rilru hi a zing deuh chuai em ni aw tih ngaihtuahna a awm a. Tunhma deuh khan kan sawi kual daih duh chu Chhimtuipui leilawn, sawmi Kawlchaw ami dawh kai hma khan, kan thian pakhat sorkar hnathawk Saiha-a awmin a sawi chu khangte kha ka rilruah a lo awm daih a. A sawi chu fur a lo ni a, ruah an sur tlak tlak a, Chhimtuipui lam hi kan hawi thla fo va, tui a lian em tih hi kan ngaihtuahnaah a awm a. Aizawl kal tum lem lo pawh ni ila Marboard a kai thei lo an tih hi chuan thinlung hi a zing mup mai a ni tih hi ka hre thin a. Chung boruakte pawh chu Aizawl kal tum miah lo te pawh kha Marboard a kai lo tih kan hriat hi chuan rilru hi a nuam lo va, duhna pawh nei lo mah ila. Khatiang deuh khan rilru kha a ipik ve ringawt mai a, tih thu kha a sawi. Chungte chu vawiinah hian ka rilruah a lo lang a. Khaw tam takah Sumo service an tawp, kawng a chhe lutuk a, an tlan thei hrih lo tihte kan hria a. Khang khua a chengho rilru tur te kha han ngaihtuah hian Aizawl kal tum lem lo pawh nisela, engemaw emergency-a kal lo tul ta se tih vel te leh eng emaw chhungte dam mawh

hritlanah kal tul ta thut se engtinngge ni ang tih han ngaihtuahna atang khan an rilru hi a hreawm hle ang tih hi ngaihtuahnaah a awm a.

Chuvangchuan, vawiinah hian House-a kan han sawiho a chak leh zuala hma lak te, kan pass thei hlah a nih chuan an ni tan pawh a thlamuanthlak ang a, an rilru te pawh kha chawp leh chilhin kawng kha a tha mai dawn chuang lo. Kan hre vek, zan khat thil thua tha thut thei a ni lo. Thla hnih khat chhunga han siam mam pur theih pawh a ni lo. Mahse, a hminga keini ram aiawha helaia rorel tura thu te'n an dinhmun kan hriatthiam pui a, an rilru ipik dan te pawh hriatthiam pui in hmalak te kan tum a, lungrual takin kan pass angin han thang se chuan anni tan pawh dam sawng sawng na a niin ka ring a. Chuvang chuan he resolution hi ka'n move a ni a. Hei, Mizo te chu kan hriat angin, harsatna tawh chang pawh a in thlamuan tel tel, in lenpui a, in tawng thlamuan a han ti chi kan ni a. Damlo na deuh pawh kan han tlawh a, a kha i tha khawp alawm, kan han in tih hian a thlamuanthlak a ni.

Khatiang deuh hlek khan he ka Resolution hi, nichina kan sawi ang khan kan uluk a, han pass ta ila, Zoram mipui tam tak tan hian a ngaihthlak a nuam em em ang a. Sawi tak ang khan, zan khat thil thu ah chuan a tha mai kher lovang kawng te. Amaherawhchu, kha rilru kan han share tlan atang ringawt pawh khan awmzia a nei ang a tih kha ngaihtuah dan a awm a.

Tin, ka'n sawi leh duh chu - hman deuh hlek 2013 khan, ka'n ti lawk ang a, khulai Kawnpui (SPEAKER : I sawi laklawh laiin kan han inthlak lawk ange) (DEPUTY SPEAKER : Sawi chhonzawm rawh le). Pu Deputy Speaker, ka lawm e. 2013 khan kan la hre vek anga, helai House a kan la thut ve hma thil kha a nia. Buichali leh Kawnpui inkar kawng velah kan buai em em a, motor te a intlan chhawk a, motor tam tak a tang tih kha kan hria a. Tah khan, hei House ah te kan han awm ve a, Committee ah te kan han tel ve hian Estimates Committee Chairman, Pu Lalrinliana Sailo ho hian, kha thu kha ngaihtuahna ah a lo awm nghal vat a, 2014 May thla khan helai kawng i zuk ngaihven vat ang u, nikum lama kan buai em em na a nih kha tiin Estimates Committee in kan zuk tlawh a, Buichali – Kawnpui National Highway khu. Khatih lai khan eng eng emaw chu an lo ti tawh a, tih that tawk loh te pawh an nei a. Kan zuk kal a, Committee angin kan han kal a, Officer te an lo tel a, an hnathawh te kan han en thwak thwak khan. Khang te pawh kha kan sawi kai duh nachhan chu, khatia han tlawh khan beisei aiin a response kha a tha a, nikum chung zawng kha chuan khulai kawngah kha chuan kan buai ta lova. Kumin kum tir khan kan zuk tlawh leh a, chungah te chuan kei ka beisei ai mah hian hma an lo la tha a, a lawmawm, chu chu kan tlawh zar te pawh kha niin ka hria a. Estimates Committee in kan han tlawh a, MLA ten eng eng emaw te kan han ti a, khatiang a kan han tih khan a thawktute pawh an phur phah niin ka hria a, a enkawltute pawh an phur phah niin a hriat a. Tiang khan tha deuh mai khan an luikawr siam te

pawh kan han sawisel lai te pawh beisei aia tha in, kan Engineer te pawn hei sanction chu a awm lo na in kan han order ve pawp mai a. Tianga ti turin tih te an lo sawi a. Khang te kha a lawmawm khawp mai a, tiang chuan tunah pawh hian he Resolution hi he House zahawm tak hian pass ta ila. Zoram pumpui ah, hma la tu tan pawh a phur awm lehzuang a, tin, a tuartu tan te pawh rilru a dam deuh ang a. Tiang khan vawiinniah Pu Deputy Speaker, lungruual taka pass turin ka rawn move a, member zawng zawng te pawh min pass pui turin ka rawn sawm che u a ni, ka lawm e.

**DEPUTY SPEAKER** : Awle, Resolution neituin a rawn moved ta a, kan sawi ho dawn ang a, member tin te minute 5 inpe ila tawk kan ti mai em, tawk mai maw minute 5.

**Pu LALRUATKIMA** : Pu Deputy Speaker, tihdan phung kan nei a, minute 5 chu a chep deuh ang a, minute 10 ni se a va tha awm ve, ding meuhin ka'n rawt a ni.

\*Speech not corrected

**DEPUTY SPEAKER** : Tihdan phung tihah chuanin minute 5 pawh hi kan tihdan phung chu a ni tho a nia. Minute 10 pawh tihdan phung tho a nia, duh zawk zawk kha a ni mai a. Minute 10 rawt an awm a, an tlem bawka i pawm sak mai ang aw minute 10. Awle, minute 10 ti ila, tunge han sawi hmasa ang le. Aw, Pu K. Sangthuama.

**Pu K. SANGTHUAMA** : Pu Deputy Speaker, hei vawiina kan Resolution hi, sorkar nen opposition nen i tangruual tha ang u pawh ti sela, kan ram kawng chhia hi kan zavaia hriat a ni a. Sorkar va dem ngawr ngawr emaw, sorkar lam hi an thawk tha lo hrim hrim emaw tih lampang a kawka lem lova. Engpawhnisela, House ah hian rual takin in tang teh ang u, tichuan, kan kawng chhia hian ziaawm lam a pan chhoh theih nan, tih hi kan rilru ah awm se a that ka ring a. Nia, kawng hi kan hre theuh a, kan ram hi tlang ram te a ni a, duh ang zan hian a tha lova, a har khawp mai a. A enkawltu nih pawh hi a buaithlak hle ang tih hi kan hriatpui a. Tin, Contractor te tan pawh harsatna tam tak a lo awm ve thei a, kawng laih te, building sak te hi sorkar hnuaiah hian rei tak lo thawk ve tawh te ka ni a. Chuvangin, hetia kan sawi ang leh rilru a kan ngaihtuah ang duak duak hi chuan thil hi a harsa duh a.

Chuvangin, kan kawng hi chak zawk deuh hlek a hmalak dan a awm lawm ni. Engpawhnisela, sum leh pai harsat dan te chu kan hre tlang a, chuti chung chung chuan kan kawng harsat danah hian theihtawp chhuah tlang ta ila, ziaawm lam kan pan thei ang em tih hi vawiina kan Resolution hian a tum ber a ni a. Chuvangin, a chin chhuakin emaw, a kawng, chulai leh chulai kar emaw, chumi leh chumi inkar ti ang zawng chuan sawi hleih theih pawh a ni lova.

Hei, kan National Highway neih ang pawh hi Bagha atanga Tuipang thleng-a kan Highway neih ang chi pawh hi kan ram hian kan chaw lakna kawng ber te a lo ni a. Hetah hian keini PWD tena kan thawh ni chiah lo mahsela, tang tlang zawk a, National Highway hotute hnena theihtawp chhuah tura tan kan lak tam hi a ngai viau a. Mizoram in National Highway kan enkawl ve na tura kan percent lak hi a tam tehchiam lova, chuti chung chung chuan kan PWD te pawh hian theihtawp chuan tan an la a. Amaherawhchu, tunai hian PWD hotute pawh hian tan han la leh deuh hlek sela, tih hi vawiinah hian ka'n sawi duh a. Tan lak leh lak loh hi chu kar a hla khawp mai a, hna reng reng leh thiltih reng reng hi, engnge ni a nem a lak a zuk tih ve mai mai hi chuan a tih theih mai a, kan kal a kum chu a ral ve mai thin a ni. Hei, chhungkua ah pawh a ni a, taima taka hna kan thawh chuan kan thawh chhun ang ang ah khan hlawhtlinna kan hmu thin a, a tam emaw, a tlem emaw. Chutiang chiah chuan kan PWD hotute pawh hi hei Engineer te kan ngah a, Mizoram pumpui ah tunah phei chuan tam tak kan nei tawh a. Tunhma chuan C.E. pakhat ten min ho a ni mai a, tunah chuan pahnih, pathum kan nei a, chumi chungah Engineer-in-Chief te kan nei a, chutiang chuan department ah pawh kan indaih tawh khawp mai a. Chuvang chuan PWD hian tan han la deuh hlek selangin.

A thu mai nilova, a hmun a kal a, a practical a tih a, en kha a tulin ka hre tak tak a. Thil tih reng reng hi taima taka tih a, a hmunah te kal a, enge ni an progress, eng nge ni an kalphung, enge ni a awmzia tih ngaihtuahna nena tih chuan Contractor te pawh hian tan an lo la ve a. Entirman 1978, 1979, 1980 vel kha Contractor kan nih lai a ni ve a, chunglai chuan hna hi kan ngah thei hle a. Saiha ah te, khawthlangah te, Lunglei ah te leh hmung dang dangah kan inbun a. U.T. hunlai kha a ni a, chutah pawh chuan Principal Engineer kan ti a, hei helaia sam buk deuh mai, Pu Karna-a nge nita khan hna te arawn endik a, Saiha ah kawng te, building te, Tawngkawlawng road te, Bualpui road te, hna kha kan lo ngah ve lai tak a ni a. A endik na ah khan ka lo awm a, Lungleiah hna arawn endik a, ka lo awm leh a. Tichuan, ka tlanphei leh vang vang a khawthlangah Boulder phah hna kan nei a, ka lo awm leh a. “ Hepa hi ka kalna apiangah i lo awm mai a, engtizia nge ni ? Hna i va ngah awm ve?” min ti a. “ Ka pu hei sawrkar in min duhsak a, hna kan nei ve nial a. I lo kal laia lo awm zel hi ka duh a ni” ka ti a. Bill an pe tawh che em? a ti nghe nghe a. Ka pu, la pe lo, ka ti a. “Hei Sangthuama hi, vawiin atang hian a bill siamsak ula, a thawh tawh zawng zawng, a boulder dah tawh zawng zawng hi a rang thei ang berin pe rawh u. Hna nasa takin a thawk a, engatinge tiang chen chen hi Bill in pek loh?” a ti a, bill chu min pe ta thuai a.

Chumi kan sawi duh chhan chu, hnathawktute pawh in, tin, a viltu te pawhin taima taka kan thawh phawt chuan hlawhtlinna a awm a, Contractor te pawh hi kan inthlahdah loh a, sawrkar pui thei kan ni tih hi kan hriat reng a tha a. Contractor tam tak kan nei a, tunlaia kan Contractor te hi tlem chuan kan inthlahdah ve deuh a ni. Kan sawi fo thin a, sum a awm lo kan ti a, kan neih ang tawk te te in kan thawk a, kan thawk ang a, kan neih bak chu sawrkar ah kan dil leh ang a. Sawrkar hian englaipawhin Contract work ah sum a nei reng bik lo a, chulai lo tawrh ve chu



kan peih tur a ni a, peih hauh lo tam tak hi chu kan awm thin a. Contractor-te pawisa a awm loh a tawp mai ta hi kan tam em em a ni. Kan eizawna a nih chuan taima tak a hna kan thawh a ngai a ni Contractor te pawh hian. Chumi ti tur erawh chuan engineer te hi an pawimawh em em a, a sang lam PWD Minister chu sawi loh a lum ni ta se an pawimawh em em a.

Chutihruah chuan Department a kan hotute hian kawng chung changah hian theihtawp waviin ai hian a la chhuah theihin ka hria. Office atanga en tawp mai ang chi hi chu ching tawh lo ila, a hmunah te kal ila, tiang chuan khawilai kawng hi nge tha lo a, khawilai hi nge tlem deuh a han siam a tha thei mai te, leimin leh lei diak te a awm a, kal ta ila, han ti ta ila tih te hi a awm mang lo reng reng tunah hian ka hmuh danin. Chuvang chuan kan ram kawng chhiat chungchangah pawh hian a mawhphurtu ber chu sawrkar a ni lo thei lo a, chuti chung chuan a thawktute hian tun aia taima zawk leh tun aia tha zawk hian hna thawk ta sela, tichuan kan rama kawng chhia nasa tak a hi tun ai hian hmasawna kan nei theiin ka ring a. Engpawhnisela, kan rilru a awm a ka duh chu, kan National Highway tal a hi chu tun aia ngawrh leh zual hian thawh theihna kawng dap ta ila. Tin, khawtin chhun tur ang chi pheih hi chu a har ang reng khawp mai a. Mahse, chungte pawh chu bial tinah S.D.O te, E.E te an awm a, heng hian ngaipawimawh tawk se chuan waviin ang em em lo deuh hi chuan kan kal thei in ka ring a. Chuvang chuan kan House Leader zahawm tak PWD changtu hian hemi PWD lama kan hotute hi instruction tha tawk hi han pe leh deuh hlek se la. Kan zavai hian tangruah ila, tichuan kawng lamah hi chuan tun ang em em lo deuh hian hmasawna kan hmu mai awm mang e aw ka ti a. Chu chu waviinah hian tawite in ka sawi ve duh a ni e.

**DEPUTY SPEAKER** : A lawmawm e. Tunge han sawi ve leh ang le? Sawi duh kan awm tawh lo em ni? A moved-tu khan a moved chiang a, tun ah an rawn support bawk a. Sawi duh kan awm tawh lo maw?

Minister incharge, kan House Leader ni bawk kan lo sawm ang. Ka hawi ka hawi kual a, in phar bawk si lo a. Er.Lalrinawma i lo sawm ang.

**Er. LALRINAWMA** : Pu Deputy Speaker, ka lawm e.

Hei waviin ah kan Opposition group leader in resolution tha tak mai a rawn moved a, ram in a mamawh tak niin ka hria. A chhan chu kan hre theuh a, duh vang reng pawh a ni bikin ka ring lo a. Kumin chu khua in a zir loh vang nge ni kawng chhiatna in min nuai nasa em em mai hi a ram mipuite kan buai ni in a hriat a. Whatsapp lamah nen, Facebook lamah nen, T.V ah nen, Chanchinbu ah nen, a khaw nawt in kan buai a ni ringawt mai a. Chuvang chuan he resolution a lo awm hi a tha khawpin ka hria a. Keimahni pawhin kan in enlet nan te, tan kan lak nan te a tha ah ngai ila, a lawmawm hle in ka ring a ni. Tin, chak leh zual zawka hmalak ni rawh se tih a ni a, hma kan la a, chak leh zual zawkin kan in phut a ni mai a a resolution hian. Chutihruah chuan tu chin hi nge a phut a tih chu a sawi lo a, sawrkar hi kan han tehkhawng deuh ber tlangpui a, chutihruah

chuan mipuite pawhin mawhphurhna thui tak kan nei a ni tih kan hriat kha a pawimawhin ka hria a ni.

Tun hunah hian eng ang chiahin nge? Khawi atangin nge tan kan lak ang? tih hi kan chian a tha in ka hria a. Point te te in han sawi tum ta ila.

Sawrkar angin han ti ta phawt ila, sawrkar ah pawh hotu lu kan ti dawn nge ni. Hei Project kan han siam lai hian hna kan thawhtur reng reng te hna tan dawn ah engemaw thildang a lo thleng leh thin a ni. Chuvang chuan site clearance felfai tak te vawiin ni hian project concern thilah neih hi a tha in ka hria , a chhan chu hna kan han thawk dawn a, Contractor hnenah hna kan pe a, a nin chutiang khatiangin ti in hmun thenkhatah te pawh Forest clearance tih te emaw, thildang LSC a buai, chutiang khatiang ram inchuhte a lo awm thin avangin kan fimkhur a ngai a, hun lo kal tha zel turah vawiin a kan dinhmun aia kal leh zual tur chuanDPR kan siam laiin hna kan va thawhna hmun turah khan site clearance hi a felfai em tih kha kan in en tur a ni tih kha ka ngaihtuahna ah a awm a. Chuvang chuan vawiin a kan tih hi a tha viau e, hei ai hian hmasawn leh zual turin nasa leh zual zawkin DPR siamtu te zawng zawng pawhin kan kutthlakna tur hmunah hian in kan hnathawhna hmun tur hi a felfai a, ram a buai lova, clearance pawh a tel a, engmah hi buaina a awm lo a ni tih lai hi ti chiang thei zel ta i la. Contractor hnena hna kan pek tawh hnuah buaina a awm lo ang tih hi ka sawi duh a ni.

A dawt leh atan chuan Finance chungchangah Thirteenth Finance Commission pawh hian Roads & Bridges ah hian Nuai 8900 a rawn recommend a, taima takin an ti a, a awm ang ang kan la chhuak vek a ni. PWD pawh an fakawm khawpin ka hria. Chutihlai chuan Fourteenth Finance Commission ah pawisa a bika a rawn pek tak si loh ah chuan kan buai mai awm mange aw ka ti a. Chuvang chuan kan Finance Minister zahawm tak te pawh in a rilru ah kum 5 lo kal leh turah hian in deficit grant-ah te, devolution of tax ah te pawisa hlawm tam tak min pek avangin hei hi priority ah dah ila, tichuan kawng tha hi kan nei thei ang tih hi ka beisei deuh baw a. Chuti a nih loh a, kumin ah Fourteenth Finance Commission report ah recommend awm tawh baw si lo ah hian kan untie fund hi kan hmanng tangkai lo a nih chuan kan buaina hi a kiang chuangin ka ring lo a. Chuvang chuan kan sawrkar hotu, kan sum leh pai vawngtu te pawhin he lamah hian sum kha han theh chhuak leh zual deuh thei se, an theh chhuah tawhna ah lawmthu sawi chungin ka han ngen leh baw a ni tih kha vawiin hian ka sawi duh leh baw a.

Tin, Road Fund Board kan nei a, a dawt leh ah chuan, kan Road Fund Board te hian eng chin nge hna an thawh tih hi vawiin hian an in en let a ngai ani. Road Fund Board chuan Rules leh Act felfai tak kan nei a, hnathawh theihna mai kan nei tawh a, Committee pawh kan din fel vek tawh a ni. Inthlahrung lutuk lo ila, entinan Diesel Cess te leh khatiang han tih awm chi ang hrang hrang kan hre vek zawkin ka ring. Khang zawng zawngah khan tuna hma kan lak lohna ah hian hma la ta ila. Tichuan thil thar kan ngaihtuah chhuak anga, Cess hrang hrangte pawh ngaihtuah chhuakin, transport related tax ho ang chi zawng zawng te pawh hi tun aia uar leh zualin bei ta ila.

Chumi atanga pawisa lo tlingkhawm kan lo neih a, kawng tha mipuite hi kan hlui thei anih chuan helaia kan chhiah pek lam emaw kan tih lam emaw kha chu Pu Deputy Speaker, an phunnawi vak ka ring lo a ni. Chuvang chuan, kan Road Fund Board te pawh hetah Road Fund Rules te, Road Fund Act te fel fai takin sorkar in a nei tawh a. Chulaiah chuan hei Mizoram Road Fund Rules 2010 pawh fel fai tak kan nei tawh a ni. Chuvang chuan, hemi hmang hian hna thawh chhoh tum ilang, chuti anih loh a sum hnar a awm loh chuan hna hi a thawh theih tak tak loh a ni. Chuvangin, khawvel a kan awm chhung chuan sum hi a ki pui ber pakhat a ni a, hnathawhna atan chuan leilung thilah chuan tih kha kan sawi duh a. Chuvangin kan Road Fund Board te pawhin kan kal tawh danah te in enlet in theihpatawpin he Rules leh Act in a lo phal ang hian hna thawh i tum ang u tih kha kan sawi leh duh baw k a ni.

Tin, a dawt leh atan chuan, technical strength chungchangah hian vawiin nia hna a harsatna tam tak kan tawh chhan hi technical ah department atanga vil tuten an vil hneh loh vang a ni mai lo maw? tih hi ka ngaihtuah a. Tun hunah hian nimin a budget document min pekah khan JE post hi PWD ah hian post 80 vacant post a awm a. Chung zinga post 30 hi road and bridge post a ni. Chuvang chuan, JE 1-in hna hrang hrang a enkawl a, contractor te hi a tlangpui thu ah ven ngai ti mai ila, enpui ngai kan ni nasa em em a. Chuvang chuan, JE 1-in hna a vil tam lutuk a, hei hian hna hi nasa takin a ti thuan thu a ni. Chuvang chuan, heng a an post ruak te pawh hi hnawhkhah dan awm selangin, tun hun ah hian JE pawhin vawiin nia hna 4/5 a enkawl hi ti lovin, hneh taka a kal theih chuan contractor performance pawh hi a kang ngei ang tih hi vawiin niah hian kan beisei baw k a ni. Chuvang chuan, tun hunah vawiin nia an post engemaw zat ruak hi an pension zel a, kan lak belh hlei thei si lo a. Lehlamah kan enkawl hneh loh na avangin mipui ah a rah a lo tla a, kha rah chhia avang khan vawiin niah mipui dem kan hlawh ta a ni. Chuvang chuan, heng an post vawiin nia awl tam tak hi tihsak tum ta ila, hei MCS te pawh an tha a, kumtin mai kan ti thei tho a, kan ngaihtuah zawng lamah chuan. Chuvang chuan, heng lamah te hian kan rilru pe ta ila, work a ni a, mipui nghawng a ni a. Heng kawng khawih tute phei chu hei kawng kama in nei apiang hi a ualau kan ti a. Kawngpui chhia ngat phei chu a ualau ania, mi zawng zawng kalna mi zawng zawng hmuhna anih avangin a pawimawh leh zual a ni. Chuvang chuan, heng site a thawk tur technical ah te hian kan thuan chak hi a ngai tak meuh meuh a ni tih hria ila tih kha kan sawi duh a ni. (DEPUTY SPEAKER : warning, warning)

Tin, chu mai piah lamah chuan kan hnathawh chungchangah hian sawi kan duh baw k a. Hei kan House Leader zahawm takin rampawn atangin an hna pawh hmu lovin chutiang khatiingin hna an rawn thawk tiin House min hrilh nghe nghe a. Amaherawh chu, helaiah hian tender-ah reng reng hian Condition of Contract a awm vek a ni. Chutah chuan Site Investigation Report hi pek ngei ngei a ngai a ni. Kan contractor ten site investigation report tel lova tender an lo chhang a nih kha chuan action kan la turah ka ngai a, kei chuan. A chhan chu, site a hria ang a, khawi bungrua in nge, kha a hnathawhna hmun atanga balu, rora engtia hla a awm nge, khawiah nge alkatra a awm tih pawh a hre fai vek tur a ni. Tin, labour chungchangah engzatnge labour a chhawr dawn he ramah hian an awm em? khawi atanga lak tur hnaivai nge Karimganj ah nge,

Bihari a rawn hruai dawn tih zawng zawngte pawh a hre fai vek tur a ni contractor-in. Chung zawng zawng site investigation report, site visit certificate kha a thu mai ni lo in, kan technical hotute hian heng bidder te pawh hi ko in heng site visit certificate an pek thin a hi chianguang takin zawt chiang rawh se, entirnan, tu emaw chuan khithah Zokhawthar lam ah kawng a chhang a, a zawt a khawngge rora a lak dawn? Khawngge balu alak dawn? Kha a work atana material component ngai zawng zawng lakna tur kha bidder in a hrechiang em em tur a ni. Chuti nilo a khuta tanga ral atanga rawn chhang a, e-tendering a lo ni deuh tlangpui tawh a. Khangah te pawh khan engmah hre lo a a lo ti anih kha chuan in thil fello tak a ni. A rah mipuiten kan tuar a; chuvangin, Pu Deputy Speaker, heng te pawh hi chak lehzual a kan en a ngai a ni tih hi ka sawi duh a ni wawiinah hian. Chutianga site a hriat chian a, rate tur nen lam, engtingge rate a chhan sual ang aw kan ti a.

Ka bial chhung pakhat sawi ta ila Chhawrtui-Rullam ah khianin tender pakhat a awm a ni, kan vanduai em em mai a, kan buai lutuk kan zawh kan zawh chuan, contractor in a rate a chhang sual an ti! Kha te kha thilmak a ni contractor chuan a engineer te nen chianguang taka enfel in, a rate kha an analyse tur a ni. Chuan khami atang khan kha rate khan a chhanna rate kha a thawk thei dawn em tih pawh a in enchiang tur a ni. Hun a lo kal leh tawh hnu ah kan buai leh thin si avangin kan enchian a ngai a ni tih kha kan sawi leh duh a. Chumai piah lamah contractor te pawhin kan hna ah hian kan chian a ngai a ni. Site pakhat kan tlawh a, a hming chu ka sawi lo ang a, kan va kal a, khawngge in work programme kan ti a MLA rual kan va kal a. Tichuan in, an work programme chu pakhatmah site ah alo awm lo! Hmuh pawh hmuh tur a lo awm lo! Kan zawt leh deuh kan han ko a, file atangin an haichhuak anih chu mawle work programme a kha! Tichuan, work programme te, file a dah chi pawh a ni lova, a thawh a thawhna hmun tur contractor in he hna hi chuti zat a thawk ang a, he item hi ka thawk ang a tihna tur hmun anih laiin file-ah kan zep a (DEPUTY SPEAKER : I hun i hmang zo a nia) Pu Deputy Speaker, tlem....min phalsak tlem si a. Hei, ka sawirei lo ang, ka dang a nal ang reng a, ka sawi zawr zawr a nia. Chuvang chuan, contractor a work programme pawh hre lo an awm thei a, a then te phei chu bidding document tihkim nan a awmzia hre chiang loin an thehlut ringawt a ni. Ma'rawhchu, work programme ang te, kan hriatthiam si loh laiin kha work programme base a hnathawk tur kan ni si a ni. Chu chu contractor in a chiang lo thin a ni, a tlangpui thu ah. Chuvangin, hei hi kan inhrilh chian a ngai a. Technical person te pawn chu chu an hrilh chian a ngai a ni. Tin, department a a viltu SDO leh JE te pawhin an kal apiang in work programme an en ang a, hei engchin nge hna i thawh, enge i tih, tih kha an en tur a ni. Tunah chuan, dah mawi emaw kan tia file karah kan zep a, hei hi a dik lo reng reng a ni. Bang ah lian tawh in an display tur a ni, tih chu kan sawi duh a. Chumi hmang chuan contractor in hna a um ang a, wawiin ni hian, tunkar chhung hian engzat nge hna ka thawh dawn? tih a en atangin a thlaleh engzatnge tih a ruahman vek tur a ni tih kha kan sawi duh a, chuti anih loh chuan hna a muang ang a chu chuan min nghawng dawn a ni.

A dang leh atan chuan Pu Deputy Speaker, Financial chungchang ah hian khang work programme zawng zawng te kha lo duangin heti zat hi hna an thawk ti bawh thin mah ila a nihna takah chuan bill kan siam sak a, LOC a awm lo kan ti a, pawisa a awm lo kan ti a, keimahni

ngei pawhin kan bill te kan pek theih thin si loh avangin hna chu a lo delay leh ta a ni. A lo delay leh si chuan in site a thawk ten hindrance register anrawn siam a, technically reasonable an ti a, tichuan time extension an siam sak a reilote ah pawisa tam tak kan chawi leh thin a ni.

Chuvangin, kan work kan lak reng reng in Pu Deputy Speaker vawiih hian kan sawi duh laia chu lak dum hi a fel angem tih hi ngaihtuah tham a ni. Kan lak chin hi chu hneh takin sum leh paiah hian vur i tum ang u tih hi ka sawi duh a ni. Central PWD hnuaiyah kum engemaw zat contractor zingah ka khawsa ve a, tah chuan in, hna reng reng bill kan siam hian, pawisa awm loh a awm ngai lo tih theih a ni. Englaipawhin LOC a awm reng a ni. Hna thawh tam leh tam loh kha chu a contractor mawh a ni thung zawk ta a ni. Chuvang chuan, keini chu vawiih hian hna chak taka thawh tum pawh ni ila, pawisa awm loh thinna avangin a delay in, chu chuan price escalation siam in, price escalation siam lah contractor te nuam tihzawng tak a lo ni bawk si a, tichuan, pawisa tam tak kha a lo chhuak leh thin a ni. Chuvangin, kan hna lak reng rengah hian finance pawh hi hneh takin tih i tum ang u tih kha kan sawi duh bawk a. (DEPUTY SPEAKER : A lawmawm e.)

Tlemte minute 1 chiah, contractor te hian an hnathawhna ah hian site Engineer an nei tura ngaih an ni a. Hna tam tak kan thawk rei, vawiih hian kan ram in practice tha lo tak mai kan nei a ni. A sawi pawh hi a nuam vak lo, contractor tak takin thawk si lo in, a aia thawh tir hi kan uar lutuk a. A tu te pawh hi kan ni vek a, hei hi a pawina chu hna hre mang lo ten hna kan thawh thin avangin hna in a tuar thin a ni. Hetiang kan ti lo thei lo anih pawhin site engineer fel tak hi neih tur a ni tih hi kan phut turah ka ngai a ni. Chutichuan, employment generation engineer tam tak hna hmu lote hian hna an hmuh phah dawn bawk a. Chu mai piah lamah pawh a hna hresa engineer ten an lo vil a, an lo tih char char chuan hna kha a sawt ngei ngei ang tih kha a rin theih ta a ni. Chuvangin, site engineer chungchangah pawh hian department te pawh hi strict se tuna kan tih bakah kal na lehzuol se kan duh bawk a ni. Chu mai piah lamah kan kawng chhiahna tam tak hi quality control a ni vawiih hian.

Tunah hian thil thar tam tak cell filled concrete kan ti, liquid polymer kan ti, RBI&Y kan ti, heng zawng zawng te hi vawiih pawh kan hre vek, Hrangturzo bialah chuan a fail thak a ni pakhat chu. Hei hi eng vang nge a chhan? Thil thar a ni a, research and development technology a ni, tun hunah hian. Chu chu Pu Deputy Speaker, hmun dangah an hlawhtling si a, engatinge vawiih an hlawhchham tih hi chu a bul tak chu quality control ani ngei ngei ang tih hi ka ring tlat a ni vawiih hian. Chuvang chuan, kan contractor zawng zawng te pawh hian he agreement copy in a phut ang hian laboratory tha tawk tak an nei tur a ni, chu chu department pawhin tiin, a ministry thleng pawhin a zu nawr turah ka ngai a ni. Heng thil dik lo kan inngaihnhiam tam lutuk hian hna hi min hlen tir thei lo a ni. Chuvang chuan, heng technical reason hrang hrangah hian hmasawna tur, hmalakna tur tam tak kan nei a, a point te te kan hriat loh kha chuan Pu Deputy Speaker, thil kha a buaithlak thei deuhin kan hre deuh a. Chuvang chuan, khalai kha (DEPUTY SPEAKER : Minute 15 i hmang tawh a, kan in ngaihnhiam thui ta hle mai) ka sawi kha a pawimawh riaua ka hriat avangin hei nichinah pawh kan inphut kan inphut a, hun kha a tam deuha

ka hriat avangin a ni a, khalai kha pawimawh tam tak karah karawn zep deuh zung zung anih chu. Pu Deputy Speaker, ka lawm e.

**DEPUTY SPEAKER** : A dik lo in kan inngaihnathiam teuh mai a minute nga lai mai. Tunge han sawi ve leh ang le? Awm tawh lem lo maw? A nih chuan nichin khan a move-tuin a move fiah bawk a, sawi tur kan awm loh chuan...Awle, Dr. K. Beichhua.

**Dr. K. BEICHHUA** : Lehlan atang hian Pu Deputy Speaker, a chan hian min chang thup amaw tih tur hian i dinglam te hi an mengkur mai si a, kan sawi loh chuan engtingge an tih dawn tih hi keini in kan hre si lova, a hlauhthawnawm angreng si a, chuvang chuan ka'n sawi ve zawk ang e.

Kawng chanchin pheichu sawi vak pawh ka tum tawh lova, ka sawi hnem tawh a, mahse hei kan member zahawm takin resolution tha tak arawn pulut a. Nikum lam November ni 21 ah khan he resolution hi ka lo pu lut tawh a, khatah khan member tam takin kawng chu a tha e in ti vek a, North-East-ah a tha ber ti te pawh kan awm a. Tin, kan bridge ah te pawh khan air-condition kan fit ngat loh chuan hei aiin a tha thei lo ti te pawh kha kan hre theuh ang a. Vawiin ah erawh chuan tun ang dinhmunah hian kan awm ta a. Hei hi kan sawi tawh ang khan mimal tumah kan inpuh lova, nangniin in tichhia, keiniin kan tichhia kan ti love tih te pawh kha a hma khan ka sawi nasa a. Khatah khan resolution kha hnawlin a awm tawh a ni, pawika ti hle a. Vawiinah helaiah resolution-a arawn lut leh hi tha ka ti a, chulai ah chuan kan hriat tur chu vawiin a resolution rawn lutah hian 'chhia' tih chauhin arawn lut a ni. November-ah kha chuan 'chhe ta lutuk' tih kha a ni a, 'chhia', 'chhe zawk', 'chhe tak', 'chhe ta lutuk' tih te kha a word kha kan thliar hran thiam a tha in ka hria a. Vawiin kan resolution hi chu a nem hle a ni, beram tawngkam ni awm tak a ni tih kha karawn sawi duh bawk a.

Vawiin a kan ram dinhmun hi ngaihtuah ta ila, vawiin ah pawh Lawngtlai ah chuan Total Bandh an nei a, motor chhuak tur leh lut tur an block vek a. Hmanni lawkah pawh party ang te pawn kawng zawhna kan nei a, heng te hi a mimal leh tu te emaw sawichhiat duh vang ni lovin he thil min tih tir tu hi chu kan kawng chhia hi a ni tih kha ka sawi duh a ni.

House Leader in hmanni khan a sawi a, Hrangchalkawn leh Lawngtlai kawng saw 'Kawng vanduaithlak' a ti a. Vawiin a ka rilru a awm chu Mizoram kawng te hi 'kawng vanduaithlak' ka ti ve leh thung a ni. Chutiang chuan kan Zoram kawng dinhmun hi vanduaithlak takin vawiin ah chuan mipuiin harsatna nasa takin kan tawk ta a. Chutih laiin keinin enge kan tih tur kan tih chuan vawiin a kan thawh chin hi in thawk lo ve in tihna ni lovin, tun ang dinhmun aia chak zawk hian engatinge hma kan lak loh, hma i la teh ang u ti a rawtna a ni. Chuvang chuan hemi resolution hi pawm loh na tur a awmin ka hre lova, kei chuan ka pawm hliah hliah a ni, chuvang chuan member dang te pawh khan pawm ve hliah hliah turin ka sawm che u a ni.

Vanduaithlakna em em chu fur ah hna kan thawk thei lova, season pahnih kan nei a ni Mizoram ah hian. Fur ania khawchhiat vangin kan thawk thei lova, October a tawp anga khua a tha leh mai dawn a. Kumkhatah hmun thum a then a hmun hnih hi chu khua a tha a ni, hmun khat hi khua a chhia a. Thal leh fur bak hi season kan nei bawk si lova. Thal ah contractor te thuawih loh avangin hna a thawh theih bawk si lova, fur ah lah ruahsur vangin hna kan thawk thei bawk si lova. Chuti anih chuan theih chu ni se season dang hi siam ka chak a ni hnathawh nan. Chuvang chuan vawiin ah hian kan hotute te, helai member zahawm tak tak te kan in bihchian hle a tha in ka hria a. Vawiin ah a chhiatna chhan leh vang chu sawi a ngai lova kan hre vek a, in thawk lo ve tih a kan in mawhpurna a ni hran lova, kha kan engineer ngeiin nasa takin a rawn sawi tawh a. Vawiin a kan rilru a awm tura ka duh chu, a chhan kha chu thil engpawhnise, a siamthat a awm lo, politician tan chuan thil la awm lo awmtir tum hi kan tih tur a niin ka hria a. Vawiin a thil awm tawh, a chhe lai han thawm that a han siamthat leh vawiin aia chak zawka hma kan lak hi chu kan tih tur ngawih ngawih a ni lawm ni tih kha ka rilruah a awm a. Chuvang chuan vawiin ah hian he resolution hi i dinglam a thu te pawh hian an pawm vek ka ring a, kan kawng hi a tha ti ila chuan dawt sawi kan ni dawn a ni. Chuvang chuan kan kawng tha lo chu a hretu vek kan ni a, tun aia chak leh zual hian hma i la teh ang u ti a nem te a rawtna rawn siam kha ka pawm a, member zawng zawngin pawmpui turin vawiin ah hian ka sawm duh che u a ni. Pu Deputy Speaker, ka lawm e.

**DEPUTY SPEAKER** : Hun i hmang thiam e. Tunge han sawi veleh ang? Pu T.T. Zothansanga.

**Pu T.T. ZOTHANSANGA** : Pu Deputy Speaker, tawite in sawi duh ka nei a. Hmanni khan kan opposition hotute khan sawlaiah sawn kawng an zawh a, an thusawiah khan tlem a han thual deuh chak deuh riau chu ka nei a. Amaherawhchu thui kan kal lem lo ang a.

Hei PMGSY tunhma atanga kan lo tihdan hi tawite han sawilan ka duh a. India ramah Manmohan Singh hun hma atang khan 2000 December 25 atang khan PMGSY hi tih chhuah tan a ni a. Tichuan India rama khaw 825,000 ah khan khaw 370,000 kha la tlawh pawh loh a awm a, chung zingah chuan Mizoram khua 363 kha tlawh pawh tura tih a ni a. Chutah chuan vanneihthlak takin PMGSY turin Mizoram bikah an han select hmasakah khaw 248 a ni a. 2000 leh 2005 inkar chhung khan Mizoram bikah khaw 73 an han target a, khami atan khan vaibelchhe 210 kan dawng a ni.

Chuta kan sawi duh zawk ta chu Pu Deputy Speaker, kan rama kawng tha tak kan neih theihna tur a Central in duhsak taka min rawn pek lai khan kan lo pawngsual nasa lutuk kha a pawl khawpin ka hria, pawngsual tak tak khan kan pawngsual a ni. Kawng 71, Kms 1032 siamna tur khan vaibelchhe 210 pek kan ni a, chutah chuan kawng 47 zo angin an zu in report a. Amaherawhchu, a tak takah chuan khaw 17 chiah kha 2000 leh 2005 inkarah khan tlawhpawhin a awm a ni. Hei MUP Tlangau June thla, 2006 chhuak phei kha chuan heti hian a ziak a, Pu Deputy Speaker i phalna in, 'Khawkar kawng hlui 64 zet chu kawngthar reh chawp anga laih zawh tawh

angin chhuah a ni' arawn ti a ni. Chuti anih chuan kawngthar laihna tur si kha a hlui kha an thual an thual tihna kha a lo ni a, khangte khan tuna kan kawngchhia te pawh hi nasa takin a hril em? Kan hun khatianga an lo tih chingpen nasat lutuk avang khan ngai kan awh hleitheih tawh lo a ni lo maw tih kha ka ngaihtuahnaah arawn awm a ni.

Pu Deputy Speaker, hei kan opposition hotute khan in hriat duh takin, 31<sup>st</sup> March, 2005, CAG Report ah khan chiang takin a in tarlang vek a, "Engati kher kher nge MNF ah ka lo awm aw" in tih hial ka ring a ni. A report han en han en ula, helaiah hian a turu lutuk a, sum awmdan kalhmang hi a dik lo nasa lutuk a, hemi CAG hi chhiar tawh ni ula chuan, CAG hi refer ngam tur in ni lo reng reng. Ka rilrua a awm dan takah phei chuan hemi resolution in han tarchhuahah pawh hian, in hotute hi in rawn em aw! tih ka ngaihtuah a, rawn chu nisela kawng lam chungchangah na na na hi chuan ti lo hram turin an rawn che u ka ring a ni. A chhan chu heta thu ve tawh lo te chungchang hi loh theih lohin an hming tak sawi silovin an hun lai kha kan sawi lo thei silova. Khalai kha a background kha a ni si a, a background a nih chhohna laiah khan tunah hian an awmna hmunah hian an lo kimki ang nge kimki lo ang pawh hi kan hre lo a ni. Chuvangin helai hi lo chhiar hram turin ka duh che u a, March 2005 tawp ami, helaiah PMGSY a dik lo a an hmanna zawng zawng rawn in tarlanna ang chi te kha in haw hunah lo chik ngun turin ka request che u a.

Heta arawn ziah naah te phei chuan Pu Deputy Speaker i phalna in 'execution of seven roads work which did not connect any inhabitation resulted in irregular, injudicious utilization of fund ₹ 16.64 crores' arawn ti tawp mai a ni. Khaw 7 a tlawhna ni a an sawiah si khanin vaibelchhe 16.64 zet mai kha an hmangral a ni a, khatiang kha a lo dik silova, a thui khawp mai a, helai portion hi chu Durtlang khamchho an chhuan hle te phei kha chu han sawi ila chuan wawiinah hian ngaihnawm tham a awm a ni.

Chuvangin wawiina kan kawng chhia tam tak te hi kan bul tan dan kha a lo dik lo a ni. Hei kan Minister leh kan hruaitu hlui ni thin Pu J. Lalsangzuala(L) khanin kum 1998 inthlan dawn a a thil sawi ka hre reng a, ani khan "Kum zabi tharah hian hei keini hian ruahmanna kan thawn lut hnem si a, kumtharah chuan pawisa hi a luanin a lo luanglut nasa dawn si a, chuvang chuan kan sorkar loh teh chuan a pawisa ang chu aw, kan sorkar loh chuan a uihawm dawn lutuk a ni" a ti a. Tichuan vanduaithlak takin Congress kan han tla a, MNF an han sorkar a, pawisa chu a lo luanglut ta ngei a, kan Chief Minister in a sawidan phei chuan 'malsawm period' ah kan awm a, 'bengmuk a liam zawih zawih hi a awm a, contractor pawh 20000 kan mamawh ang' a ti a ni.

Khatiang malsawm period a awm kha a ni lo zawngin kan lo suasam ta hi pawisa ka ti a. Hei helaiah hian arawn sawi nasa khawp mai a, Bank balance leh Book balance te kha a inmil thei ngai reng reng lo mai a, a buaithlak lutuk. Heta arawn sawi naah phei chuan khaw 17 chauh kha tlawh a ni a, 73 ni tur si ah khan 17 an ti hman a, a pawisa erawh chu an hmang deuh vek lawi si a ti a. Khangte kha a lungchhiatthlak a ni, tih sawi thain ka hria a, Mizoramah hian anihna takah



kan pawisa hi lo hmang thin chu ni ila tuna khaw tlawh pawh loh leh khaw chengker kan han tih BPO kan han tih ang zawng zawng hi a lo connect thei deuh vek tawh tur a ni.

A sum hmasa lo kal a dik lo a an lo hman nasat tak em avang hian a lo kal leh zel tura pawh hian harsatna a tawh thin a, endik kher kher hi a ngai fo mai a ni. Pu Deputy Speaker, helaiah phei hi chuan chanchinbuah a rawn tarlang a, “PMGSY hman dan sawifiah turin High Court in thupek a chhuah” chanchinbuah te pawh a rawn zia kulh kulh mai a ni. Nuai 803 an hmanna dik lo lutuk chungchangah te khan hetiang hian a rawn chhuah kha a ni a, tin, ‘proper planning a awm lo’ te a rawn ti a, hei pheh 51na ah hian proper planning a awm loh zia te kha a rawn zia a. Tin, Pu Deputy Speaker chu mai bakah ‘lack of competitive bidding’ te a rawn ti a. Hei Serchhip atanga tender 34-ah phei kha chuan a rate pawh kha an quote miah lo a ni, a rate quote miah lo te khan contract kha an inpe tawp tawp mai a ni. Khatiangte kha ani a, kan hun kal hmasa te a, kan hma hruaitute a zirin kan hmasawna hi a muang ani an ti thin a. Kan hruaitu hmasa te khan an lo in daidiak lutuk deuh hlek anih hi ka ti a, hei hi a pawh khawpin ka hria.

Tin, Pu Deputy Speaker kan sawi duh leh zinga mi chu, hei PMGSY hnuai hian khawih theih loh khawih tur chin bik kha a guideline khan a rawn sawi vek mai a, chungah chuan Basic Minimum Services, BMS an ti a. Chutiang schemes chu khawih tur a ni lo, a thar hlak lai tura in ruahman kan ni a, amaherawh chu major district road kan tih te, state highway kan tih te, national highway kan tih te hi PMGSY atang hian khawih thian a ni lo reng reng. Amaherawhchu, Khawzawl, Phullen, Thingdawl, Kolasib, Lawngtlai, Lungsen, Zawlnuam, Tuipang leh Serchhip ah te chuan upgradations ho kha an han kalpui ta tak tak a, nuai 803 kha helaiah CAG pawn a rawn pin point ta hmiah mai a ni.

Khatiangte kha kan hun kal tawha kan lo awm tawh dan kha a ni a, entirnan Champhai chu keimahni awmna lam khua te a ni a. Zawlsei to Khuangthing kan han tih te khi tunhma khan BADP leh EAS kan han tih ang chi ah te khan nuai 18 hmang khanin transport luh theih tur khan an lo chei tawh a, an han tender tha leh a, transport motor luh theih tawhna si ah khan ₹ 130.26 lakh in an han lai nawn leh a, an va ti thar thek thuak a, tichuan bill an la tawp mai ani.

Tin, Champhai to Hmunhmeltha te pawh khi Truck 407 tlan theih tawhna thin a ni, 2004 khan laih a ni a, nuai 239 in, nimah kan member zahawm tak Pu Lalruatkima khan ‘chul hlui rih kum’ te kha a rawn ti a. Anni hian an lo rit nasa a ni, kawng hlui kha an lo chei nasa khawp mai PMGSY ah hian, Hmunhmeltha leh N. Khawbung kawng kan tihte pawh truck 407 tlan theihna thin kha a lo ni tawh a, chu pawh chu new connectivity angin nuai 136 in a han ti tha leh a. Khatiang chi kha Pu Deputy Speaker vawiin hian sawi tur a tam a, tunah hian Mizoramah a nawlpuiin kawng a chhia kan hria, a chhiatna chhan chu hman atanga lo intan deuh zel kha a ni. An mahni hun laiin tuna kawng chhe ho ah hian kut an lo nghat tawh em? khangte kha ka rilruah hian a awm a, anmahni pawhin an lo tih ngai reng reng loh, nge ni anni pawh khan a dik tak chuan

hemi kawngthar laihah khan an rilru an pe nasa lutuk a, a thar va lai tak tak chuang si loin a hlui kha an va rit a, sum an la teuh teuh a ni.

Khangte kha vawiinah hian ka rilruah an awm a, Mizoram kawng chhiaah hi chuan tumah han in puhmawh lutuk chi kan niin ka hre lova, kan kal danah erawh hi chuan kan fimkhur tlan thain ka hria a, tunah kan vanduaina chhan tak erawh chu Central lamah a sum min rawn pe tu ber tena kan mamawh tawk ang min rawn pe lo lai tak erawh hi chu pawl kan ti a, hrehawm kan ti a, kawngchhia hi a hrehawm ti ber Sorkar neitute kan ni a. Amaherawhchu kan beisei ang leh ruahmanna kan theh thlak ang te a, a lo kal thin lo erawh hi chu pawl kan ti a. Tin, Pu Deputy Speaker, chutih rualin kumin furpui hi a na khawp mai a, he furpui nat zual lai hian kawng tha pawh han siamthatna hun hi a la awm lo reng reng a, nimin thlengin ruah a la sur a, khatihlai karah khan, na lutuk a in dem hi a rem rih dawn emmaw ni le. Tute pawh sorkar sela hemi van ruahtla a lo tam chhung hi chuan inngaihthiamna hun te pawh hi a awm tur a ni. Khalai te kha tawi te in kan sawi anih chu.

Vawiina an resolution hi tih awm tak pawh a nih rualin, anmahni lo in enchiang ve deuh sela duhna kan nei a nih chu. C&AG te hi kan sawi zel dawn anih chuan anmahni hun lai a mi hi a ngaihnaawm daih zawk a ni tih kha kan sawi tel hram duh ani. Ka lawm e.

**DEPUTY SPEAKER** : Le Pu P.C. Lalthanliana

**Pu P.C. LALTHANLIANA, MINISTER** : Pu Speaker, vawiina resolution kan neihah hian thu tlem azawng han sawi ve ka duh a. Vawiin hian lawmna tak mai ka nei a, a resolution lamah hian ka va lawm nilovin, hetiang puluttu kan MNF Group Leader te an rawn ni te hi a lawmawm ka ti a.

Hmanni lawkah vawiina resolution puluttu a party-ten kawng chhiat avanga kawng zawhte an han nei a, khatianga kan MNF unaute kha chen ro lo rel tawh, kawngchhe vei thara kawng hial te an rawn zawh hi a lawmawm ka ti a. House ah pawh kawngchhia vei a resolution te an han pulut te hi lawmawm ka ti a. Kha kawngchhia avanga kawng an zawh ni takah khan Pu Deputy Speaker, message ka dawng a, chutah chuan Vanglaini 11July, 2008 a Vanapa Hall kawta kawngchhiat zia an repair laia traffic duty pawh phar hman reng renglo a, an form nen a an hnatlang lai kha an rawn post a. Tun kum hi hei kan sawitu hmasaten an rawn sawi tawh ang khan fur a na a, ruahtui a tam em em a, a tla rei a, heti khawpin khua a cheng a, heti chung hian khatihlaia kawngchhia traffic police te duty hman lek lova kawng chhe thawma an hnatlang ang em kha chu kan la ni chuang lo niin ka hria a. A la vanneihthlak viauin ka hria a, khangte kha vawiinah hian rilruah a cham a, kawngchhia kan han tih vawiina kan ram a hmun tam taka nichina an rawn sawi ang a Total Bandh kan neih kan han tih te pawh hi han ngaihtuah chian chuan sorkar ang pawhin ngaihthah a ni lova, contractor-te pawh thlan a ni a, an thawk mek a, duh angin an thawk chak lova an thawk muang deuh tih te chutianga ngaihthah

pawh ni lo, hnathawh mek duh anga a chak tawh loh avanga an lungawi lohna te a ni mai a, a tam zawk a hi.

MNF sorkar kum 10 hunlai kha ka ngaihtuah let a, ngaihsak pawh hlawh chuang lo chhe ngawih ngawih kawng kha a tam em em a ni. Kan Veng Bazar ngeiah hian khawtlang kan hnatlang a, tha 1000 chuang mipuiin kawng kan lai a, khatihlai khan bialtu MLA khan Dal kg.1 pawh a rawn thawh lo reng reng. Mahse, sorkar kha kan va dem ngawr ngawr hranpa lo, kan lai a khawtlangin kan theih ang chen kan tih mai a ni. Vawiih hian mipuite pawhin kan ngaihtuah chian a, sorkar mawh vek a kan ram kawng chhia te kan dah hi a dik em, kan theih ang chinah chuan sorkar hi kan ta a ni a, kan puih te pawh hi a tul a ni tih te hi he resolution sawi pah hian ka sawi duh a. Ka bialah sawn kan hnatlang zing khawp mai khawtlang te pawh, kan House Leader nen ka bial kan fan tumin Mualthuam khawtlang mipuiin “ka pu, khawtlangin kan khawchhung black top nan cheng nuai li kan thawh tawh a, min thawh belh sak rawh” an ti a. Khatiang taka mipui pawhin kawng tha siam tura thawhlawm an lo thawh khawm kha min pek belh a tha takin kan black top a ni.

Vawiih hian T.V te kan en chuan hmun tam takah kawng siam hnatlang te pawh kan nei thin, interview han neih te hian an khawtlang hruaitute hi ka lo ngaihdan chuan, sorkar-in a ti vek thei lo, mipuiin kan theih angah hian sorkar kan puih hi a tul a ni, tih lama han sawi a hnatlang hruaitute hi awm awmah ka ngai thin a. Mahse, kan han sawi dan thinte hi “sorkar-ah vawi tam tak kan thlen a, min ngaihsak lo a ni” tih ang lek lek ten an sawi thin a.

Hei hi kan ngaihtuah a tulin ka hria, Mizoram ang tluka mipuite sorkar-in a kan chawm, electric bill-ah, tui bill-ah sorkar-in engemaw zat min thawh sak a, chuti chung chuan kan mamawh tawh tui leh electric kan chhi a, sorkar-in a chawibelh zar zar a ni. Nichinah kan Food & Civil Supplies Minister zahawm takin a sawi a Buhfai quintal-ah ₹ 2,500 chuanga an lak kha mipuiah ₹ 1,500 in min pe a ni. Tui leh Electric leh Buhfai ringawta sorkar-in mipuite engemaw zat min tum kep chung, kawng chhia zawng zawng leh thil engkim mai sorkar-in chak taka ti tura beisei letna kan nei hi kan in ngaihtuah chian a tulin ka hria a.

Cairo khawpuiah an In building ropui tak tak kha brick hi a sen fuk mai a, a piah lawkah chuan an Lal fapa awmna an hal kang bang a awm a, tahchuan ka zawt a enge a chhan ka ti a “Egypt mipuite hian chhiah kan chawi nasa (power interruption) an plaster a rawng an hnawih chuan chhiah tam tak an chawi dawn a ni, kan Lal-in a eiru nasa a churang chuan mipui thinrimin an Lal fapa awmna te pawh hi an hal a ni, an ti a. In pawnlam rawng hnawih pawha miin sorkar-a chhiah a chawi chuan sorkar-ah a pangchang ang, an Lal te pawh an eiruk chuan mipuiin haw haw-a paihthlak an duh ang

ka ring a ni. Chutiang khawp chuan mi ramah chuan mipuiin sorkar-ah chhiah an chawi a ni, an beisei pawh a san ka ring.

Kan ramah hian Zoram mipuite hian sorkar kan beisei dan tawh te pawh hi kan ngaihtuah chian a tulin ka hria a, heti khawpa sorkar-in min chawm leh min enkawl chung hian sorkar-ah hian bat tam tak mipuite pawhin kan tih theih ang chinah chuan kan nei a ni tih hi hria ila. Kan khaw kawng a lo chhe deuh a, kan veng kawngah lei a lo tla anih pawhin PWD paih kher tura kan phut te pawh hi mipui lam pawhin kan tih ve theih chinah hi chuan sorkar hi kan puih tha in ka hria a, hei hi ka sawi fo thin a ni.

Ka bialah ngei pawh vawi tam tak kan hnatlang tawh, Chhipphir-ah pawh vawi engemaw zat kawngchhia Zote nena an inkar tlawhin Driver Welfare an hnatlang a keiin ka tum bawh, T.V.-ah kan tilang ngai hranpa lo, kan tih ve theih tawh kan ti ah kan ngai thin a ni. Chutiang chuan vawiinah hian a ram mipuite pawh hian sorkar hian engkim mai hi kan duhthusama ti tur hian sorkar-ah chhiah engzatnge ka pek, sorkar-ah hian ka lakluh atangin enge ka thawh ve, tih zawnga kan in ngaihtuah chuan vawiina Delhi tlang budget mila kal mai state kan nihnaah hian kan in ngaihtuah chian a pawimawh khawpin ka hria a. Lehlamah chuan Delhi drip khai tum lova sorkar tumte tan phei hi chuan engtinge maw an tih ang le, tih hi vawiinah hian ngaihtuah a ngai a ni.

Resolution neitu khan he House-ah hian pass hrim hrim ila mipuite pawh an thlamuang ang a ti a, ka ring hranpa tehchiam lova kei chuan. MNF sorkar lai khan budget an han pharha, a tama a tam zia chu a maka maka tam, nem muka liam zawih zawih an han tih pawh khan Zoram mipui kut hnathawktute kan mangang a, kan ril a tam a, Aizawl khawpuih kawng kan zawh a ni. Kan nihna tak, kan dinhmunte hi kan ngaihtuah chian a, a thu mai emaw, a mawi mai emaw a mipui rawngbawl na ni lovin, a tak ramah hian kan dinhmun kan hotute chuan kan sorkar-ah an sawi thin a, sum harsat te. Chutichung chuan Pu Deputy Speaker, vawiinah kawng, hnathawh lai avang te a duhthusam loh kal that theih loh te, contractor ruat fuh loh deuh avanga duhthusam loh te, a la ni te hi a lawmawm khawpin ka hria. Ka bial ve-ah khian MNF hunlaia an thawh that tawh loh, cancelled leh avanga vawiin thlenga problem te pawh kan nei a ni.

Engpawhnise, i veilama thu ten kawng tha duha a thinlung an lo pu ta te hi a lawmawm hrim hrim ka ti a. Tin, kawng tha duh a kawng an han zawh ve ta hial mai te pawh kha engtik niah emaw chuan kum 10 kum 20 lo kal turah te chuan an la sorkar ve leh maithei a, chung hun atan te pawh chuan an rilru kha a tha hrim hrimin ka hria a. Vawiinah chuan Pu Deputy Speaker, traffic police te pawh an la duty hman ania, kawngchhe repair in an la buai ve chiahlo ania. Chuvang chuan an sorkar hunlai ai kha chuan tlem chuan kan la zia deuh a ni ang Aizawl khawpui te pawh tihte ka lo ngaihtuah a ni. Chu chu vawiinah a resolution lama ka zu lawm ai mahin, hetiang resolution puluta

thinlung an rawn pu hi an lawmpuiawm ve ta khawpin ka hria tih kha kan sawi ve duh a ni.

**DEPUTY SPEAKER** : Pu John Siamkunga a phar a, Pu K.S-a a phar bawk a. Pu John Siamkunga ko ang.

**Pu JOHN SIAMKUNGA** : Pu Deputy Speaker, ka lawm e. Vawiina kan resolution hi “Mipuiten inkalpawhna kawngpui chhia avanga harsatna kan tawh mek sutkian thuai a nih theihna turin chak lehzualin hma lak ni rawh se” tih a ni a. Vawiinah hian sorkar-in theihtawpin hma a la chho mek a, kan hriat tur pawimawh em em chu, kumin hian ruahtui a tam a ni tih hi. Ruahtui a tam ka hriatna chhan leh ka chian em em na chhan chu, Darzo kai-ah sawn kai a harsat thin avangin BRO ho hian Lawng an dah thin a ni, Mar board a in phurh kaina turin, kha kha a chhe si a kum 2014 khan an sa mai thei silo a, tender an han koh thin a, tender kha chhangtute an han awm lova. A hnu-ah an re-tender leh a, chhangtu an awm ve ta a. Khami an han sak chhoh bawr vel lai khan kai ngaihna a awm ta lo a ni. Kan buai em em thin a, sawlai lei sang a inphurh kai saw a to si a. Chumi a nih chuan fair weather bridge i siam mai ang u, tiin thutlukna kan han siam a. Tichuan, Sakawr-lei kan tih ang thin, sawlamah chuan sakawr-lei tiin an ko thin a, chu chu kan dawhkai ta a ni.

Motor lian thlenga kal theih turin kan dawhkai ta zui mai a, tahchuan, ni khata motor kalte traffic a heavy leh heavy loh te pawh kha kan chhut tir a. Ni khatah motor 40 leh 50 inkar te kha ni khat/ni hnih velah chuan a kal hman a. Khatiang khan nitin mai khan a ri ta vut vut mai a ni. Mahse chutianga thlahnih khat lai mai kan la hmang thei dawn emaw kan tih laiin, kan bial fan lai April ni 22 velah chuan tui lo lian khan a rawn chimpil thawthang ta mai a. Ral atang khan kan han thlir thin a Darzo lam atang khian, a sen phut mai a, a lei chu a la lang a ni. Keini hawngthla pawh kan kai ngam tawh chuang lo, chu chu April, ni 22 vel kha a ni a. Khata tang khan vawiin thleng hian, nimirah te pawh ruah a la sur a, a la sur leh dawn tih weather forecast atang chuan kan hmu a ni.

Chuvangin, vawiin ah hian eng ang ngaihtuahna nge kan put a, sorkar dem nana heti tak mai a kawng chhia kan han au pui tak mai aw ka ti. A dik tak chuan helai kutchu road deuh hleka kan tih black top ni lo te pawh mipui kal theihna turin JCB ten kan han ti a. Mahse zankhat thil thu ah a rawn tlengfai leh vek mai a ni, tihngaihna a awm lo. Kan bial kawng pawh khi vawihnih lai kan siamtha tawh a, mahse zankhat thil thu ah ruah bawhawk lo sur khan engmahlo ah a chantir zel a ni, chu chu Zoram pumpui dinhmun a ni. Chumi a nih avang chuan kawngchhiatna hi khawi hmunah pawh a awm a, ruahtui a rawn tlak chhunin sur cherh cherh a ni lova, nasa fe in a rawn sur a, a rawn tleng duai zel mai a ni. Chumi a nih avang chuan, he kawng hi a chhe lo thei lo a, tih

that tumin theihtawp-a kan beih pawhin tihngaihna a awm lo a ni tih kha kan hriat a tha a. Kawng chhia hi a hrehawm tak zet zet, a tu a pawn hrehawm kan ti.

Tin, heng thingtlang lama awm-te, Aizawl Sumo a kal ve thin ten kawng chhe hnuaia thei leh thei lo a an han kal te hi hmuh hrehawm kan ti em em vek a ni. Kawng tha nei se, black top tha tak hnuaiah tlan zur zur se kan ti vek, chu chu kan duhdan a ni. Amaherawhchu, khuarel atanga kan chhut chuan a theih si lova. Chulai dinhmuna kan din mek lai chu a nih avangin, vawiinnah hian kawng chhiat avanga kawng han zawh emaw, resolution te hial han putluh a hi a la hun em aw tih hi kei ka ngaihtuah dan a ni a.

Hei vawiin a kan hriat tur atan chuan kawngte hi kan lo nei thui ve tawh a Mizoram hian. Kawng a tam a, a thui na na na chuan chhe tawk chu hmun tam takah a awm ang. Kha kha a nih ve te pawh a ngai a, Mizoram PWD hnuaiah ringawt pawh 4731 km lai kawng kan lo nei tawh a ni. He ram te reuhte ah hian kawng chu thui ve deuh a ni chulai ringawt pawh chu. Tin, National Highway hnuaiah hian 1463 km lai enkawl a ni baw a. Tin, BRO hnuai-ah hian 896 km lai enkawl a ni baw a ni. Tin, CPWD hnuaiah hian 175 km, a bakah department dangte leh engemaw kawng danga kawng lo siamte nen a vaiin Mizoram ah hian 7698 km lai enkawl a ni. Tam tak tha mahse, chhe lai tam tak chu a awm lo thei lo a ni tih kha kan hriat a pawimawh a.

Tin, chutihlai karah chuan kan hriat atan, tun hunlai chho ah pawh hian black-top thawh mek tam tak a awm a ni. Tin, PMGSY hnuaiah ringawt pawh hian, heng Chhingchhip - Hualtu kawng te, Phullen, Phuaibuang, Zohmun, Tinghmun tih te, Chawngte (P), Hmunlai road tih te a tam mai. Tunah hian khua chu tha nise thawh map map theih a ni a, hei kawng tam tak a ni a, a vai pheih chuan tam tak a ni. District hrang hrangah hian black top hnathawk turin tunah hian tih mup mup a ni a. An thawh tawh lai pawh an chawl thup mai a ni, chu chu vawiinni-a kan dinhmun a ni a.

Tin, vawiinah hian kan sawi leh duh pawimawh ta ber ni a ka hriat chu, kan kawng enkawla hi quality control erawh hi chu a ngai hle in ka hria. Quality control hi uluk deuh hleka kan tih chuan kawng hi a tlo turah ngai ila. A chhan chu vawiina kan black top dan hi Scottish Technology kan lakluhte leh a dangte kan han pawlhsawp a ni a. John Loudon Mc Adam Scottish Engineer khan vawiinni-a kan black-top dan ropui tak hi rawn hmuchhuakin, a ni pheih chuan kum 8 atanga kum 12 hi a lifetime a ni a ti a. chutiang a nih chuan, hetiang ang taka kan tih chuan a tha thei dawn a ni tih kha a hriat a.

Amaherawhchu, vawiina kan tihdanah chuan, granular sub-base kan ti a, Granular sub-base kha heng rawra nawi leh thildang dangte nena tih in road roller in a

han chil mam a, kha khan bill hran a nei a ni. Term hmasa ahkhan MNF Sorkar lai khan khatiang anga granular sub-base an ti zo a, water bound mega dam an ti zo a, bill la a kal ta daih kha an tam lutuk. Khami a nih avang khan hmun tam takah kawng a chhe em em mai a ni. A awlsam lai leh a hlawk lai chin an ti a, a black-top na lai tur tak bitumen carpet kan han tih dawn chiah khan an kalsan daih zel, chu chu ka bialah pawh khian a awm hlawm a ni. PWD in a departmental a an han khawihzui, mahse sum a lo tlem tawh si a, an khawihzui theih loh te kha a awm a ni.

Chuvangin, khatilai hun atanga an lo practice fuh loh em em avang khan vawiinah hian kawng tam takin kan tuar a. GSB in a bill hran a neih te, tin, water bound mega dam in a bill hran a neih te, bill hran khalai layer hrang hrangin a neih kha a pawh khawp mai. Hei hi nilo sela chuan bitumen carpet thleng tih hi an thleng rawk tur a ni a. Chumi anih avang chuan Sorkar hmasa MNF Sorkar lai khan a chung a black-top lai hi ti duh silo in, hnuai lampang hlawk lai chin tih a, kawng kalsan hi an tam em em a, vawiinah hian kan tuar a ni. Chuvangin, kawngchhia hi kan vei em em a, tih that kan duh ngawih ngawih a ni. Amaherawhchu, vawiinni-ah kan khawchhiat dan leh kan khaw fur rei zia te kan hria a, Sorkar-in theihtawp a chhuah mek a, tuna kan sawi takah pawh Aizawl District ah, Lawngtlai, Lunglei, Mamit, Saiha, Serchhip ah te kawng tam tak tunah hian work order hmu si, mahse la thawk thei silo tam tak an awm a ni khua a chhiat avangin. Chuvangin sorkar hian hma a la mek zel a, theihtawpin a bei a ni tih kha kan hriat a pawimawh a.

Chutihlaih chuan Darzokai saw tlemte han sawi leh lawk ka duh a, nichina kan Group Leader in a rawn sawi takah chuan an khawngaihthlak a ni tuipuirala awmte saw. An khawngaihthlak em avangin kan House Leader zahawmtak hian Lei dawhsak ila tiin kan sorkar tirihin kum 2008 khan theihtawp in hma a lak sak a. Tichuan kan han dawh a, vanduaithlak takin kum 2014 December khan a chim ta hlauh mai a, a pawh a ni. MNF hunlai pawn an lo dil thin a, theihtawpin an lo tahawh thin a, mahse an tihsak lo a ni tih te, a khaw miten min hrih thin a. Kan pu in theihtawpin an tihsak a, a chim ta hlauh mai a dawh zawh dawn lamah. Amaherawhchu, tunah sawn an bei leh mek a, a tih ngil hna-te an thawk a, tuna kan work programme ah pawh khan Chiang em em in sawlai Darzokai hmalak chhonzawmna tur sum te pawh kha a awm a ni tih kan hriat a pawimawh tak zetin ka hria a.

Chubakah sawlaih sawn a inhruaikaina tur Lawng kan tuk tawh a, chu Lawng chu zanlama hman atan kan ti ta nghe nghe a. Lawng lian hi a hman theih dawn a. Hemi pick-up full load phurkai thei saw tunah kan commission tawh a, a awm reng a, englaipawha kai theih reng a ni a. Tunah sawn Lawng lian BRO ho in an tuk ve thung a, feet 60 a sei pahnih a ni a, tuna Motor lian chi, ke 12 lai neite pawh phur tlang vah vah thei tawh tur a ni a. Tichuan, Lawng 2 an service tawh dawn tihna a ni a. Tuipuiral

lampang pawh an thla a muang tawh hle a ni tih kha Pu Deputy Speaker, kan sawitel duh a ni. Chuan hei kan resolution hi, chak leh zualin hma lak ni rawh se, tih hi, hma hi theihtawp chuan kan la reng a, mahse khua in a zir rih lo a ni tih erawh chi chu kan hriatthiam ve a ngai niin ka hria, ka lawm e.

**DEPUTY SPEAKER** : Awle, Pu K.S. Thanga.

**Pu K.S. THANGA** : Pu Deputy Speaker, ka lawm e, hei vawiina kan resolution, member zahawm tak Pu Vanlalzawma, Opposition Group leader-in a rawn putlul hi engemaw sawi ka duh ve a. Chumi hma chuan hei keini hemi tlar mi pasarihte hi House-ah hian participate na chance hi kan ngah vak lo a, question te kan zawt lem lo a, lehlamah han zawt dawn ila, a file engkim confidential zawng zawng khawih ve vektu kan nih avangin han zawh leh chuan tur a awm mang lo a, a chhangtu kan ni leh mang bawk si lo a, session hi ti hian kan thu deuh ngawt ngawt a ni mai a. Chuvang chuan hei hi kan participate-na chance te pawh ni vein ka hria a, chuvangin hei hi han sawi ve tha ka ti a.

Vawiina kan resolution hi a thu hi chu a tluangtlam a, a tha a, amaherawhchu vawiinah hian enge ni a motive ni ang aw ka ti a, helaia han put luh hian enge a tum laimu ni ang ka ti deuh a ni. Thil tul ber a ni em he House a rawn putlul atan hian, a hmian an ti tawh a, kan House leader te, kan Chief Minister zahawm tak ten an sawi tawh a, hetiang a rawn tih leh thin hi politics a engemaw boruak han siam duhna te a ni ang tih ka hlauthawng hle a.

Kan hriat fo angin hei kan Chief Minister zahawm takin Mizoram a kan kawng chungchang hi chu he House zahawm takah hian vawi tam tak a hre duh tan chuan a sawi tawh a ni. India ram sawrkar hnuaia state kan ni a, tuna India ram kalphungah hian kan hna lian kawngpui hna te hi tender a ni a, E- Tender in Delhi-ah a tlangpuih chuan tender hi chhuah a ni a, tichuan vai, Mizoram chinchang hre miah lo, Mizoram hi khawiah nge a awm tih pawh hre lo, monsoon a ruahtui tlak nasat zia te, lung te, tui te, balu te engkim mai a harsatna hmun, ram thlaler harsa tak mai a awm a ni tih te pawh hre lo ten heng tender hi an chhang thin a ni. Chung an chhan thin chu, a then te phei chuan an thawk duh lo a, han zuar leh te an awm a ni tih te kan House leader zahawm tak hian a sawi thin a. Thawk mahsela a hna kha revise a, revise estimate siama pawisa siam tum ringawt maiin hun an delay a, a ziak lamah chuan vai na na na chu an fel em em mai a, ziak lam ti mi an ni a, a hna lamah an phuai si a, vawiinah hian kan ramah hian harsatna tam tak heng avang hian kan tawng a ni tih hi he House-ah hian vawi duailo kan House Leader leh kan Chief Minister zahawm tak hian a sawi a ni. Chung kan ngaithla leh hre reng chung a hetiang a kan ti leh thin hi enge ni, mipuih engemaw han intih deuh duhna kan nei a nih chuan, nichina kan member zahawm takte rawn sawi ang khan, sawi tur kha helam hian kan lo nei ve ang a, khang kha thil hlui zawk te, heng bul lo intanna leh heng harsatna lo intannate pawh hi kan han sawi ve khan tul lo thleng thleng khan an tuar thei zawk ni a kan hriat avang in, heng hi sawi rik loh hram hram te hi kan duh a. He House ah te an awm tawh lo a, a hun laia mi ropui ber ber, hruaitu ropui ber ber lo ni



mahsela, vawiinah hian anmahni kutkawiha thil thleng te, an kut hnuaiia thil thleng te, khang ang kha han sawi chhuah te kha hrehawm kan ti ve tho a ni. Chuvangin, kan thiante i veilama mite pawh hian ngaihtuahna fim an hman hi thain ka hria a, chu chu thuhma angin ka'n sawi duh a.

Pu Deputy Speaker, kan ngaihthlak angin Mizoram hi monsoon a nasa em em a ni. Hei kuminah khan kan in leh lote kan saknaah hna kan thawk a, engemaw kan tihnaah hian ruahsur hun hmaa thil tih kan duh avangin kan hna kan han tan hmanhmawh viau a, mahse 1<sup>st</sup> March-ah khan ruah a sur tlat tawh a ni. Hei tunah October a la ni a, ruah a la sur reng a, Sialsuk-ah ka nau ngei te an awm a, chungah chuan leilet kamah tui a lo lian hle mai a, leilet kawng dai kai theih loh te tun thleng sawn a la ni. Chutiang khawp chuan thla 12 ah hian thla 8 hi ruahin kan ram min chim a, ruah a sur ngat ngat mai a ni. Pre- Monsoon hi a lo thleng hma a, chutah a monsoon pangngai a lo kal leh a chutah a post monsoon a in withdraw tur hi a lo let leh bawk si a. Mizoram monsoon kan vanneihna hi kan vanduaia te pawh a ni tel pha hial zawk a ni, hnathawh hun chhung working season, khaw ro hun hi a tlem em em a, thla li emaw chauh hi a ni. Chutih laiah chuan vairam te ang erawh chuan a ram pum huapa tulianin a chim put put ang te, tlangram kan nih avangin kan nei ve lo a. Tin, cyclone-in a ram pum huapa in leh lo a sang tel tak tak a sing tel a tihchhiat rup rup te kan ramah hi chuan tlangram a nih avangin a siper te tuar ve bawk mah ila, tiang hi kan tuar lo. Chuvangchuan, kan ram hrim hrimin kan tawrh hi chu tlangram a nih avangin leimin leh hetiang hi a ni.

Hei hmanni khan kan thian pakhatin a sawi a, kan thenawmten kan in saknaah 'in inhmun in laih avangin kan ram in timin a ni,' a ti a. Kan inggaihtuah, mahse a piahah khan ka va en leh a an ram kha hmun dangah khan kan khawih phak reng reng loh kha a min leh tho a, chuvangin, ka tih bik kha a lo ni lo a, 'ruahsur nasa kha kan tuar tlang a ni,' a ti a. Chuvangin, khu Kawnpui kawng te pawh han en ta ila, hmanni ah te pawh chanchinbuah te, T.V. ah te pawh kan hmu a, khati khawpa kawngpui mam tha leh kawngpui tha kha, ruahsur nasain leimin a siam avang khan kawng kha darkar engemaw zat te a ping a ni.

**DEPUTY SPEAKER** : Ngawi rawh aw lawk, hei dar khat a ri mai dawn a, minute khat vel chiah ala awm a, tihtawp tum deuh la, darkhat a pelh deuh hret pawn tihtawp tir mai ang u aw, in remti em? Amaherawhchu, pelh thui lutuk chu kan remti bik lo a nia.

**Pu K.S. THANGA** : Awle, Pu Deputy Speaker, kan zo dawn ang a, tlem khan ka hun kha a inhnawh tawt sa hrim hrim a, min lo hrethiam dawn nia. Chuvangchuan, vawiina kan kawng chhiatna hi kan monsoon nasa lutuk a ni tih hi kan hriat tlan a tha a, Pathian malsawmna ram kan ni a kan vannei a ruahtuiah te. Amaherawhchu, a khawlina lamte kan la ti thiam lo em em a, he ram hi a fur a thalah tuiah harsatna nei lo tur khawp hian Pathianin mal min sawm a, tunah hi chuan ruahtui khawlina lam kan la tih thiam loh avangin a harsatna leimin lam leh kawng chhiatna lamah kan tuar hrih erawh hi chu tan lak tlan a ngai a. Chuvangin Mizoram hmun hrang hranga kawng chhia pawh hi tuna kan sawi tho, kan House Leader leh kan Chief Minister zahawm takin a

sawi, khang tender hrang hrang vai ho hnena Delhi lam atang daiha a tih, helai sawrkarin a control phak lohna hnuaiia harsatna awm zel a kha a ni tih hi vawiinah hian a hre vektu helai House a member zahawm tak takte kan ni vek a ni. Chumi hre reng chung a kan hotute kan Chief Minister ten theihtawpa Central-ah pawh an nawra contractor te pawh mimal pawn tawngkam na tak taka invauna leh inhauhna te pawh nei chungin khang angah han Authority tak tak kha helai State sorkar mite kha kan nih miau si loh chuan duh ang tawk thil a tih theih loh a ni, tih kha kan hriat a pawimawhin ka hria a.

Tin, BRTF lak te, khawchhung khawimaw lai lai te pawh PWD in a tul tawp khawk avanga an han tih hram, kan hotute'n an ngaihpawimawh avanga BRTF mawhphurhna ngawih ngawih an rawn tih zawk te pawh a awm a ni tih pawh he House-ah kan ngaithla thin a nih kha. Chuvang chuan, heng hi vawiinah hian rilru puitling zawka, politics khelh nan emaw, engemaw mipuia game emaw, gallery play nan emawa hetiang hi kan vawrh chhuak a nih chuan a fuh lovang tih ka ring a. Kan Movers te pawhin heng hi puitling takin ngaihtuahna kan hman tlan a, party discipline hnuaiia kan awm tlang a, kan tih tur awm hi chu a awm vek. Amaherawhchu, a tul aia thui hi helai House zahawmna atan pawh hian kal lo tlang ila tih kha ka'n inchah ve duh a.

Hei hnatlang tunah pawh an awm a, amaherawhchu he sorkar hi a tha angreng khawp a, sorkar hnathawk emaw tu emaw YMA hruaitu emaw khawtlang hruaitu emaw lo ni ta se, kawng siamah khan thupui vaitu leh sorkar na deuh deuha rawn ti pawh hi action pakhatmah lak hi an awm lovin ka hria a. MLA ka nih hma khan, tuna ka MLA-na, tun ka'n din vena bialah sawn, Hmuifangah kawng a min a, thla thum thla li kawng a chhe tawh a. Motor chu sawi loh mihring pawh an kal kai theih tawk tawk a ni. Hmuifang Tlang Group YMA an mangang a, committee an kova, hnatlanga kawng laih tlan an rel ve a ni, thla li vel kawng a tlang tawh loh avangin. Chutah chuan an han lai ta a, a sorkar anga thingpui emaw, tuten emaw PWD anga va tanpui chu sawi loh a YMA group hruaitute kha an han sawn tak tak mai a hla te khuaah, an lainatawm hle a ni. Khatiang te kha kan lo experience a ni ve tawh a. Chuvang chuan vawiinah hian hetiang hi kan kal dan a nih avangin he sorkar hi chu hetiang kawngah hian kan hotute an tha em em zawk a ni tih kha ka'n sawi duh a.

Tin, Pu Deputy Speaker, a tawp nan, vawiinah hian mipuite hian he sorkarah hian pangchang reng ringawt tur hi kan ni em tih hi kan inen tha ve hlein ka hria a. Ka hma a kan member zahawm takin a sawi ang khan chhiah peknaah hian tunai hian kan inhuam deuh thei angem, hetiang kan pangchan dawn chuan.

Entirnan, tunah hian buhfai subsidy-a sorkarin min la pek avang hian Mizoram sorkar hian kumtin vaibelchhe za chuang hi a la hloh reng a, return a awm lo. Ram siamna, kawng siamna tham a ni. Tin, Power-ah subsidy min pek nasat avangin vaibelchhe 80 vel hi sorkar hian a la chawibelh reng a ni. Tin, tui lamah pawh vaibelchhe 60 vel emaw hi a chawi belh reng a. Chung zawng zawng chu a tlem berah kumtin hian mipuite hmakhua a ngaihna avang hian vaibelchhe 250

subsidiary kan lo pe reng a ni, khang harsatna kan tawhna tam tak chhanchhuahna tham kha ti hian a la luang ral a ni. A nih ang hian sorkarin a chawi ang hi kan lo chawi ve ang e, sorkar chu agency-ah tang chauh rawh se, te hi chu ti ngam ila chu kawng siamna tham te hi chu ei bo barah leh kan tui inah te, kan electric leh kan buhfaiah te hian kan hmang reng a ni tih te pawh hi kan hriat tlan ve a thain ka hria a.

Chuvang chuan vawiih hian kan Resolution hi a thu chu a tha lo a ni lova, kan ramina kan tih, kan sorkarin a kalpui mek a ni. Amaherawhchu, hetiang hi a tul lem lo a ni mai awm mange aw ka ti a keima ngaihtuahnaah chuan. Kan inhnial chuan a ni lo zawng khan kan kal vak thei a. Tunah kan member zahawm takte pawhin sawi tur an neih ve zel kha, kan neih zel dawn avangin heng ang hi he House-ah hian sawi chhuah zel a tul tawh em ni? Kan hotupa ber, kan House Leader-in vawi tam tak min hrih tawh a ni lawm ni tih kha ka'n sawi ve duh a ni e. Pu Deputy Speaker, hun tha min pek avangin ka lawm e.

**DEPUTY SPEAKER** : Kan chawlh hun minute nga velin kan pel chauh a, a rei lutuk love. Kan chawl rih ang a, dar 2 ah kan thukhawm leh dawn nia.

### **2:00 P.M**

**DEPUTY SPEAKER** : Kan sawihona kan chhonzawm ang a. Chawhma lam khan member 7 in kan sawi hman a, sawi tur kan la awm em? Pu P.C. Zoram Sangliana.

**Pu P.C. ZORAM SANGLIANA** : Pu Deputy Speaker, agenda (resolution) atana chhawp chhuah tak mai Aizawl West-III MLA in a rawn tih hi lawmawm ka ti hle mai a. He House-ah hian Session vawikhata Governor speech a ni emaw, resolution a ni emaw a tumkhata chang nalh thei hi, a hminga tum nga vel kan thutna a ni ve tawh a, an awm ve zeuh zeuh thin a. Mak deuh erawh chu tuna mi hi chutiang an ni ve ang tihna ni lovin, chutianga chang nawn chu a dawtah hian an awl duh angreng khawp mai a, inthlan lehah hian. Intihsiakna tha nge tha lo chu ka hre chiahlo na. Chung velte chu heng ka'n ngaihtuah dawn hian ka rilruah a'n awm te la, chungte chu a thleng em lovang chu maw. Member thenkhatten term hnih te te in kan inchhawk a nia an tih ai te kha chuan, programme-ah hian mipui hian vote an thlak thin si a.

Vawiihah press conference an ko an han tih thin ve lah hian heti hian sorkar lai chuan an ti a, keini kan sorkar ve hun chuan chutiangin kan ti ang tih tur awm lo. Chanchinbumite nen kan lo chhukthla hova zawh pawh kan zawt peih tawh lo a ni. Tikhawp hian press conference an taima si a tih vel te ka rawn ngaihtla tel nen. Kan resolution ka'n ngaihtuah hian khawilai berah nge he thu hi ka kalpui dawn tih hi ka'n chianglo em em mai a. 'Mipuiten inkalhpawhna kawngpui chhia avanga harsatna kan tawh mek sutkian a nih theihna turin chak lehzualin hmalak ni rawh se' han tih laiah hian kan chhiar thiam danah chuan Pu Deputy Speaker, kan zavaiin MLA-te pawh tel vekin, a puluttute ngei pawh telin, leh kan vai hian, mipui tinreng nen tin, tlatlum kan in tihna North East state dang zawng zawnga an kala kawng siamthat nana vaibelchhe tela Transport

Minister ngei pawhin a puan laia Mizoram nuai khatmah an puan ve duhloh laite hian heng an rawn put luh rual hian an rilruah a puluttute hian, Delhi lama kan pute NDA member pakhat kan ni ve a ti a kan president theuhte pawhin ziaka an lo zuk thlenna ah te pawh hian kan sawi thei ngei mai dawn a. Hengah te hian kan lo zuk sawi ve ang a, House pawhin kan pass a sin kan tih theih nan tiin chulai chu an rawn thukru ni deuh te pawh hian ka ngai deuh hlek a.

Chungah te pawh chuan, member zahawm tak tak te pawhin an rawn sawi ang deuh hlek khan, na deuh mai a resolution lo kal, Sorkar, tuna i dinglama thute chanvo ti mai ang, sorkar vuan lai mekte tan ngei pawh ngaihthlak nuam deuh tura wording rawn siam te hi a ropui khawpin ka hria a, a lawmawm ka ti a. Kawng siamna leh hmasawna chungchangah te hian kan ram hian, mipui nawlpui pawhin i ti ang, NGO ang te, ka sawi sual chuan Pathianin min ngaidam sela, kohhran ang te pawh hian tih tur hi kan nei tlatin ka hria a ni Pu Deputy Speaker.

Ka sawi fo thin a helai hi vawiinah hian a inhme em avangin sawi nawn leh ka duh a ka sawi tawh ang khan min ngaihdam theih chuan min ngaidam se ka tih kha. Chhaklama kan unauten chhiatna nasa tak an tawh a mimal, kohhran, NGO leh chi hrang hrang hian tanpuina nasa tak an la khawm a, talent nei ten an talent hrang hrangte pholang in chungte nen lam chuan thawhlawm kan thawhkhawm thei a.

House-a member te ngaihmawh tham khawp kawng chhia kan nei tak tak a nih chuan a kohhran leh NGO ang te pawhin, kan talented person-te pawhin heng atan te hian sorkar-ah han la khawm ve ta sela. PWD-ah hian han chhunglut ta sela, Mizorama kawng enkawltu berte an ni deuh bawh a. Khawpui tan Urban Development Department ah te heng atan hian han chhunglut ta sela tun ang hian kan kawng hi House a chai ngai hian a awm ka ring lova. Mahse, hun kal tawh te ka'n chhut erawh chuan House a han sawichhuah em tur chu a ni em maw chu aw ka ti a.

Ka tlawh ve phak chin India hmarchhak state hrang hrang te han tlawh a an khawpui leh thingtlang khua, an district capital leh state capital te inthlah zia kawngah te standard of living hrim hrimah te, social life-ah te pawh an inthlah zia te ka ngaihtuah hian, he kan ramah hian a kilkhawr ber chhim leh hmar atanga chhak leh thlang, chanchinbu ni se sorkar hmalakna chak tak avanga sumo in zing dar 10, ti mai ila kan uar lutuk na nilovin, nizan a chhuak, vawiin a chhuak hi vawiin tlaiah maian sih pah te a kan chhiar theihna khua kan ni tawh a ni, Mizoram hi.

Chutiang khawpa hmasawna ramah kan awm mek lai hian, kawng chhia, MLA te rorel tur dang leh tih tur dang a tam tehreng nen, mipui aiawha min dahtu ten ngaihtuah se min hi a tama ka rin tehreng nen hian helai hi mutmawh hnarmawh bera han neih hi chu a tha ber dawn em maw chu aw ka ti a. Chutihruah erawh chuan, a khawih tute a zir erawh chuan general discussion a ka sawi tawh ang khan thil hi a danglam thei a ni tih erawh hi chu ka mit ngeia ka hmuh leh ka hriat a ni ve a.

Entirnan, ka bial Kolasib-ah te chuan, a khaw tlangval, pa ngeiin khawpui chhung black top hna a khawih a, kum 2/3 a nih hnu pawhin district capital kawng tha ber a la ni reng a ni. A chhiat fo thin nachhan chu hnim lo char chak te, a bula in ten an sam fai loh avang te, chung in uai rit chuan kawng a rawn ti min a, diak te a siam thin a. Hmanniah kan sawiho a, hengah te hi chuan mahni kawt kawngko te hi chu lo samfai ve ila, kan VC ten ni 100 inhlawhna ah te pawh rem leh rem lova hmundanga va hman daih ai te chuan heng khawpui chhungah te hian hman dan a awm lawm ni kan ti a. Chutianga an han tih atang chuan a lo tha em em mai a ni tih te kan han fiah zel a.

Vawiinah pawh hian mahni kan chenna, mahni min khawih ngei ngeina tur thilah chuan kan thilphalin sum kan seng phal tur niin ka hria mimal ang pawhin. Engmah tham ni lo mahse han sawi mai mai ka duh chu, Kanan vengah kum 1 chuang kan awm ta a, kan awm thlak tirh chuan, ti mai ang, damdawiin atanga kan lo haw hlim chuan kan kawt, kan kawmchhakah chuan motor lian pawh hi kal sela a za hian kawng a hrut a ni tih khawp hian kawng a lei nasa a ni. Amaherawhchu, Murmu-a te an ni emaw sorkar deptt. min thawhsak kher phut lovin keimahniiin kan theih ang angin kan hnawh ve a, chutia kan han hnawh hnuah chuan Lower Kanan ro rauvah chuan kan in zawn chu a kawng mamlai chu kan ni ve a ni. Chutiang ka'n sawichhuah nachhan chu, keini ang tha nem te pawhin chutiang kan ti thei a nih chuan vawiinah hian heng kawngchhe lutuk kan buaipui atan hian mimala kan inzawh atana ka duh chu kawngchhia buaipui tur hian keiin enge ka tih tih hi, kawng thatna tur hian keiin enge ka tih tih hi kan in zawn fo tur niin ka hria a.

He resolution lo chhuah tirh pawh a ka rilrua awm reng chu Pu Deputy Speaker, kan sawina engah hian kan vei, kan duh, mahni lam pawhin kan tih tur kan ti dawn a ni tih in dap chungin sawihona engah hian duhtawk ta ila, hnawl pawh ngai lovin, pass kher pawh phut lovin ti ta ila. Pass ta ila kan nawr tur ber pawh chiang chuang si lo. Ka sawi ang khan a rawn pulut tu, i veilama mite hian, E' Pu Narendra Modi-a hnenah kan nawr dawn alawm an rawn ti bawk silova. An pu berin, e, nangmahni pawl ami kha ka ni tawh a, nangmahni zing ami kan ni ngei tawh a ti a ziak meuha kan flagship programme min zu hek pah pawha a zu ziahna te kha an ni a, tlatlum deuh turah chuan ka'n ngai deuh a, keini ngawt ai chuan.

Chungvelte ka'n chhut a, ka'n ngaihtuah mai mai chuan helai bawrah hian ka rilrua a chenve danah chuan pass phut kher lo hian sawihona engah hian mover zahawm tak pawh hian rawn duhtawk mai se ka duh khawp mai. Chutihruah chuan pakhat sawi leh ka duh chu, kan leihlawn zawn theih kan neih ang ang ah te pawh hian mi rama an tih ang te hian chhiah kan lak te pawh hi a hun ve tawh in ka hria. Weigh bridge ni se kan nei mumal bawk si lo, hengah te hian department chu an tan a ngai tawh thung a ni. Weigh bridge, motor lian kawng ni se khawvela motor lian ber ber ten kan kawng min paltlang tawh bawk si, car te vawi 1000 rah aia an vawikhat rah na zawk ang deuh te hian min han paltlang a ni tawh si a. Chhiah, leihlawn an rawn paltlang man a ni emaw, khatiang ang eng anga rit nge an phurh tih pawh buk hlei lova min paltlangna

hmunah hian, heng lamah te hi chuan Department lamte hi chuan hma lak a tihchak chu a pawimawh hle in ka hria a. Chungvang chuan, heng ang thilte hi chu kan sawi tel talh duh a ni.

Pu Deputy Speaker, hun tha tak kan neihah hian, mipuiten inkalpawhna kawngah kawngpui chhia avanga harsatna kan tawh mek sutkian thuai a nih theih nan hian, kan zavaiin a MLA-ten hma kan hruai theih naah chuan hruai ila. Heng kan Department-a HIV/AIDS lam enkawltuten kan ram tana hlauhawm, a tha lo a ni tih hria in MLA-te hnenah ₹ 1 lakh theuh in thawh thei lawm ni minrawn ti a, kan thawh theuh ang khan, keimahni pawh hian mahni bial theuhah heng ang atan te hian, kan fund atang te pawh khan tan han la thar ve leh ta ila. Chutiang chuan, a tihhmuh tu ah House member-te hi kan tang a nih chuan bul tanna leh nawr tur kan nawrna turah pawh hian awmzia a nei ang tih ka ring a. Member zahawm takin he resolution a rawn putlul hi kei ina kan sawi ve duh danah chuan, Pu Deputy Speaker, pass tur pawhin dil tawh lo mai che sela, sawihona engah hian duhtawk sela, tin, keini lam pawhin thusawina hun a eng a, a mover ber ten an duh a nih chuan kan ban tamna hmanga hnawl kher ngai lo hian, 6 leh 31 chu a intam hleih ropui mai si a, Chiang sa reng a ni si a, chumi ngai lo in, kawng chhia hi kan vei tak tak tih hria in, keimahni in bul i tan ang aw ti hian dar 4-ah min tin pui mai la, a tawk mai lo emaw ni le ka ti a ni, Pu Deputy Speaker. Ka lawm e.

\*Speech not corrected

**DEPUTY SPEAKER** : Pu Lalrinliana Sailo a phar a. Kan sawm hmian member-te, hei hi kan nilenpui thei tho a, a nih loh chuan resolution pawimawh tak tak dang a la awm a. Heng a dang hi sawi hram ang kan tih chuan kan insum deuh tawh te pawh a ngai ang a, kan lak hman dawn chuan. Amaherawhchu, member-te zalenna erawh chu kan inrahbehsak loving a, sawi duh kan awm chuan kan inko zel ang. Pu Lalrinliana Sailo a phar a, a dawtah Pu K. Lalrinthanga.

**Pu LALRINLIANA SAILO** : Pu Deputy Speaker, ka lawm e. Kan resolution hi kan hria a, member zahawm tak Pu Vanlalzawma rawn putlul “Mizo mipuiten inkalpawhna kawngpui chhia avanga harsatna kan tawh mek sutkian thuai a nih theihna turin chak leh zualin hma lak ni rawh se.” a rawn ti a. A move-tu te leh i veilam ami pawh hian an rawn move danah helam pawh a rawn kheng lova, ngaihtuahna intawm nei niin ka in hria a, resolution tha tak pawh a ni a. Khawvel ina a hriat, vawiina kan vaia kan hmuh, ruah nasa lutuk ina min han nuai hi kan tawrh tlan a ni a.

Hmanni ah Assembly Committee kan zin a, kan rawn hawng chu Republic thlanmual a lo chim a, a lo thler duai mai a, ruang 37 vel lai kha a rawn len chhuak a ni a. Ka ngaihtuahna ti hian a awm mai mai a, khawvel hi a van ho ve aw, kan ti a. Kan rual u lo kal tawhte leh kan thian boral hnai te, khangte pawh kha a rawn len chhuak nawk nawk a. Chutiang chuan, Mizoram hmun hrang hrangah nasa takin ruah a sur a, lei a hmin zeh zuih a. Kelkang kalte kha, chho lam leh haw lamte kha kawngah hian an intawk, kawng chhakah hian an sir bem bum hlawn mai a, lei a hmin lutuk a. Ka rilru a awm hmasa ah chuan khawilai kawng mah hi a him dawn lo

anih hi a, tih kha a lang sa ve mai a, keini mithiam lem lo pawhin. Chuvangin, a ram pumah kan ngaithla a, Mizoram pawn thlengin; khawvel lum, global warming, khawvel awmdan dik tawh lovin a a ken telah mithiamte chuan an ngai a, tun ang renga ruah tam hi a awm lova. Chu chuan kawng an ti zawp ta a ni a, motor zang te te pawhin a rap dup vek mai a. Kha kha tlang hriat anih avangin i veilama mite resolution, a thuah pawh hian an rawn dim hle in ka hria a, an sawinaah pawh nangmahni vang a ni e ,tih tawpte kha awm lova, a mawiin ka hria a. Chuvang chuan, kan ngaih pawimawh tlan a ni a, natural calamity kan ti thei mai awm e, chutiang chu kan dinhmun a ni a, kan vaia duh loh. Tin, hei a changtu kan Chief Minister zahawm tak pawh hi, kan ngaithla a, theihtawpa hemi kawnga hma la a, a sulsu a ni a. Ani tan pawh, a Chief Minister ber leh a Department changtu tan pawh, a dik tak chuan a hrehawm viauin ka ring nghe nghe, chungte chu a dinhmun a ni a.

Chutih rualin, Pu Deputy Speaker, kan sawi duh chu hetia kawngte a lo chhiat hian ngaihtuahna a lo kal lo thei lova. Kawng kan neih chhun ang te hi a rim lutuk a, entirnan, Lawngtlai kawng pawh saw chhia kan ti a ni, a dik chiah mai. Amaherawhchu, kawng dang helna a awm lo reng reng a, traffic saw a rush lutuk a. Hei ri ka hriat danin, thlang lam atangin han kalpawh tirta an tum chho a, sawmi Sittwe lampang panin, NGO-te pawh khan an lo dang deuh ni te pawh khan kan hria a, kha lam kha kan ngaihtuahna hi zau hak se tha in ka ring a. Kan kawng neih chhun ang hi a rim lutuk a; duh vang reng ni lova ruah bawhawk leh ruah bang thei lovin min han nan chiah tak tak chuan kan vai tawrh ta tlat mai thin a. Chuvangin, PWD hotuten kawng dang an reh tur emaw angah hian, Dampui lam pawh chutiang tho chu niin ka hria, a paw ka ti thin a, ka ngaihtuahna a lo kal ve thin a, a paw ka ti khawp mai. Chuvang chuan Mizo mipui, NGO angte pawh hian, ngaihtuahna zau tak kan neih a tha in ka hria. Chu chu pawimawh ka tih thu kan sawi a ni.

Tin, tunah pawh hian kan resolution awm leh tur, sawi hman ta ila chuan, “Central sawrkarin India ram state hnufual bikte special category status a pek thin tawp ta hi chhunzawm leh ni rawh se” tihte pawh a rawn lang chho va. Chutiang taka ram kilkhawr leh dinhmun tha lo kan ni a, keimahni chauh ni lovin, tunah hian state 11 lai a ni a. Chutiang taka dinhmun chhia kan ni a, kawng maintenance-na tur pawha sum duh ang kan hmuh loh lai hian, ka ngaihtuahna ah a awm a, Pu Deputy Speaker, tuna kan kawng hlun ber kan neih, Silchar atanga Aizawl rawn panna hi, sapho hun lai khan, voluntary-a an tlawmngaihna a an rawn lai hka a ni a, Assam Tea Board-in an rawn lai hka a ni a. Chutiang atanga kan kawng neih hmasak ber pawh hi tan a ni a, chuvang chuan, hetiang anga ram rethei, ram intodelh lo hi chuan engemaw kan tih ve te a ngai tawhin ka hria a. Hei kan hotupa zarah foreign-te, hmun hrang hrang kan han kal a, India ram ngei pawh hi a ni a. Toll system ang chi, toll road-te pawh hi kan tihte pawh a hun tawhin ka hria a, engemaw ti a kan lak ve a ngai a ni. Hei hi na lo, tam lo te te a kan lo khawkhawm khan, hei hi politics-a innuai na ah leh innam chi ah pawh ka ngai lova, mipui ina contribution, participation kan neih ve te hian neitu nihna thinlungte hi a lo piang chhuak chho a. Chuvang chuan, toll road kan tih ang chite pawh hi siam ve a ngaiin ka hria a. District tinah emaw, khawimaw laiah, Lunglei lam a ni emaw, khatiang khanin, khang khan sum kha a lo inkhawh chho ve ang a, central mithmuhah pawh

hetiangin kan theihtawkin kan ti ve a ni, kan tihna turte pawh hi kan siamte pawh a hun ve tawhin ka hria a.

Tin, Pu Deputy Speaker, chutih rual chuan, quality control-ah hian kan uluk leh zual a ngaiin ka hria a, kan member-ten an sawi tawh a. Hei lung kan nei tha lova, materials hi kan nei tha lo em em a, kan hriat tlan a ni a. Khu Bangladesh-ah khuan kan zu kal a, kawng an nei tha em em tho mai a ni. Anni chuan, hemi Chittagong thlengin kan zu kal a, Cox bazaar thleng, an ramah lung tha a awm loh avangin, Meghalaya lung leh Assam lung an rawn ring a, kha kha an thlen mai a ni. Vawiinah hian kan lung quality that loh avangin, a dik tak chuan, kawng hi kan nei tlo thei lo niin ka hria a. Motor lianten an han rap a, a lo huh bawk si a, a sawm zeh zuih a, a keh awl em em mai a ni. Quality-ah hian kan PWD-te pawh hian leh contractor-te, hei chu kan insane mar leh zualna tur kawng pawimawh tak niin ka hria a, helai hi ka rilru a lian ve em em a ni.

Tin, tuna kan system, nichinah kan member-ten an sawi tawh a, kawng kan siam danah hian Engineer leh keini laymen hi ngaihdan a inpersan tlat lai hi sawi ve ka duh a. Tuna kawng black top an han tihdanah hi chuan, a dik tak chuan, a thingtlangpa pawh kan ni, Aizawl mi pawh kan ni, a zawhtu motor driver pawh kan ni, kan inlung rualna tlat a awm a, chu chu tuna kawng an siamdan, black top dan system hi hmanlaia BRTF ho ina an tihdan, a hnuai ah sub-grade preparation chu tha takin an han ti a, a chungah lung boulder lian tha leng lawng an han ngir khup mai ang kha, khatianga an han tihchhoh kha Mizoram angah hi chuan a tha zawk a nih hi, a practical-in, tih hi laymen-te ngaihdan a ni. Pu Deputy Speaker, a dik tak chuan tunah hian an hnialna ah chuan, technical-ah chuan, tuna an black top dan ang system hi kawng smooth leh tlan nuam leh, a tlan dan nuam zawk leh tha zawk leh elevation hrang hrang atan pawh tha zawkin thiam takin, technically-in, min hnialthla thin a ni. A dik pawh a dik ang. Amaherawhchu, keini ang ram, ram chhengchhia, tin, speed sang taka tlanna hi a awm lo reng reng. A tak takah chuan tuna kan Sittwe kawng kan tih Multi Modal Transport kawngah pawh sawn, double lane kan han neih hmasakah pawh sawn, darkar 1 a Km 80 in kan tlan dawn lo reng reng. Khutiang ram plain, zawl, ah duhtawh a tlan theihna ang leh keini ang hi chu la compare loh fo tha in ka hria a. Chuvang chuan, engang pawn kan tlangram kawin nik nekah hi chuan kawng hi double lane pawh ti tehreng ila, darhar 1 a Km 60/70 bak kan tlan theih ka ring lo a ni. Chutiang ang a nih avang chuan, hman old approach kan tih zawk, an phah dan hlui zawk kha a that fo hi kan ring tlat a ni. Hei a hmuh theih reng a, tuna an tihdan system-ah hi chuan wawi 1 a rawn hawrh tawh hi chuan, a hawrh zel a, lo intangmar leh lo inpawtmar tur leh lo indo khawng tur kha a awm tawh si lova, chu chu Estimates Committee-in kan Chief Minister zahawm tak pawh hi sawipui kan tum a ni. A tha zawkin kan hre tlat, kan hmuh ve danah leh reaction kan neih danah hian, feedback kan han hmuh danah hian. Engineer-te duhdan leh an zirchhuah dan chu a ni lo maithei, mahse Mizorama kan kawng atan hi chuan a pawimawh tlat a ni. Tichuan kawng wawi 1 an hawrh tawh chuan, a hawrh zel a, a khuar zel a, a khuar ta dawh mai a, a kal zel a, lo tangmara, lo dotu kha a awm si lova. Chuvang chuan, hman laia PWD lo tih tho, BRTF-in an tih ang tho kha ruahin a rawn hawrh ve a, lo chilmuk that kha chu lungin a lo do run mai a, a leuh rulh mai a ni tui kha. Chuvangin hemi



mualphona ang lutuk, ti luaih luaih leh a chirh lutuk ang chi hi a awm lo lehngal a. Hei hi tha zawkin mipui leh driver-te ngei pawn an sawi dan chu a ni tlat mai a, churang chuan Pu Deputy Speaker, helaiah pawh hian central-a 'norms' an tih entirnan-CPWD norms leh Indian Road Express a lo nih pawhin helai hi chu Mizoram atan chuan a practicable zawkin a lang tlat a ni.

Tuna an tihdan ang hian GSB-te an han phah ta a, lei thil or lungthil nawi kha an han compact ta a, mahse a compact zo tak tak lo. Churangin tuiin a rawn chiahzawp tak tak kha chuan kan vai chhiat ta a ni. Chu chu PWD-ten an tih dik loh a ni hauh chuang lova. A system fuh lo zawk emaw ni chu aw, kan han tih lai leh chung ang kan duh loh ruah nasa tak maia min rawn thlur takah khan, zep thu awm lo, kawng a tha tihruah a ni lo.

Chutih rual chuan an fakawm tihna lai pakhat chauh ka sawi ve duh chu kan ngaihthla tawh a, a then then. Kan PWD-te chuan tan chu a la a ni, tang tak chu an ni vein ka hria a. Tin, ngamlaka han phone lawp lawpte pawh kan nei a, tiang khan hma hi chu kan sawn ve zel chuan ka hria a. Tin, tuna an han system thar leh cell fill phah pawh hi Pu Deputy Speaker, a dik tak chuan a hlawhtlin ka ring lo. A chhan chu- a tirah chuan ni 30 kha rah miah loh tur a ni a. Km.20 te, Km.15 te an lo cell fill ta a, kha kha a tirah cement kha han chhung se, khatiang khan ni 30 pawh lo ni tehreng se, a kal zel a kal zel a, a kawng tawpna thleng khan, kum khat hian a daih lo reng reng a ni. Churang chuan a system hi kawngthar diaka tih chuan a that ka ring a, zawhlai tawh chuan a hlawhtlingin ka ring lo.

Amaherawhchu, chu kawngthar sial kha tuma la tlan loh laiah khan tise chuan, tin, experiment/test a ni e, an ti a, a dik tho in ka ring a. Vawiin ni angah hi chuan a hlawhtlin vak ka ring lova. Chungte chu anmahni thiam loh ni lovin new approach an rawn tihchhuah kha a ni a. A pawimawh ka ti a, chungte chu ka'n sawi a, Pu Deputy Speaker.

Kan Resolution hi mi pawn nem takin, inthlahrung takin an rawn ti a, a pawimawhna kan sawi tlan hi a tawh hle lawm ni, inphar thlak emaw ai khan hei hi a tawh mai e, kan Chief Minister pawh hian helai hi a stress chho em em a, kan hria a. Chutiang chuan a huhovin Delhi-te pawh khawng, NDA thawhpui kan nia lawm, tih te pawh kha, chung sullnute pawh kha han hre leh ila a tha zawk lawm mi, ka ti a nih chu Pu Deputy Speaker, ka lawm e.

**DEPUTY SPEAKER** : Tunah Pu K.Lalrinthanga i lo sawm ang.

**Pu K. LALRINTHANGA** : Pu Deputy Speaker, ka lawm e. Vawiina Private Members Resolution sawiho turah hian tam vak lo sawi tur nei vein ka inhria a.

A hmasain resolution puluttu thlawp deuh ang zawnga han tarlan ka duh chu Mizoram hian kan kalkawng neih reng reng hi ka hmuh dan chuan kalkawng zawl tha lai apiang hi metal a chhe hmian ka hria. A chhan leh avang enge ni, tiin ka ngaihtuah thin a. Awihltlanah

chuan ruah a surin tui a luangliam a, a chiah lova, kalkawng zawlah chuan tlemin khuar deuhhlekk te hi a lo awm a, chu chu tuiin a chiah a. A raptu motor tlan kha a ngai reng si a, tui nena inchiah kalkawng zawl pheiah khan chuan kalkawng a chhe hma bik niin ka hria a.

Aizawl khawpui chhungah te, thingtlang kawngah te, National High Way-ah te ka tlan tam ve viau tawhin ka hria a. Mizoram PWD-in a siam chi kalkawngah reng reng chuan an inren lutuk a nih dawn hi te ka ti a. Kalkawng tui tling lova siam pum zo lovin tui tling theiin an siam a, chuvang chuan kalkawng hi a chhe hma niin ka hria. Chulaiah chuan hma kan lak deuhhlekk chu a ngaiin ka hria a ni.

Chuti tihlohah chuan kan resolution puluttuin a rawn putluh chhan ang hian a thlawp zawnga han sawina tur hi ka hre tehchiam lova. A awmzia chu nichina ka hmaa sawituin a sawi ang khan Mizoramah Lung kan nei tha lova, PWD a ni emaw, BRTF an ni emaw, kawng siamtu dang an ni emaw hmun hrang hrang amite an kalkawng siam en hian an lung hman hi lung tha tak (Mizoram ami ah chuan) a awm lo reng reng a ni. A then pheih chuan lunguk tlema motor lian deuh pawhin a rahkeh theih mai tur awm ang hi an hmang thin a ni. PWD kher lo pawh kan ngaihtuah tel a ngaiin ka ring a.

Lungdai atangin Serkhanah, Kawnpuih kan chhuk thla thin a, khulai kalkawng an enkawl metal an tih te, kawngthlang lungremah te, kawngchhak lungremahte an hmanraw hman khu a chang chuan mobile phone hian thla ka lak sak thin a. An lung hman hi Mizoram lung a ni a, a chhe angreng a, hetiang chuan a tlo vak dawn lo a nih hi ka ti a. Nichina kan member zahawm takin a sawi ang khan, lung tha hmang tur chuan Mizoram pawn a ni emaw, Mizoram chhungah tlem azawng khawi lai laiah emaw, tlema lung chang ve deuhthe chu a awm a. Chung lung chu la thei tur hian estimate-te hi siam thin nita sela, pawisain a daih chuan kalkawngte chu a that theih deuhhlekk a rinawm a ni.

Hei, fur ruah tui a sur a, Mizoram pumah ruah sur nasat zia kan hria a. Tun October thla pawh nimin thlengin zantin deuhthaw a sur a, a changin chhunahte a sur a. Hetiangte a nih avang hian ruah a sur nasat luat tuk chuan lei a lo hmin tawh a. Hmun tam takah kawng chungte a lo min a, chu chuan kawng a ti diak ta a, lei a lo huh rei a. Chutia a huh rei na na na chuan motor-in a rah pawn a chhe hma bik a ni.

Ka hriat danin state dang Assam huam chhungah chuan motor lianpui pui tunlaia motor rit tak tak phur ho hi weight bridge-in a rih zawng an en a, a rit lutuk chu kalkawngah khan an tlan tir phal lo a, tih te a ni a. Nimahsela, Lailapur tih vel atang leh Bairabi atangin Truck lianpui puiin kan kalkawng awm nem tak hi an rawn rap a. Chuvang chuan nasa takin kalkawng hi a chhe hma a ni tih hi kan hriat tlan a thain ka ring a. Kha kha PWD-in a mawh pawh a ni chiah lova, administration-in an kenkawh turah ka ngai a. GAD a ni emaw, khatiang khan, hnathawktute lampang kha kan mawh turah pawh niin ka ngai lem lo. Fur ruah tui nasat kum a ni tih hre vek kan

ni a. Chuvang chuan kalkawng pawh a chhia. Tun a taka Sorkar han tur vak hi a tul tehchiam em mi tih hi a ni. Keini kalkawng Vairengte atanga Phainuam kalkawng pawh hi a lei a nem a, ruahtui a tling nasa a. Kum tinin Vairengte leh Phainuam inkar chu kal hleih theih lovin a awm ziah a. Tractor nei, tlawmngai deuh an awm chuan an tlan tlang mai zel a. Chutiang chu ka bial neih chhun a ni.

Sorkar hmasa, Congress Party a Sorkar hma a Sorkar hmasa hunlai te pawh khan chutiang tho chu a ni. Tunah erawh thung chuan, Sorkarin National Highway atan puang a. Department-in estimate siamin metal an tum a, chutiang chuan kan nghak a ni mai a. Khatiing chi kha tuna lo nawr tehchiam kha enge a tulna ka ti a ni. Chutiang deuh chuan, he Session lai ngeiah pawh kan hriat angin kawng tam tak siam thatna tur atana sanction kan neih te a awm a ni a. Chuvang chuan siam tha turin Department-in ruahmanna a siam zel a, a tha mai dawn a ni a. Chuvangin tuna ruahtuiin kalkawng a tihchhiat lai taka nawr tehchiam kha tulin ka hre hran lo a ni.

Thil pakhat ka sawi leh duh chu, Mizoramah hian kan Contractor te hi an la Hausa tawk lova. Kalkawng siamtha tur hian Mizo Contractor te zing atang hian Metal Work thawk thei hi an awm mumal lo a ni. Sorkar term kal ta chiahah khan PAC ah kan awm ve a. Chumi PAC member kan nihna ang chuan, PWD kalkawng siam tam tak kan en a. PWD ten a an harsatna kan hnena an sawi chu, tender an call a, State dang atangin an rawn chhang a, Mizoram dinhmun an hrechiang silova. Hniam te tein an chhang a, hmuh ngei tumin, chuan, an han hmu ta cheng a, Mizoram hna rawn thawh an tum, anni tan harsatna a lo thleng leh ta si a. A awmzia chu Mizoram atanga hna han thawk tur chuan an ramah, thil lakkhawm a awlsamna an neih avangin tlawm tein (schedule work rate ai hniamin) chhan pawh khanin a convenient viau a ni. Nimahsela, Mizoram angah chuan, thil lakkhawm a lo harsa a, kalkawng te a lo chhia a, siam lem lo te pawh a lo awm hlawm a. Chutiang te a nih avang chuan harsatna namen lo an lo tawk a. An tum angin an thawk thei lova ni.

Kan kal kawng neih te hi project siama, siam tha tura ruahmanna siam a lo ni thin a. A pawisa tih tam theih a lo ni tawh bawk si lova. Harsatna an han tawh khan kawng siam lovin an awm chho a. A contractor then chu an in withdraw phah ta a. Chutia an withdraw chuan, a pawisa a ngai reng a ni si a. Tender dawn ila, a ai sangin pawisa kan pe thei bawk si lova. Department te nena harsa taka kan thawhte hi a ngai leh thin a ni, an ti. Chutiang te a nih avang chuan, PWD tanah pawh hian harsatna tam tak a awm a ni tih hi ka tarlang duh a ni.

Adang leh chu, tuna kan Resolution puluttu party te hian, in hriat ka duh chu, engatinge ni National Highway te, BRTF ten an enkawl lai, Mizoram Sorkarin a lak turin an Sorkar lai khan, ngenna, (dilna) an lo siam ? Mizoram PWD Staff indaih lo tak enkawl turin National Highway zawng zawng, PWD lak tura an dil kha PWD Staff ten dan theih a ni tawh bawk si

lova.PWD enkawl sen a ni tawh si lova. Chuvang chuan kan kal kawng te hi tha takin an enkawl theih loh a ni tih hi in hriatchian ve ngaiin ka hria.

Tin, thil pakhat leh chu, kan Resolution puluttute hian, he resolution hi propaganda atan an ti mai mai niin ka hria. Kalkawng tha tak tak hi an duh lo emaw ni chu aw, tih zawnga sawi theih tur chu a ni. Sorkar hmasa ah khan, Champhaiah, Awmpui pheiah, hmun hran ami chirhdiak an la, kalkawngah an chhung a, buh an phun a ni. Kalkawng hi chhia se, an duh em em a ni. Engatinge chhia se an duhna chhan chu, Sorkar sawisel nan. Khilala buh an phun pawh khan, Camera-in an la a, T.V. ah an rawn tilang a nih kha. Chutianga sawiselna tur atan chuan an duh a ni. Tunah pawh hian chutianga atan chuan an ti a ni, tih hi ka ngaihtuah dan chu a ni. Chuvang chuan mahni in en let a ngai, tih kha ka rawn sawi duh dan chu a ni e. Pu Deputy Speaker, ka lawm e.

**DEPUTY SPEAKER** : Le, tunge sawi ve leh ang ? Pu Lalthanliana

**Pu LALTHANLIANA** : Pu Deputy Speaker, ka lawm e. Kan Resolution “Mipuite inkal pawhna kawngpui chhia avanga harsatna kan tawh mek, sutkian thuai a nih theihna turin chak lehzualin hma lak ni rawh se,” tih Resolution hi Resolution tha tak ni ah ka ngai a. A tha ka ti a, pawm mai te pawh kha ka rawt nghal a. Kawngpui chhia tih te, kawng chhia tih te hi chu i ding lam ami te pawh khan Pu Deputy Speaker, an pha lova, an pawm niin ka hria a. Amaherawhchu, leh lampang ami te thiltih a nih avanga han tih deuh duak kha an hreh deuh angah ka ngai mai a. Tin, thil kan han sawi hian, Pu Deputy Speaker, tun hun hi a pawimawh berah chuan kei chuan ka ngai a. Hmanlai thil te kan sawi a. Khawvel a in tanna tihte sawi phei ila, a rei tawh lutuk a. Chhura hunlai atang pawh nise, kan kawng te hi engtik hunlaia in tan pawh nise, waviin a kan ngaih pawimawh tur chu, tun hun thil thleng mek ah hian kan innghat turah ka ngai a. Bible pawhin tun hun hi a ngaih pawimawh ber niin ka hria a. Hun lawmawm a tih pawh hi tun hun hi a ni tlat mai a ni. Chhandamna ni a tih pawh hi tun hun tho hi a ni a.

Chuvang chuan tunah hian kan kawngpui te hi a chhia a, harsatna te min thlen a. Chu harsatna te chu a lo kian theihna turin chak zawkin hma ila ang u, tih kha a ni mai a. A thu kha a huatthlala awm lovin ka hria a, a tluangtlam a, a pawmawm khawpin ka hria a. Chuvang chuan, kan thlen chin atanga hmasawn zel tur kan ni a, Hemi chungchangah hian hma i la ho teh ang u, tiin kan rawn thlen ni maiah ka ngai a. Resolution tha tak niin ka hria a ni.

Tin, fur te pawh hi, Pu Deputy Speaker, kumtin hian a rawn thleng ziah a, kumtin hian fur a awm a, thal a awm a. Ruah sur tam kum te a awm a, tlem kum te a awm a. I he lova thil thleng a ni a. Hei hi kan mawhpah ber tur a chu a ni dawn em ni, tih te ka ngaihtuahnaah chuan a awm a. Tin, fur laiin kawng te a siam theih lohva, a tlangpuiin kan lei te hi a hnip a. Lung te phah ila, an rap tlum zel mai a, fur ah han siam dawn ila, fur lovah kan siam hman tak tak si loh te hi a buaithlak a. Thil te chu hunbi nei a ni a, a hunbi zela kan thawhna turah hian tan kan lak tlan a

pawimawh em em a ni. Er. Rinawma'n a sawi tawh a, a hun taka kan chet kha a pawimawh a, chuti anih loh chuan furin min nang ang a, kha kha chhuanlam tur chu a ni tho na in, mahse chhuanlam a ni vek thei dawn em ni aw tih kha ka ngaihtuah a ni.

Engpawhnise, sorkar lai mek mawh pawh a ni bik lova, kan ram chu kan hria a, kan thu vek pawh a ni bik lo, amaherawhchu, tan kan lak tlan chuan sorkar meuhin Assembly Session-ah meuh hetiang resolution te hi chu han pass ila awmzia chu a neih ka ring a. thil hrim hrim hi a ti tu tur awm deuh hi kan awm a, kawng siam te pawh hi a nihna takah chuan mipui hian siam luai luai mai ila NGO ten kan tih tur hi a ni angem? sorkar mawh hi a ni zawk lo maw? tih hi ka ngaihtuah a, vawiinah chuan kawng te a chhia a, NGO hrang hrang ten an siam tha a, an hnatlang luai luai a T.V. a en theih tura an tih kha chu thudang ni se. Sawi sawi mah ila sorkar tih tur ah hian an dah ka ring tho mipui hian. Ram khua leh tui kan ni a, kan tih tur chin chu a awm tho ang a. Amaherawhchu kawng te repair a kawngpui chhia te hnawh hi chu sorkar tih turah hian an la ngai deuhin ka hria. Chuvang chuan hetiang a tlawmngaih chhuaha anmahni an lo in hai kua te hi chu an tih tur zawk an ti alawm ti ang zawng deuhva sawi ang hi kan ni deuhin ka hria a, an ti tha viau thin a, TV ah te pawh an han in tilang a, lawmawmah la mai ila, a tha a. Heti khawpa kawngpui chhia kan neih a mutmawh hnarmawha kan neih loh chuan a buaithlak awm mang nge e aw tih te ka ngaihtuah a, kan tih loh tur a eng a hi nge maw kan vei ang aw tih ka ngaihtuah a. Ka hma a MLA zahawm tak sawi raw-material lungchang tha te, rawra te hetiang hi chu ni e kan ramah hian a chhe ta riau mai a, rawra tur pawh duhtusam te kan hmu tawk tawh lova, lung tha hi a vang em em mai a ni. State pawn atanga chawk luh dan te hi ngaihtuaha ruahmanna kan siam te hi a tha awm mang aw ka ti a ni.

Kan ram kawng te hi chu motor a tlan tlem em em mai a, Silchar leh Shillong inkarah khuan zan khat chu ka tlanin Lungalhthei phur motor kan chhiar chu a tam leh lutuk a a rit hlawm si a, a lian hlawm si a, mahse kawng te khu a tha em em a, khungte khu an maintain thaah ka ngai mai a, kawng a rim pauh leh kan siam tha telh telh turah ka ngai a ni. A siamthat hnaah hi chuan a mawh hi kan phur tlang a ni. Chuvang chuan kan infuih thar lehna te poh a ni ang a, pass lova liampui ngawt ai chuan pass tlang ta ila kan resolution hi tiin kan thlawp a, chu chuan keimahniah pawh awmzia a nei ang a, kan that phah zawk turah ka ngai a ni. Chungte chu tawi tein ka'n sawi ve a ni e, Pu Deputy Speaker ka lawm e.

**DEPUTY SPEAKER** : Kan duh tawk mai thei tawh em, Pu Lalruatkima.

**Pu LALRUATKIMA** : Pu Deputy Speaker, ka lawm e. Hei vawiinah Resolution tha tak mai kan Member zahawm tak Pu Vanlalzawman mipuiten inkal pawhna kawngpui chhia avanga harsatna kan tawh mek sutkian thuai a nihna turin chak lehzualin hma lak ni

rawh se, tih a rawn pulut hi a lawmawm hlein ka hria a. Chulaiah chuan eng harsatna nge inkalpawhna kawngpui chhia avanga kan tawrh tih hi ka ngaihtuahnaah chuan a awm a. Zoram mipuite hian kan kawngpui a chhiat avangin North Vanlaiphai Pastor bialte chuan naupang inkhawmpui September thlaa neih tura an ruahman te chu October thlaah an sawn tih thu te chanchinbuah kan lo hmu a. Thorang bial lamah te buhfai duh anga an phurh theih loh avangin kawng chhia avangin JCB in a phurh thu te pawh nimin lamah kan sawi tawh a. Tin, Sumo ten an service lai an tlan that duh loh avangin ei leh barah harsatna an tawh kan hre vek a, chutiang chuan khual vei vak hrang hrangten harsatna kan tawh mek a ni a. MST Bus service na ngei pawh a route te pawh kan han cut then ta a, chung ang zawng zawng chu a chhan ber chu kan kawngpui chhia avanga mipuiten harsatna kan tawh hi kan sorkar hian theihtawp chhuahin tan han la leh sela, chutah chuanin kan harsatnate hi sutkian theih a ni ang tih thu a tlangpui a han lak khawm chuan a ni a. Chulaiah chuan tunhnai maia kan kawngpui hi chhe ta ang lek leka kan ngaih kha kan hriat fuh tawh loh vangah ka ngai a.

Pu Deputy Speaker, 13<sup>th</sup> July, 2011 khan Mizoram Road Maintenance chungchang hi PWD Chief Engineer-in in press statement a lo siam tawh a, chutiang chaun kawngpui chhia tunlaiah chanchinbuah a lo lang nasa pawl thenkhat hnatlanga kawng chhe siam te an awm thu te pawh a rawn ti daih tawh a ni. Chuvangin, November ni 21 ah Private Members' Resolution Dr. K. Beichhua'n Mizorama kawngpui leh lei chhia siamthat a tul thu te a rawn ti bawh a, ama'rawhchu khang kha a tlang ta lova, chuan resolution hetiang hian tunah 5 kan sawi tawh a, chutah chuan ruling lam resolution vawikhat chiah kan la sawi a. Ka ngaihtuahnaah chuan opposition kan nih avanga vannei pawh kan ni chiah chuang lova a hmasa pheikha chu ruling inthlahdah zar kan zova an thehluh ve loh avanga resolution kha tlang mai chauh a ni a pawh fuh a nih avangin. Chutah chuan in dem tawn mai lovin theihtawp chhuaha tan lak a ngai a ni tih hi a ni a.

Starred question 107-naah khan Mizoram Road Maintenance Fund atan NH 400.86 lakhs 2014-2015 chhung khan dah a nih thu kan hmu a, State Road ah 4204.8 lakhs dah anih thu kan hmu a. Chung ang zawng zawng chu Mizoramah hian kawngpui kan nei thui em em mai a, a bik takin Mizoramin kawngpui kan neih danah te han chhut vang vang hianin tun dinhmunah chuan statistic te kan han en chuan Mizoramah hianin kawngpui hi 7500 vel kan nei a, chumi enkawl nan chuan kan sum neih te hi a tlem deuh chu a ni tih hi ngaihtuahnaah chuan a awm deuh va. Chu mai piah lamah Pu Deputy Speaker, kan annual rainfall te kan han chhuanlam a statistical handbook te Mizoram statistic te han en hian kuminah hian ruahtui tla a tam chuang lo ani. Heta tanga 2011 ah pawh kawng chhia an hria a chuvang chuan tan kan lak a a mawhphurtute tute pawh kan ni tlang a ram rorelna hmuna thutlang hian mawh kan phur a theihtawpa tan kan lak tlan a mipuite harsatna hi i chhan chhuak teh ang u kan han ti a ni a.

Nikum November ni 21 ah kawng chungchang kan sawi a, a that thu kan Member zahawm i dinglam a miten an sawi laiin an bial kawng a chhiat thu kha PWD demand ah chuan an bial kawng siamthat a ngaih thu hahipin an sawi leh si a an ngen tluar tluar a, khatiang te kha kan ni a. Tun hun hi a ni dawn lawm ni zawk, kan kawng chhia te hi kan sawi anga kan harsatnate leh a tha zawk turte kan sawi khawmna tur tih kha ka ngaihtuahnaah chuan a awm a ni. Chung ang zawng zawng chu a siam dan system that loh chungchang leh a method te pawh kha ni e tunlaih te chuan GSB WMM te kan han ti a Self Scream Cement Concrete method thar te pawh a lo lang a, chulaih chuan tunhnaiah N.Vanlaiphai lamah Sailulak lane kawng te, German method te kan han ti a. Amaherawhchu, alo fuh hauh lo mai a ni, kan hmuchiawng viauin ka ring a thlalak te pawh kha. Chung angte chu kan ram mil hian kan mithiam zawk te hian ngaihtuahna kan hmang anih loh chuan kan sum leh pai tam tak helaih hian, kawng siam nan hian a luangral tawh a, a luangral mek a. Mahse kawngpui tha kan nei si lo va. Chung ang zawng zawng department te mawhpuih mai lovin keimahni theuh hian mawh kan phur a. Chulaih chuan tan kan lak a tul a ni tih kha kan Mover in a rawn sawi tawh a.

Chuvangin, khang ang zawng zawngah khan a bik takin ka bial chhung Middle Kanaan road khu May ni 20 vel khan an rawn siam a, ni 7 chhung an rawn siam a. Kar khat lekah khan a luang dum duk chuih mai a ni. A chhe leh vek mai a tunah phei chuan siamthat leh a ngai khawp mai a. A sum senso kha a tam si a, a tlo si lo va, khalai a tih tlo dan kha kan ngaihtuah tlan a kan sawikhawm tlan loh chuan, keimahni atanga kan tan loh chuan kan ram hian kawng tha a nei mai dawn lo ni te pawh hian a lang a. Chuvangin tan kan lak hi a tul tak meuh meuh a. Mizoramah kawngpui kan sawi tak ang khan 7548 Kms zet mai kan neih laiin, PWD enkawl chu 5870 a ni a. Chumi piah lamah chuan road density hi 35.80 a ni a. A maintenance atan hian BRO ho hian nuaih chuang 1km-ah an dah a ni, keini chuan 70000/50000 bawr vel kan dah a, a in beitham em em mai a, chutiangte chu kan ni a. Chuvang chuan heng kan kawngpui chhia, BRTF kawng chu a khuar anih chuan a khuar mai, mahse a ziaawm viau a ni, a tha lai awm awm a pawh. Chutiangte chu kan ni a, tan kan lak hi a tul tak meuh meuh a. Zoram mipuiten vawiina kan harsatna tawh mek hi kan chhanchhuak thei dawn lawawm ni? Chhanchhuak turin vawiinni a kan resolution hi kan support dawn lawm ni? Chuti anih loh chuan kar lehah PWD Demand kan han sawi leh ang a, kan bial harsatna kha kan thlen leh tluar tluar hian ka ring bawk si a. Tun hunah chiah hian i dinglam a mite hian tan rawn la ve se tih kha kan sawi duh a.

Tin, a bik takin Tuipui 'E' bialtu pawh khan a Starred Question-ah pawh a bial kawng chhiat zia te pawh kha rawn sawi leh se, Starred Question a a zawh kha a chhuak hman si lo va. Tunah hian rawn sawi lang sela a tha awm mange aw siam a tul zia hi tih te pawh kha ka ngaihtuah naah chuan a awm a. Chutiang chuan MLA hrang hrang ten, kan MLA zahawm tak ten kan bial chhung kawngchhia siamthat a tul thu te kha kan han hria a. (Chair inthlak) Chuvang chuan kan bial kawngchhia te hi theihtawp chhuaha tan la a siamthat hi a tul tak meuh meuh a. Vawiiinah Lunglei-Chhumkhum, Chawngte kawng te pawh siamthat a la ni dawn a. Chutihlai chuan

siamthat hma a an kalna tur te ruahman a ngai a ni. Khawthlang lam kawng pawh chutiang baw k chuan.

Zoram hmuntina harsatna, common problem kan neih hi he House zahawm tak hian a sutkian kawngah hian tan kan la dawn lo em ni? Chumiah chuan kan member zahawm tak ‘W’ Tuipui bialtu pawhin a sawi tawh. Kan lo thlen atanga nikhat hi chu chawlh a ngai, kan kawng zawng zawng hi a kham vek mai, kan kawng a chhe lutuk a tih hi a sawi thin a ni. Chuvang chuan heng ang hi 2011 daih tawh atanga Mizoram road maintenance lo tul tawh kha vawiinah pawh kan harsatna kan la sut kian loh anih avangin Pu Speaker, tan la tlang ila. Theihtawp chhuahin, a thawktute pawhin tun aia tih that dan, State pawn lam atanga a material lak luh dan te, khang ang zawng zawng kha an ngaihtuah loh chuan a tawpa mawhphurtu chu sorkar kan ni lo thei lo a ni. Chumi hunah chuan keini kan ngawih reng a, khawvar kan nghah mai chuan Pu Speaker, tih ngaihna a awm lovang. Kum 2020 lo kalah pawh kan kawng hi a chhe zel mai ang tih hi ka hlau khawp mai a. Chuvang chuan, engtingge tha zawk, mithiam zawk te an ni a, an hre zawk ang a. Chung ang zawng zawng chu ngaihtuahna kan neih a ngai a. Chungah chuan normal maintenance fund crore 11 chauh kan nei a. Chutiang ang vel chu BRO in 1km-ah 15,00,000/- an neih te pawh hi dah tam ve sak kan Finance Minister in a tih dan te pawh a awm lo em ni le ? tih kha ngaihtuahnaah khan an awm thleng a ni a.

Chuvang chuan, he kan ram kawngchhia, mipuiten an tawrhna nasa tak, ei leh barah te damlo a inphurh luh khawpui pan ngaiah te, harsatna chi hrang hrang an tawh te chhanchhuak tur hian keini hian tan kan lak a ngai a. Chumi ti tur chuan he House zahawm taka member te hian kan mipuite, kan Zoram mipuite, JCB a buhfai phurh ngai hial te a bo theihna turin, tuna kan kawng neih that sa hi i maintain ang u. Siamtha turin lungtual tak leh pheikhai rual takin tan i la ang u, tih kha kan sawi duhin ka member pui duhtak te, member zahawm tak tak te kan resolution “Mipuiten inkalpawhna kawngpui chhia avanga harsatna kan tawh mek sutkian thuai anih theihna turin chak leh zualin hma lak ni rawh se” tih hi ka thlawp a, min thlawppui vek turin ka sawm nghal a ni e, ka lawm e.

\*Speech not corrected

**SPEAKER** : Awle, Lady member Vanlalawmpuii Chawngthu.

**Pi VANLALAWMPUII CHAWNGTHU** : Pu Speaker, ka lawm e. Tawi te in, din loh ka tumna a ka bial chung a rawn sawi lan takah chuan din ve tulin ka hria a. Lungdar to Sailulak kawng kha a rawn sawi a. German method hman a ni a, tuilet hnu a khi kawng khi metal vawikhatna tur a ni. Chutah method thar hmanna tur a nih baw k avangin hmalak chak a har hle mai a. Ruahtui a tlak tam chu thuhra nise la, an metal zawh tawh hnu pawh khan ni 14 chung rah lo va awm tur a ni si a. Kawng pawimawh leh mamawh lamna ber a nih avangin ni 14 chung kha rah lovin a awm thei si lo va. Chutiang chu a nih avangin, a hminga bialtu nih pheih chuan hrehawm ka ti thin khawp mai. Tin, a sorkar lai, ruling party nih pheih chuan, tin, sorkar lai tluk a kawngtha neih



duh hi kan awm chuangin ka ring lo. Chuvang chuan hemi buaipui tur te pawh hian PWD lama kan hotute pawh Delhi tlang lamah an kal a. Keimahni thu a a method te kha thlak theih a ni si lo va. A thlak dan tur ngaihtuahin theih tawp an chhuah a. Hei baka chak zawka hmalak dan hi chu a awm vakin kan hre bik lo. Department hotute nen theih angin kan han in nawr thin a. Innawr nasat avanga thawh chak theih kha a ni baw si lo va. Tin, naupang inkhawmpui tur te pawh a hun takah an inkhawmpui thei lo va, a ni te an han sawn phah hial a, a zia lo hle a. Ruahtui tlak leh a method thuah te kan thu a awm si lo va. Chuvang chuan hemi hi paw ka tih thu kha karawn sawichhuak a ni.

Tin, ruahtui tlak tam leh tam loh chu a zia a en kher ngai lo in nimin thlengin ruahtui tlak tam zia chu kan la hre vek a. Hetiang a nih avang hian hnathawh chak harsat zia kha chu kan hre vek a ni. I veilam a mite sorkar lai pawh khan rulngan pa ang zar kha min tiam thin a, tun thlengin an sorkar tawp thleng khan rulngan pa ang kan hmuh kha kan hre bik chuang lo. Chuvang chuan, vawiinah he sorkar chelh mektu Congress kaihhrui sorkarah hian kawngtha hi chu kan duh a, theihtawp chhuah a ni baw a, kan Chief Minister zahawm tak leh a department changtu ni baw hmalakna in theihtawpa chak in hma lak a nih thu hi House kal tlangin ka sawi ve duh a, tin, theihtawpa chak a hma lak mek anih lai a he resolution rawn putluh hi chu a tulin ka hre vak lo a ni, ka lawm e.

**SPEAKER** : Aw, Pu Sangzuala.

**Lt. Col. Z.S. ZUALA** : Pu Speaker, ka lawm e. Nichina ka hmaa member zahawm tak Pu Ruatkima khan tun hmaa Vaivakawna kawng zim te, turning point zimte bichilhte a kan kal mup mup mai thin te kha hman deuh atang khan PWD leh UD&PA kawng zau tha deuh, turning point tha deuh te kan lo hmu ta a. Khungte pawh khu a bial chung a ni a, PWD hmalakna chu a hrechiangtu pawh a niin ka ring a.

Tin, a thlang leh deuh khu han kal ila, Hunthar lei tlahniam khu khu PWD hian an buaipui em em mai a. An schedule a an dah loh, hna lo awm chawp disaster-a khatia an hisap baka hnathawhna leh expenditure awmna a ni a. A thlang deuh kan han kal a khutilai Phunchawng-ah lei an lo lai min baw a. Khu khu englaipawha nawr fai ngai, ruah an sur deuh a a lo tawlh leh a. Khatiang khanin unforeseen disaster hi kan PWD te hian an kep teuh hi a ngai a ni.

Tin, sawtilai ka bial ve Aizawl South-II ah ringawt pawh sawn tun monsoon chung hian Ngaizel saw wavi engzat nge a chung a lei tla hian a rawn hnawh. Tun tum phe chu in pakhat a hnawl thla vek a. Kawng a block a, ka hriat chinah chuan tum 4, chhim lam panga kan kal kawng tha ber saw a hnawh ping hmaw a ni. Chu pawh chu kan PWD te hian ihe lovin an clear thei thin a. Tin, sawmi tlak lam pang Tlangnuam C.P. Road kan tihah sawn pa pakhatin in hmun a lei a, a rawn lai min chiam a, a kalsan leh

daih a. Saw saw perpetual road block a ni ringawt a ni, ruah a sur chuan. Khangte kha PWD te hian an hisapa an telh loh extra work ang reng deuh, khatiang khan kan kawng hi an hmui reng a ni. Kawng pangngai maintain tur chu sawi loh. Tin, keima in ngeiah sawn lei a min bawk a, thing pawm tiat tiat pahnih vel leh mau hung pali vel a hnawl thla a, chu chu sawti laia Mission Venga kan market leh Lungli kal kawng saw tum thum a hnawh a ni. Khangah te pawh khan kan PWD te hian minrawn thenfai pui a ni. Khang kha chu extra-work, chiang kuang deuh hleka ka han tarlan duh a ni a kan bial chung bikah.

Khatiang khan PWD te hian hna an thawk a. Anni hi a chang chuan an black-topping a tha lo ve kan ti a, black-topping te pawh hi han that ngaihna vak a awm lo. Ruah sur chu sawi loh entirnan, inches 4-a chhah a black-top tih tur kha an economized a, hmun danga miin an mamawh puhruk theihna turin inches 2 te pawha han tih ngaih chang te pawh a awm thin a ni. Public interest vek a ni. Khatiang ang condition hnuaihan khan hna an thawh te a ngai a. Chuvangin, PWD te leh kan Minister te rilru a hah hle a, public demand a ni bawk si a. Tichuan, example ka han sawi theih mai chu, Synod compound, kan in bul mai saw an black-top a, tha deuhvin an ti a, an zo chiah a ruah an sur leh char char a, khatiangah kha chuan that vak ngaihna a awm lo. Chuvangin, tuna kan problem tam tak hi a kawng maintain chu sawi loh diasater management hi an ti hi a ni deuh berin a lang.

Chuvangin, hemi Resolution-a kawng han tihthat mai na tura kan pass mai thei tur ang hi a theih loh, an theih ang tawkin hma an la a, hma an la reng chung si a hetiang ang resolution-a han den zui leh kha chu a department tan pawh, “engnge maw min va thamlo em em ve” tihna rilru te a awm thei bawkin ka ring.

Tin, hei kan kawng te pawh hi public hian mawhphurna nasa tak kan nei, foot path te pawh hi a thenin two wheeler lak luh nan, foot path Sorkar, AMC siam tha takte an han lai thla a, two wheeler an inah te lak luh nan an hmang a. Hengte pawh hi public hian thiam lohna nasa tak kan nei a.

Tin, tunah hian kan motor hi han thlir ta ila, motor four wheel drive hi chu a vang pharh tawh mai a ni. Chu chuan engnge a indicate kan hre vek awm e. Kawng condition a tha tawh, tun hmaa four wheel drive lo chuan Mizoramah a tlan theih loh tih kha a awm tawh lo reng reng. Tun hmain Silchar khu student te kan nih ve lai khan kal kawngah zankhat riah a ngai thin a ni. Tin, khang hun lai khan gate system a awm a, chhuk lam leh chhoh lam inkal chhawk a ngai thin. Khang hun te kan ngaihtuah chuan, kawng lo block ta se, a tifaitu PWD chu koh phak an awm lo, telephone a awm bawk si lo, passengers te khan tihfai mai a ngai a ni, kha kha kan tih turah pawh kan ngai mai.

Tunah kawng a chhia an ti a an han hnatlang deuh a, sorkar elhsen nan niawm taka han published te hi thil tih awm loh tak a ni a, mizo kalphung a ni lo.

Aizawl-to Lunglei Jeep Road Bawngkawn atanga kal a, khithah Serchhipa kal a Lunglei pan saw an laih dan tam ber kha chu hnatlang a ni. Bawrhsap Barkataki ho khan an lai kha niin ka hria a. Tichuan, khaw hrang hrang kha chan an intuk a, chutianga anga kawng khi Mizopa ina an laih tlang a ni, tuna taka kawng chhe deuh lai Rawra tlem phah a kan han hnatlang te hi chu kan tih ve awm tak, kan tih tur kan ti niin a lang. Hengte hi han ngaihtuah chuan kan kawng maintain tu kan PWD te hi an tang a, theihtawp an chhuah a. Chuti chung chung pawh a hetiang ang resolution-a han den zui hi chu a thawktute tan pawh a nuam lo vang a. Hei kan sawi a sawina hun tha tak kan nei a, kan sawi hi Mizoram mipuiin a hre tho dawn a, in thahnemngaihna te pawh inphochhuak tawh tho va. Chuvangin, hemi Resolution han pass leh kher hi kei chuan kan sawihona hi a tawk viau lawm ni tih ka rawn tar lang a ni. Ka lawm e.

**SPEAKER** : Awle, Pu Nihar Kanti Chakma.

**Pu NIHAR KANTI CHAKMA** : Pu Speaker, ka lawm e. Hei vawiinah Pu Vanlalawma, Opposition Group Leader Resolution, “Mipuiten inkalpawhna kawngpui chhia avangin harsatna an tawh mek sutkian thuai a nih theihna turin chak lehzualin hma lak ni rawh se” tih a ni a. Pu Speaker, a dik a, hei, mipuite pawn kan hre vek a kawng chhiat zia chu. Hmanni zawhna leh chhanna ah Tlabung kawng chhiat chungchang zawhna te pawh ka zawt a. Kan Chief Minister zahawm takin chiang takin a sawifiah a, hma lak tum zel te pawh a ni a. Pu Speaker, helai House ah hian term li lai chu ka lo thu ve ta a, 1998-a ka pa boral hnu, ka tlin ve hmasak ber tum khan Tlabung - Lunglei kawng hi BRTF te'n tha takin an maintain thin a ni, a tha lutuk, a grade pawh a tha lutuk a. Amaherawhchu, khilai kawng kha sorkarin BRTF atanga lak turin dilna an siam a ni. Ka hriat sual loh chuan an lak duh nachhan chu an party worker te hna thawh tur an duh vang a ni a. Khatia an lak tak hnuah khan ka hriat sual loh chuan project Delhi ah an theh lut ta a ni. Chumi hnuah 2003 kum ah term hnihna sawi ta ila, chutihlai chuan project an theh lut a, mahse Central sorkar in an project thehluh chu a pawm lo a ni. A chhan chu 'hei hi chu nangmahni State sorkar kawng a ni a, Central sorkar enkawl tur a ni hleinem, in kutah kan hlan e' tiin an chhang a ni. Khatihlai khan maintain a ni miah lova, kan hre vek a hei NREGS pawisa in Tlabung – Lunglei kawng khuar zual lai te kan siamtha a ni, khutilaiah te pawh khuan harsatna tam tak kan tawk ve a ni. Entirnan, BRTF atangin khami kawng kha PWD in la lo se chuan hetiang harsatna hi chu kan tawkin ka ring lo.

Kum 2008 tawp lam khan Congress sorkar thar a lo piang ta a, Tlabung – Lunglei kawng hi kan lifeline a ni a, kan mipuite pawhin, ka tan pawh hian a nuam lo

khawp mai Pu Speaker, thil tha lo apiangah ka hming hi a lang ve ziah lehngal a, ka tan pawh hian a nuam lo khawp mai, mahse a bialtu ka nih avangin tih ngaihna dang a awm chuang lo a. Sorkar hmasa ah khan World Bank pawisa in kan lai a tunah Chhunkhum atanga Chawngte kawng hi laih mek a ni a. Heng te nena a ruala laih tum a ni a, amaherawhchu, eng emaw harsatna han sawi ta ila, land acquisition chungchangah engemaw buaina a awm avangin khawih hman a ni ta lo a ni. Khawih hman loh avangin Highway in an la ta a ni, tunah hetiang dinhmunah kan ding ta a ni.

Hmanni ah kan Chief Minister zahawm takin zawhna te tha takin a sawifiah a, kan kawng hi priority list ah an dah a, project te pawm anih ngei kan beisei a ni. Chuvangin Pu Speaker, hetiang a sorkar in chak taka hmalak a tum laiin hetiang a private resolution lo pass kher hi a tul emaw ni le ka ti deuh a ni. PWD in a lak hma khan Tlabung – Lunglei kawng hi tha takin an maintain a ni, ka hriat sual loh chuan hemi kawng hi kawng tha ber pawl a ni, boulder pawh an phah tha a, amaherawhchu, hei kum 10 aain a tam ta a, tha taka maintain a ni lova, chubakah, black-top a ni bawk lo a ni. Chuvangin, hetiang dinhmunah hian kan ding ta anih hi. Mipui hnenah pawh tha takin kan sawifiah thin a, ka sawi hi chuan an rilru pawh hi an dam ve leh deuh thin a. Pu Speaker, ka sawi duh chu kan vanneih chuan kawng siamthatna tur project te pawh tlang thuai turin kan beisei a ni.

Awle, Pu Speaker, a tawp bera ka sawi chu, ka hma a member zahawm tak tak te sawi ang khan pass kher a ngai hleinem tih kha Group Opposition Leader zahawm tak Pu Zawma te pawh khan hrethiam se, withdraw mai se a tha lo maw tih ngaihtuahna ka nei a ni, Pu Speaker, ka lawm e.

**SPEAKER** : Pu John Rotluangliana, Minister-in a phar ve tlat mai.

**Pu JOHN ROTLUANGLIANA, MINISTER** : Pu Speaker, tawite ka sawi ang, hei kan Resolution – “Mipuiten in kal pawhna kawngpui chhia avanga harsatna kan tawh mek sutkian thuai a nih theih na turin chak lehzualin hma lak ni rawh se” tih member zahawm tak Pu Vanlalzawma rawn putluh hi a tha hle mai a. Mahse nichin khan a rawn puluttu khan ka duh ai khan a la na lo mah mah zawk a, mipui ngaihthat nan te hian pass ila, damlo te pawh kan kan a, kan tiham theih chiah loh pawn an ngaih a lo tha a, a ti a, khatiang deuh hlek khan a rawn chhuahin ka hria a. A pass lam ngawr ngawr kha a aim loh emaw ni chu ka ti a ni. Engpawhnisela, Pu Speaker, tunlai hian kan ram kawng a chhe em em a, nimin-a ka department ka wind-up na ah pawh ka sawi kha, JCB te pawn buhfai kan thiar hial a nih kha. Chuvang chuanin kawng tha chu kan mamawh Chiang a ni, kan mang a ang tlang a, khawiah mah kawng tha sawi tur reng reng a awm loh. Tlabung lam kawng a chhia, tunah phei chuan Thenhlum a chhia, buhfai kan dah thei lo, tih nen a ni.

Kan bial lam te pawh khu kawng a chhia a, hmanni deuh khan kan bial te pawh khan bandh te pawh an han siam hial a. A hrim hrimin Mamit lam kawng khu kan chhe rei tawh angreng a, mahse chuti chung chung chuan kan bial mipuite mai piah lamah Mamit District mipuite khu an phunchiar lo angreng a, an phunchiar loh na chhan chu kan kawng chhia khu a that dawn vanga chhia a niin an hre tlat a ni, a chhan chu siam mek a nih avanga chhia a ni a, tunah khuan Gayatri Company te hian an siam mek a, amaherawhchu Company te hian an siam muang lutuk erawh hi chu mipuite pawh in aw an chhuah ta hial a ni. Heti laia Gayatri Company a an hotupa, an Vice President an tih A.N. Rao pawh hi May ni 8 chawhnu dar 2 khan kan Chief Engineer, Highway changtu Pu John Rammawia nen lengah ka sawm a, kan sawiho a ni. Mahse, kan hriat theuh ang khan hna hi a thawh hleitheih loh va, tun kum kan fur hi a na em em a. Kan Chief Minister zahawm takin hmanni a a sawi fiah tawh ang khan, Andhra Pradesh lam mi daih, kan ram leilung awmdan pawh hre lo in an rawn chhang a, an rin aiin kan ram a lo chhengchhe leh si a, revised estimate an dil a, hun rei tak an chawhlsan a ni. Mahse Central sawrkar in revised estimate min phalsak tawh a, chuvang chuan Monsoon a zawh hi chuan “ Ka pu, nasa takin hna tan leh kan tum a ni” te pawh min ti a, mahse, hei vawiin thlengin ruah a la sur a.

Tunlaia kan ruah sur dan ang em em hi chu malsawm ruah a ni zozai pawn ka hre tawh lo, a chang hi chuan ka ngaihtuah a, eng hi nge maw kan hnam hian kan tihsual le aw, ka ti rum rum a ni. Zannah naupang tan chuan ruah hlauhawm khawpin a sur ziah mai a, tunlai te hian a hil chho tan chu a ni ve a. Chutiang chu a nih avangin an hna pawh an tan hleitheih lova. Tin, nikum lama an chawhhte pawh khan kan bial a kan thalai rual deuh te pheih chu fiamthu titak in ka ti a, “ Hetia an thawhthat duh loh chuan an khawl te hi lo hal darh vek ula, duh leh lo vel rawh u, haw vek mahse a pawh hleinem ka ti a. Mahse chung em chu an ti lo a, chutiang ang chuan kan kawng hi a chhe em em a ni.

Tin, West Phaileng – Rajivnagar pheih khu chu BRTF kut a ni a, Pushpak ho. An Chief Engineer R.K. Rashdhana pawh hi May 28 khan lengah ka sawm a, ani pawh a mangang ve a, “ keini hian defence atangin kan kawngte hi Category I, II- ah te min then a, keini Mizoram hi II a ni a, I- ah chuan min dah sela chuan min ngaihpawimawh deuh ang a, chuvang chuan kan Chief Minister zahawm tak hian Defence Ministry lamah hian D.O. Letter pawh min ziahsak thei lawm ni a ti a ”. Kan hotupa kan Chief Minister zahawm tak kan va rawn a, “ E, rawn ti rawh u, kan lo thawn ang e” a ti a. Chutiang ang chuan kan Chief Minister pawh hian Defence Ministry lamah te pawh khuti lai khu an ngaihpawimawh Category – I a awm turte pawh in D.O. letter min ziah sak hial a ni. Chutiang chuan kan hotute pawh hian hma an la a, amaherawhchu, sawi leh sawi hnu, vawiin thlengin khua a chhiat avangin bul an la tan thei lo a. Tunlaia Tuipuibari kawng chhiat zia chu Bus a an rawn kal chung pawh hian Vangvat an rawn kai thei nia mawle! Hmanni a ka mikhual te pheih chu Bus kawngkhar bulah ka thu a, a tia, a lu ah te khan Vangvat a rawn kai a ni. Chutiang chuan a hnim em em mai a, kawng a chhia. Hmun dang dangah pawh bial hrang hranga mite hian kan MLA te pawh hian sawi sela, an bial kawngchhiat zia hi sawi tur tam tak an nei ang.

Amaherawhchu, ka sawi duh lai chu hei hi a ni Pu Speaker, heti khawp a khawchhe hnuaiyah hi chuan in tumah hian kawng siam pawhin khuain a la permit lo a ni.

Vawiinah hian kan PWD department lam te leh kan Engineer te hian hnathawh an chak tawh ngawtin ka ring. Amaherawhchu, khua in min la bumro avangin an la thawk thei lo mai a ni. Tun Chawlhni te khan hnathawh an chak lutuk niin ka hria, hetilai Aizawl khawpui phei, Assam Rifle bul velte saw a pawp lai an rawn bel a, chawhhma lamin keipawh Mission Veng lamah ka va leng phei a, ka haw lam chuan ruah a lo sur leh tawh a, an thawk leh thei tawh lo. Heng hi sawrkar chak leh chak loh pawh a ni lo, kan control theih loh ruah hian min ti buai a ni. Chuvang chuan khua han thal sela, Pu Speaker, kan PWD department te leh kan Engineer ten hma han la sela, kan kawng hian ziaawm lam a pan ngei ang tih ka ring tlat a ni. Tun hma khan, kan term hmasa tir lam deuh khan, Buichali leh Kawnpui inkar kawng kha an chhe em em khawp a, khatih hunlaia kan MNF thalai hruaitute kha a hmunah an zuk kal a, TV ah an rawn tilang a, a diak em em mai a, khawchhiat lai ania a siam theih loh a ni. Mahse, khua an thaa, an han siam tak tak mai chu a mam hun mai a. Hmanni deuhah khan Silchar-ah ka kal a, Buichali leh Kawnpui inkar kawng chu a nuam ber lai a lo ni tawh a, kan han tlan a, Mizoram pawh a ang lo ka ti. Kan tlan laklawh laite khan let leh chakawm khawpin zu nuam a maw le! Khua a tha a, an siam mai a ni Pu Speaker. Chuvang chuan heng te pawh hi khua an tha mahna ang a, kan engineer ho in an han siam ang a reiloteah hian a tha dawn.

A hminga Supply changtu nih phei chuan Pu Speaker, ruahsur zan ah hian tunhma chuan mut a tui thin a ni ngai a, tunah chuan ruah sur zante hian khawiah nge buhfai kan dah theih loh ang aw! Ka tia, mut pawh a tui tawh lo a ni. Chuvang chuan kawngchhia hi kan vei ve khawp mai, mahse kan khua in a la zir lo a, khua an tha ang a, kan hotuten tan an han la ang a, kawng hi a tha mai dawn. Vawiin ni a kan resolution pass avanga tha tur ni sela chuan a vai hian pass a chakawm khawp mai, pakhat mai pawh ni lo hian. Mahse hemi pass avanga that leh thutna tur chuang a awm lo. Hmanni pawh khan kan MNF unau ten kawng an han zawh a, ka lo thlir ve reng a, Aw, an kawng zawh vanga tha thei chu nisela, han tel ve ka van chak e aw! Mahse ka tel ve avang khan a that phah ka ring chuang lo a ka tel lo mai a. Chuvang chuan Pu Speaker, khaw that hun hi kan lo nghak ang a, theihtawpin hma an han la ang a, heta kan resolution hi pass kher ngai hian ka van hre lo em. Chuvang chuan Pu Speaker, vawiina kan resolution hi a hmanhmawh deuh mai mai a ni, a hunin a la zir lo a, pass kher ngai lo hian Pu Nihara tih ang khan withdraw mai sela, a tha zawk mai awm mang e aw ka ti a ni. Pu Speaker, ka lawm e.

**Pu T. SANGKUNGA** : Pu Speaker, han sawi ve hlek ka duh a, kan resolution hi ngaihtuah ngun ngai tak, kan ram in a mamawh tak te zing a mi ni si, engtia tih hlawhtlin tur nge? tih ngaihtuah ngun ngai tak niin ka hria a. Mizote chu kan hnam a la naupang a, mi in kum 300 Europe ah te an lo neih tawh kha tunah kan han nei tan ve a, whatsapp ah te, Facebook ah te, TV ah te engkim mai kan hmu thei tawh si a. Chuvangin thil tha tih te hi a tehna a zir a ni a. Khang nena kan compare kha chuan kan thil hi tha a lawi a awm thin lo a, chuvangin, enganga teh tur nge tih hi

kan ngaihtuah chian a ngai a. Kawngtha pui pui a England ah te an kal lai a kan Missionary te lo lut kha chu Tlawng luih lawngin Sairang an rawn thleng thei chawr chawr a ni a. Chuvangin, kawng chhia tih chu sawi loh, kawng awm lo kha kan buaipui phawt a ni. Kan buaipui chhoh dan hi a inang lo em em a ni. Ka pa hian mi hrilh thin a, Vanzau khua atanga Silchar ka kal hi chuan hapta hnih Silchar thlen nan ka hmang a, ka lo chhoh leh nan hian hapta hnih ka hmang thin a tia Vanzau atangin. Khatiang te kha chuan kan kawng hi chu rawn hmu se mak a ti ngawtin ka ring a, ke in an kal tlah tlah a. A tehma a zir hi a ni vek mai a thil hi. Vanzau a kan awm lai chuan EGS kawng te kan lai a, hlam thum dawn laia zau mai kan han lai a. Thingphel in a vung kan han pawt pe hun mai te chu tha hi kan ti em em mai a ni. Vawi khat chu jeep a rawn lut ve ta mai a leh a seat dup hi kan inchuh a, kan pawt thla hlawih hlawih mai a, ball a pet ah kan tia. Khatiang khan jeep lo kal te kha ropui kan ti em em mai a ni. A teh dan a zir leh a hun a zir hian a tha leh tha lo a awm ni. Mizo ten kan teh dik lo fo hna kan thawh peih loh na te pawh hi mi ram changkang zawka an hnathawh dan kan hmu si a, kan ramah kha hmanrua kha a la awm ve si lova. Kha vang khan keimahni hi kan in tihual thin ni te pawh hian ka hria a. Kawng kan neih that loh na chhan leh mi ramin an neih that na chhan thenkhat han sawi ila. China khi kawng a lo tha em em mai a, a ngil em em mai a, engati nge tia ka zawh chuan anni chu compensation an buaipui lova, an lai pawp mai a ni, communist an ni a. An laih dawn khan thil awm an en a, an teh a, a hlutna ang an pe leh thuai mai a, keini chu compensation atang hian hlawk kan tum a. Kan minister zahawm tak Pu Lalrinmawia biala kawng laih tir pawh khu eng chen nge an buaipui tawh compensation. Heng te hian kan ram problem atthlak tak kan leader zahawm takin compensation atchilh hnam kan nih a sawi fo thin te avang te hian harsatna kan insiam a, mipuite ah pawh hian zir tur tam tak a awm a ni.

Tuna kan House Leader, Chief Minister anih hmasak ber khan Under Secretary, PWD ka ni a, Pu Vanhela, kan Secretary ho khan kawng awm lo kha i siam teh ang u kan tia, entirnan, Dinthar atanga State Bank te hi kan EE khatih laia Pu Sawmvela ania, Pu Liansanga, Pu Biakzuala, S.E. te ho khan laih ngaihna a awm lo reng reng, insak in kawng an nek vek tawh an ti a, kei chuan ke in ka kal a, a theih e ka tia, khu kan lai a tunah rawn kal nan ka hmang a, kawng tha ber pawl alo ni tawh a, a dum zur mai a. Chuvangin, khatiang hunlai atanga zuk teh leh tun huna teh hi chuan mak a tling leh tawh tlat mai a ni. Chuvangin kan hun tawn a zir hian thiltih pawimawh tak awm in ka hria a. Reiek kawng pawh khatih lai khan in Lalrinmawia Sohnel an “Reiek kawnga motor chuan chuan kuhva hi thial a ngailo han hmuam ila, Reiek thlen chuan amahin a sawm vek mai a ni,” a ti a. Chutiang a nih vang chuan motor kawng han lai teh ang u kan tia. Kan House Leader zahawm takin alo pawm a, kan zu lai a, a hunlai in kan hawng hman nghe nghe a. Khatiang khan in a intahtawl hian hmachhawp zela kal tur kan ni a. Chutih lai atanga wawiin ni thleng a ka rilru a lolang ta chu kan BE hmasa ber Pu Robula khan, “Fur laia kawng i laih chuan December-March i laih aiin kum 3-in a min rei ang,” tiin Engineer kalkhawm ho hnenah a sawi thin a. Chu chu ka rilru ah a awm reng thin. Tunah chuan fur a kawng laih kan ching riau mai a, a min nasa reng a.

Tin, ka hnu a Under Secretary in a engineer ho meeting a Secretary in a sawi a sawi chu, “Engineer ho te hi mipuiin min fak a, hma kan sawn ta hle mai, side-drain hi kan siam thiam ve tawh angem le?” a ti e, a ti a. Side drain hi kan mamawh zia a zu sawi tumna a ni. Chuvangin, wawiiinah kan Lalpa an mantir zan ang mai khan, kan pu hi Engineer ho in an tin san dial mai a, a pui lo riau mai. Wawiiinah hian kawng chhiat kan sawi dawn a thu thut tur a ka ngaih a ni a. Anmahni zawk hi ania kan hrilh duh, kan pu te an hman si lo a, wawiiin ni ah hetiang official gallery ruak huai te pawh hi kei chuan fello ka ti khawp mai a. An kawng laih te hi sawi tur kan ni si a. Kan pu te hi chu policy duangtu an nia, a khawihitu tak tak an awm bawk si lova, ka sawi lo mai dawn emaw ni ka tia, kan sawi leh ta hram a ni a. Tin, side-drain te kawng laiha kan siamthat loh avanga kawnga tui luangin kawng a tih chhiatzia te pawh hi kan ngaihtuah a ngai. Tin, kawng kaw i han laih tlang mai tur, kan han hel te hi a tulna a awm reng reng lova, hetiang hian thiltih that zawk dan tam tak a awm. Chutih lai kan Secretary, non-technical mi, Pu Vanhela sawi ka hriat reng chu Raj Newaj tih a la ni a, Raj Newaj to Chanmari hi Jatinga lung an la a, a chhe thei reng reng lo. Zu la leh teh u abak hi tiphei leh teh ang u atia, kan phur em em a work programme ah te kan pu remtihna in kan dah a. Mahse, engineer pakhatin, mi rawn hrilh chu Jatinga lung ani reng reng lo henglai lung hi a titu pa in a la a, alkatra in a chhuandum hnan daih a, motor in a rawn phur a, a hriat theih tawh si lo a, lo en mah rawh a tlo reng reng lo ang a ti a, a tlo ta reng reng lo reng a. Khatiang kha an thiante pawhin min hrilh dan a ni a. Chuvangin, a system leh quality control hi kan tihchak a ngai reng a.

Tuna Aizawl khawpui min tam lutuk a UD&PA project a an siam chhah lutuk a tihtur hi quality and control lam kan endik tir si lova, a thenah chuan kawng hnuaiah tui a put dur dur mai a ni, nghet lutuk a zu roll tur a kha a density te kha a tha tawk lo reng reng a. Chuvangin, hengte pawh hi kan Engineer fel tak tak, thiam tak tak te hian an ngaihtuah seng bik lo a ni awm e. Chuvangin uluk taka kan ngaihtuah ngaiin ka hria a. Tin, sapho te pawh khan kawng an endik hian, lal tak tak ho khan thirtiang te, bawngtuthlawh te an keng tawp mai a ni. An zu cho tak tak a, eng anga chhahin nge an tih, a lung te a chang tawk em tih kha quality control awm hma pawhin khati khan an ti a. Keini chuan hetiang lam hi kan uar lo riau mai a, kan uar chhoh deuh deuh ngaiin ka hria a. Tihtur tam tak tunah hian kan nei a ni.

Tin, a tawpna kan sawi duh chu nimin piah lawkah kan thiante khan kawng that loh zia avangin kawng zawh phur takin an rawt a. Khatiang khawp a innawr nasa si, kawng hi a tha tawk an ti nge ni, a sawt chuanglo ang an ti nge ni kawng zawh kha an tlem em em mai a. Chuvang in, a rawttute pawh an phur vak lo nge ni aw kan tia, an MLA-te hi he House daihlimah hian an awm daih a ni, kawng kha an zawh lo reng reng a.

Tin, resolution hi Bible an telh zauh zauh reng bawk a, pakhat a tawpna han telh ka duh chu, kan Lalpa Isua Krista kross-a an khenbeh khan a veilam ami khan resolution a move a, ‘Intidam la keini pawh min ti dam ta che,’ tiin resolution a move ngawt mai a, a che chhe nasa a ni. A lehlam ami khan, ‘I ram i thlen hunah mi hrereng ang che,’ a ti a, kha kha a che fuh em em



‘vawiin ah ka hnenah Paradise ah i chawl ve ang,’ a ti a. Chuvangin vawiinah hian a resolution zawng hian in pass khum lo ta ila, ‘Ka pu i office i thlen hunin heng kawng chhia , hi rawn hrereng ang che ,’ ti ta ila, a sawi hian duh tawk ila ngaihtuahna rawn hmangin Engineer te nen uluk takin rawn sawiho sela kan kawngte hian a that phah zawkin ka ring a, pawisa lah duh tawk a awm si lo a. Kan Engineer ten thiam hle mahse an duh ang tawk hman tur pawisa an neih loh avangin harsatna tam tak an tawk a, thui zawk tlema duhthusam loh zawka an siam chang te pawh a awm a. Chuvangin Pu Speaker, kan kawng hi duhthusam ni chiah lo mahse ‘kan theih tawk kan phak tawk ang zelin i awm phawt mai ang u’ ti ila, kan pute hian kan sawi hi an hre tawk tawh a, heta tang hian he resolution hi pass kher lo hian an office an thlen hunah a tih that zawk dan hi rawn ngaihtuahin rawn siamtha chho zel sela a tha mai lo maw, tiin he resolution chungchangah ka ngaihdan ka rawn sawi a ni e, ka lawm e.

**SPEAKER** : Pu Zothangliana a phar hmasa a.

**Pu H. ZOTHANGLIANA** : Pu Speaker, ka lawm e. Tawite sawi ka tum a, hemi resolution in min hriatchhuah tir chu hman deuh lawk khan India rama officer lian ve tak mai, Mizo officer in Social media ah hian Mizoram sawrkar nekna niawm tak engemaw a rawn post ve a Chuta a post chu, ‘Mizoramah mi nuai 10 erh awrh an awm a sawrkar pakhat ve reng ruangin kawng tha pawh a nei thei lo a, a siam thei lo a, kei ka awmna ah chuan district pali,’ a ti ta in ka hria ka Chiang ngam ta a lo a, ‘mihring nuai 45 ka enkawl a, kan kawngte chu tha tak a ni, tha tak,’ tih thu hi a rawn post ve ringawt mai a. Chu chu Mizorama kan facebooker leh whatsapp khawih tute tam tak chuan an tuipei em em mai a sawrkar sel nan tak khan an hmang zui a. Ka insum thei lo a, ‘a ni a awm hma hian heng kawng tha te hi a awm hen hun vek tawh a ni, ama thawh a ni awkawng lo e,’ tih ka post ve nghe nghe a ni. Sawrkar hmasa lamah khan kan hotu kalta te khan hmasawna hi a zuanin a zuang dawn a ni, tih te, Switzerland of the East kan siam dawn a ni, tih te an sawi a, hmasawna a zuan pawh chu kan hre lem hlei lo a. Vawiinah hian ministry hmasa lam liam ta ten an tih theih loh kha Pu Lal Thanhawla kaihruai sawrkar ah hian rinna leh beiseina hi an nei sang lu deuh a, kum 10 chhunga an tih theih loh, chawp leh chilh a ti zo duak duak turah mi an beisei ni ber hian a langin ka hria a. Chutiang chuan kan hotute hi chakin fel viauin thiam viau mahse an ti vek thei bik lo mai a ni, tih hi ka’n sawi duh a. Hman deuha kawng la awm miahlo vawiin a awm ta, tha tak tak te hman deuh a awm motor tlan hleitheit lohna kawng chhe em em siam that tam tak a awm a ni tih te pawh kan hria a ni. Chuvangin a zavai tak tak maia kan kawngte hi vawikhata siam that phut hi chu a naupang chhe thil ngen deuh lo maw, ka ti a ni.

Tin, nichina kan member zahawm tak pakhat in a han sawi zawk ang khan kan kawng a chhiat avangin tiin kawng zawhte an han buatsaih a, mahse kan hotu zahawm tak tak Pu Speaker, i vei lama thu te hian an ngai pawimawh tak tak lem lo a ni tih chu a changin ka hria a. Khami hunah khan ngaihpawimawh tak tak a kawng zawh avanga kawngpui te hi lo tha thei tur nise a hmatawngah khan an kalin hma an hrui turah ka ngai a, chutiang chu an ti lem lo a, hei

daihlm hnuaiah hahdam taka sawi hi an duhtawk mai niin a lang tih hi ka rilru a awm dan deuh a ni a, kan sawi ve hrim hrim duh a ni.

Nichin khan kan Minister zahawm tak pakhatin thil pakhat min hrihl chu, construction company lian pui pui te hi Mizoram sawrkar chauh hian a duh duh in a ti thei lo hi a ni bik lo a, India ram sawrkar ropui tak, chutah pawh Prime Minister's office meuh te pawh khuan an ti hlei thei lo a, an duh ang ang hian hna an thawh tir mai thei bik hauh lo mai a. Hman deuh lawk pawh khan Prime Minister's Office a Principal Secretary in construction company Delhi to Jaipur Road a ti ta in ka hria, kum 3 vel kal ta a thawh zawh tur kha an hna a kal hlei theih loh avangin company hotute a office ah a ko a, a hrihl hrep a, mahse a sawt viau chuang lem lo, tih thu min hrihl a. Chutiang deuh chu a ni a, company te hi i veilama thu member te hian an hre lo lui tlat thin in Mizoram sawrkar thlan ang hian sawi lui thin mahsela a nihna tak kan House Leader zahawm tak kan Chief Minister ni bawkin a sawi fo tawh a, kan hria a, Mizoram sawrkar in a duh a, a thlan ni lo in Union Governmentin a buaipui leh a thlan thin an ni tih te pawh hi vawiin ah hian kan hriat chian a pawimawhin ka hria a.

Mahni bial lamah han luh ve deuh zawk ka duh a, Hrangchalkawn-Lawngtlai kawng a that tawk loh avangin eng eng emaw pawl ten motor tlan an phal lo a, nimin Dt 15-17<sup>th</sup> Oct,'15 thleng hi motor zawng zawng tlan phal lo in an bandh a ni tih te kan hria a, hei hi thenkhat chuan sawrkar han demna leh sawrkar han nawrna anga lo ngai tawk an awm a ni tih te pawh ka hria a. Amaherawhchu sawrkar an nawr a ni lo a, contractor thlan vek tawh an nawr a ni tih hi Pu Speaker, nangmah kaltlangin Zoram mipui hriatah hian ka'n sawi duh a. Tin, contractor hi nawr ngai tak pawh ni bawk a ni, tih kan House Leader leh kan hotu dang te pawh hian an hria a, an nawr mek reng bawk a ni tih hi ka sawi tel duh bawk a ni. Tun aia nasa leh zual zawka tui a hul hunah pheih chuan an thawh hunah pawh kan bial mipuite leh he kawngin a paltlang mipui zawng zawng te hian NGO an ni emaw kohhran an ni emaw pawl dang dang an ni emaw a mipui hrim hrim pawh hian lo enpui a, hna tha taka an thawh ngei theihna tura company hnathawktute pawh hi lo vil turin Pu Speaker, nangmah kaltlangin ka han chah duh bawk a ni. Sawi tur tam tak chu a awm a, mahse an sawi theuh tawh a, khang te te te sawi khan he resolution hi chu thil tha leh ramin a sawt pui tur tak tak ngaihtuah tur tam tak awm karah sawrkar nekna remchang zawwna mai mai a nih deuh ber avangin pass kher kher hi a ngai lo tih kha keipawh ka ngaihdan a ni e, Pu Speaker, ka lawm e.

**SPEAKER** : Pu Pianmawia.

**Pu R.L. PIANMAWIA** : Pu Speaker, tawite han sawi ve ka duh a. Hei kan resolution hi keia han sawi ve tur chi a ni dawm em ni tih ka ngaihtuah a. A chhan chu keini buaina chu, tender vawi hnih an chhuah pawhin chhangtu an awm lo kha a ni a, chuvangchuan vawiin a kan resolution hi ka inhmeh ve lo mang e aw, tih ka ngaihtuah a tender chhangtu awm lohna lam kha kan buaina a ni si a. Chuvangin thil hi ngaihtuah dan te pawh kan thiam a tha mang e aw, ka ti a. Remruattu remruatna hi kan thlir thiam a pawimawhin ka hria a. Tun ang huna kawng a chhiatna

chhan tlangpui bera kan han sawiah kha chuan fur ruahtui tlak tam vang a ni a, fur ruahtui tla tam hi PHE Department tan chuan thil lawmawm tak a ni, mipuiin sawiselna an nei lo. PWD leh Power tan chuan hun hrehawm leh hun thim tak ang pawn a sawitheih awm e. Chutiang ang chu a ni a remruattu in kan chung a ro a rel dan ang hian kan ngaihtuahna te pawh hi kan siam rem a tha awm mange aw tih te ka ngaihtuah a.

Tin, hetiang kan opposition unauten resolution an han pulut ta mai hi an khawngaihthlak mange aw tih ka ngaihtuah letling a. A chhan chu an sawrkar loh lai chuan kawng kha chhe vak sela mualpho deuhin awm sela in thlan leh hun 2018-ah hneh deuha mipui lakah vote hmuh theihna mai tur chang an neih that tehreng nen khan. Hei hi an ti tlat mai a, enge niang aw tih ka ngaihtuah a an tih na chhan kha, leh lamah chuan an tan chuan a beidawnthlak bawk a ni tih kha ka rilru ah a lo awm a. A chhan chu kar hmasa lawkah an Party President ber khan kan sawrkar ve hunah chuan central drip khai lovin a ti a, central drip khai lova sawrkar ngawt thu kha a hla lutuk a India rama kan chen chhung chuan.

Chuvang chuan khawvel awm chhungin an sawrkar dawn tawh lo ni a a lan avangin leh a beidawnthlak avang hian an zawm pui pawl NDA an lo tih ve thin ah pawh khatianga beiseina nei lova hotupa berin a hote hmaah a sawi tak si ah chuan, polite takin resolution hi ti ta ila, inthlan leh hunah chuan an ni lamah te pawh kan bet diak ang a, kan beh duh hunah min lo pawm awlsam theih nan tih ngaihtuahna an hmang emaw ni chu aw ka ti a. An fing chu ka ti angreng bawk si a resolution thu ka hriat hian. Chuvang chuan an tan chuan kawng a awm tawh si lova, Zoram mipuiin an rin tawm em em Pu Lal Thanhawla sawrkar ah hian engkim mai hi a lo tih theih a ni. Chuvangin a tih theih zia chawimawi nan hei hi ti ve teh ang tih na rilru te pawh an pu a ni mai thei a, ka hrethiam chiah lova. Chuvang chuan an ngenchhan ber NDA sawrkarah beisei tur awm loh zia an hriat bawk si avang khan a beidawn thlak em em a ni tur a ni. Hetiang ngaihtuahna an hmang thei hi leh lamah chuan keini lamah pawh rawn tel dawn ta pawh ni se an resolution atang chuan iai tur pakhatmah a awmin ka hre lova, ka pawm thlap mai a ni.

Pu Rinawma khan a rawn sawi tawh bawk a, sum awm lo chuan hna a thawh theih loh a ni a rawn ti tawh bawk a, a sawi dik chat chat hle in ka hria. Tuna an zuk zawmpui NDA sawrkar khuan tuna mipui min kaihhruai an tum dan te phei hi chuan 50/50 tih hi a ni deuh mai a, khatiang anih chuan a lehlamah chuan keini a sawrkar ding lai tan pawh a man hla tawh awm mange aw. Kawng kilometer 10 siam tur awm sela, a zahve kha mipuiin an thawk ang a, a zahve kha sawrkar PWD in an thawk dawn tihna kha a ni tawh mai dawn a. Chuvang chuan min rawn rindan kha han chhut chhoh khan a lo awm chho viau tho mai tih kha ka rilruah a awm a ni.

Chuvang chuan hetiang zawnga resolution te pawh kan han pulut anih rau rau chuan tiang zawng te pawh hian tih belh ta ila, a huam tam deuh resolution belh te a remti lawm ni kan resolution puluttu hian ka ti a. Mipuiten in kalpawhna kawngpui chhia avanga harsatna kan tawh mek sutkian thuai anih theih nan furah ruahsur tawh lo reng reng se kan ti tih kha ti tel ila a tha in

ka ring a. Chutiang zawng chuan belh te a remtih phei chuan a tha khawpin ka ring a, rampum huap deuh law law in, mitin huap deuh law law hian resolution te hi ti ta ila hmasawna zel a ni dawn lawm ni? Chuvang chuan resolution hi keini bial tan chuan a inhmeh lo angreng hle ka tih kha, tuna karawn sawi ang zawk kha resolution thlak nan hmang turin kan resolution puluttu kha kan ngen a ni e. Ka lawm e.

**SPEAKER** : Sawi tur dang kan awm tawh lo em ni? Kan awm tawh loh chuan House Leader kan sawm tawh mai ang a, a lut tur te kha khawngaihni rawn lut vek se a tha ang. Tunah kan House Leader thusawi turin i lo sawm ang.

**Pu LAL THANHAWLA, CHIEF MINISTER** : Pu Speaker, kan member zahawm tak te thahnemngaihna a lawmawm a. Tin, thahnemngaih hi a lawmawm rual hian ngai bik riau a in ngaih te a awm thei a, mahsela kan han ngaihthlak atang kha chuan kan thahnemngaihna a in chen tlang vek niin ka hria a, a lawmawm khawp mai.

A resolution kha kan hre vek a, 'Mipuiten in kalpawhna kawngpui chhia avanga harsatna kan tawh mek sutkian thuai anih theihna turin chak leh zualin hmalak ni rawh se' tih a ni a. Hei hi chu in phut pawh a ngai lo, chak leh zuala hmalak hi a department te pawn an duh reng ka ring a. Tin, an duh reng a ni tih hriatna chu ruahsur hnuaiyah pawh a remchang apiangah chuan an thawk deuh reng a ni. Chutiang chu a ni a, engpawhnisela a chhiat dan tlangpui hi chu a that zawk dawn vanga chhia a ni tlangpui rih a, eng pawh ni sela kan thahnemngaihna a lawmawm a. Tin, kan opposition leader Pu Zawma, member zahawm tak hi, tun session hi kan vannei riau a, a resolution hi ballot ah hian a rawn lang zat zat a ni mai a tum hnih a zawnin. Hei pawh hi a resolution a fail te hi chu eng pawhnise a lungawithlak hrim hrimin ka hria a resolution neitu tan. Tin, in rawn move dan a hmasa ami pawh, tun tum ami pawh a lawmawm ka ti in a puitling hle a.

Tin, member zahawm tak Pu Sangthuama thu rawn sawi kha chawhma lamah khan a ropui hle a, ka rilru a ka lo ngaihthlak danah chuan Mizoram a PWD engineer zawng zawng leh contractor fuankhawmin ngaithla se tih kha ka rilru a ka duhthusam a ni a. Khatiang rilru kha pu theuh se chuan kan contractor leh kan engineer te hian mipui leh helai member zahawm tak kalkhawm te pawh hian a tha zawk tura duhthusam khum reng te hi a tul lo mai awm mang e aw tih te min ngaihtuah tir a ni.

Tin, member zahawm tak Er. Rinawma kha amah engineer a ni bawk a, a thusawi, khami an dan leh dun, an integrity kha engineer hnenah lecture na hun siam sak ta ila, lecture sela. Khatiang kha tam tak chuan an hre lo emaw ni chu aw tih tur khawpin tunah hian ka tawng an huatthu suhah negligence hi a awm em tih te ka ngaihtuah thin a.

Tin, Work Supervision chungchang ah hian tunhma atangin Pu Sangthuama, member zahawm tak sawi ang deuh khan kei ka lo ngaihtuah tawh thin a. Hei kan police te ang

pawh hi, kan DSP te, kan SP te ang pawh hi clerk emaw in ti ang deuh hian hmuh chang ka nei thin a. Office a thu nileng ringawt te, field staff an ni a, an nau ten hna an thawk tha em, an duty tha em, tin, khawiah emaw pawh law & order hmu thut thei an ni a, khami atan khan an in ready em, field staff an nihna hi, pisa a thawk an nihna nen 50/50% vela hmang turin ka ngaihtuah a.

Tin, heng kan engineer te pawh hi remchangah chuan ka hrilh thin a, Zoram dung leh vangah kan hotute hnungzuiin zin tam ber pawl ka ni a. Kawng siam leh ilo velah hian EE in a lo enpui emaw, SDO in a lo enpui emaw hi ka hmu khat khawp a. A tha berah Mohori ni awm tak te hi an lo awmin ka hria a, hei chu a kalphung tur a ni lovang a tih te ka ngaihtuah a. Tin kan insak te pawh hi ka address na remchangah chuan an thing hman a dik em, design leh a englo dan te a dik em tih in chhawp renrawn a, an thing hman te an nawt mam tha em tih te, a thing hi a dik em tih te, vawikhat pawh chek emaw sat hek lova pension tur te hi an tam riau ang tih ka hlau a ni tih te ka hrilh thin a, chutiang zelin cement mix chungchang te pawh. Chung kan sawi duah na chhan chu a tha hi chu keini pawhin duh nachang kan hria a, tin anmahni pawh hian duh awm takah ka ngai a.

Engpawhnise, vawiina heng kan induhthawhna a lo thlenna chhan leh vang pawimawh tak pakhat hi chu fur a na a, kha nichinah fur rei zia an rawn sawi kha ka hre reng a, March ni 1 atanga sur tan an ti a, ruahsur teh naah kum dang aiin a tam chuang lo tih nimahsela, a sur dan hi a nat leh nat lohte hi a awm a ni. Hei a tlangpuiin ruahpui an sur a, khawpui te a rik dur dur hi chuan a nghet vak lova, khawpui te ri dur dur lo, kawlphe zuai zuai lo emaw a sur cherh cherh hi chuan a nghet a, kan ram leilung hian a ngeih lo deuh a ni.

Tin, a hrim hrimin a hminga ram hruaitu kan nihna a kan hriat tur chu, kan ram leilung hi geologist ten an sawi danin tuiptui atanga a lo chhuahna a la rei lo ang a, chuvangin a ngelngheet lo bik a ni an ti a. A dik hmelin ka hria a, chuvang chuan lungchang te pawh kan nei lova, chuvangin kan kawngte thui tak chu a tlo loh phah a ni an ti a. Khu Tuirial thlawhna tum hmun kan repair khan kan lung hman chu Jatinga luipui lung a ni. Tin thlawhna tum hmun Lengpui kan siam lai khan, sawlai Thenzawl piahah sawn lungchang a awm ve an ti a, mahse an hmangzo thuai a, a tlangpuiin a tam ber chu Jatinga Valley lung ani. Chutiang chuan hna ulukah chuan tih a ngai a, mahse chung ang chu kan kawng siam nan hmang ta ila...(SPEAKER : Ngawi rawh ka pu, dar 4:00 p.m. a ri a, i sawi zawh tir ang u aw. Aw sawi zawm rawh.) ...a expensive lutuk avangin kalkawng atan chuan a zawng a za a hman ve chi a ni hauh lo thung si lawi a ni, chutiang chu a ni a. Tin, furtui tla tam chu kawngkhat lo ni se tunah hian kawng awmsa te zauh a ni nasa a, kawng awmsa zauh anih chuan khawl lian pui puiin a thawh a ngai a, leivung te an lai khawh rualin an black top nghal thei bawk silova, chuvangin kawngte a nalin harsatna tam tak a awm lo thei lova.

Tin, National Highway a puan thar hi a awm teuh a ni, National Highway a puan thar anih avanga hemi puan thar a nihna atanga hnain a zui a kha a awm a. Chungte avang chuan harsatna kan tawk a. Tin, hetia National Highway a puanthar an nih khan a transition period ah

khan hun engemaw chen han in hlanthar nan khan a lo duh a. Chu chuan harsatna, kal kawng that leh that loh ah mawhphurtute tan harsatna a siam a ni. Tin, National Highway te hi Mizoram ta anih tawh loh avangin, kan duh ang angin duh hun hunah a khawih theih tawh lova. Chutiang chuan Mizoram PWD hi chu khami thu nei tuten a an duh dan leh an hrih dan ang a lo thawk mai tur chauh an ni tih kan hriat a tha in ka ring a.

Tunah hian an sawi tawhin ka hria a, mahse kan hriatchian leh zual nan National Highway kan ram chung ami hi 1463 KM a ni a. PWD roads kan tih ang thin, State road hi 4731.119 KM a ni a. Border Roads Organisation kutah hian 896.315 KM a awm a. Tin CPWD kutah 175.600 KM a awm a. Tiang khan department leh a neuh neuh kawng hi 432.90 KM vel a awm bawk a ni.

Tin, heng kawng zawng zawng Sorkar in mawh a phurna chin ang ho hi tha taka kumtluana enkawl a, repair a, a chhe ven a, a chhe thawmna tur atan hian a lo berah cheng vaibelchhe 427 a ni. Nuai 427 ni lovin. A lo berah a mamawh zat a hi cheng vaibelchhe 427 lai ani. Chutiang chu a ni a, chuvangin hautak tak a ni a.

Tin, sum hi kan hriat fo atan tha chu, zem lianpuiah Sorkarin a mamawh atana hman tur duh zat zat lak mai tur hi a awm lova. Chuvangin kan mamawhnaah DPR te kan siam a, Central lamah kan thehluat a, anrawn sanction lawk loh chang a awm a, vawi duailo nawr tul chang a awm a, chutianga mi mercy a awm kan ni a, chuvangin duh angin a chak theih loh a. A tul zualah chuan department hian puk chawp te in an lo ti a, mahse chutiang tur pawh chuan harsatna tam tak a awm a.

Tin National Highway Central in a enkawl te hi Contractor te Bill hi an mamawh hunah an pe zung zung thei chuang lova, chu chuan harsatna vaibelchhe za tel an batsak thin te avang hian harsatna a lo awm ve leh a. Chutiang chu thil awm dan a ni a, chuvangin harsatna tam tak khatiang khan a lo thleng a ni. Chuvangin tunah hian department ten an duhdan ang a maintenance fund hi awm zung zung theih nise, tunah hian sawi luai luai ngai khawp hian a chhe lo mai thei a. Tin kumin a tun ang taka a chhiatna em em tlangpui chu fur a na, a rei a, pahnih naah chuan National Highway a puanthar a tam a, kha khan transition period engemaw chen a delay a. Chulo lehah chuan heng Central in a enkawl te hi kan State thuhnuaiah a awm loh avangin harsatna kan tawk a. Chutiang chuan harsatna hrang hrang a awm a ni. Phai lam Contrator te pawh hian an eng eng emaw mobilize na tur atan hian hun rei tak a duh ve a, chu chu harsatna tlangpui te an ni a. Engpawhnisela hetiang a an chhiat viau hi chuan, a tha dawn a ni tih hriat mai tur a ni a, a that dawnah khan duh angin kan chak theilo a nih chuan a chhan leh vang hrang hrang kan han sawi tawh a ni.

Tin, Sorkar dem nana hnatlang a ngai thin an han tih te ang te hi, kei a tlangpui thu ah sorkar dem nan emaw, Sorkar elsen nan emaw ni kher lo Mizo dan pangngai thahnemngaihna

avang leh self help, mahni in tanpui thin kan nihna ang rilru pu a tih chu ni sela hlim leh lawm takin, lungawi takin kan ti thei tur a ni a. Amaherawhchu, er nei ran leh tute emaw deusawhna a tih a nih avang hian mal pawh a sawm vak lo ang a, tih te ka ngaihtuah a. Engpawhnise, vawiinah hian khaw tam tak, veng tam tak, tlawmngai pawl tam tak an kawngte a chhiat avanga Mizo dan pangngaia hnatlanga thawk tam tak an awm a, an thahnemngaihna avangin hengho hnenah hian lawmthu ka sawi a.

Tin, nimin mai khan motor lampanga hnathawktu sang, pawl hrang hrang intel khawmin “kan ram kawng chhiate hi siam that a tul tawh a, heng siamthatna tur atan hian a tul ang angin sorkar tanpui kan inhuam e” tih te resolution an siam a, khang kha resolution tha tak a ni a. Nichina resolution Isua Krista cross-a an khenbeh ni a resolution siam diklo leh siam dik te ang hial khan kan resolution awmdan hi a inthlau in ka hria a. Chuvangin, hetiang sorkar tihmualpho tuma beih luai luai a nih laiin, a kawng chhia pawh a tuartu ngawih ngawihte zawk an nih hmel lehngal a, chutiang chung sorkar tanpui an inhuamna anrawn puangchhuak kha Mizoram mipui zawng zawng tan entawn tlak an ni tih hi he House atang hian ka puang duh a ni.

Tin, kawng chhia chu tunah khan kan ngaithla tawh a, sorkar-in a tuar ber niin ka hria, nidanga man pangngaia buhfai transportation kan tih zung zung theih te kha tunah chuan a theih ta lova, JCB-te hman a ngai a, chutiang khawp chuan sorkar-in a tuar a ni. Chuvangin, sorkar hi a siamtha turin phut a tul pawhin ka hre lova, dem a tul pawhin ka hre lova, tuar tur a awm a nih pawhin sorkar-in a tuar ber a. Tin, a that duh lamah pawh sorkar tluka a that duh an awm chuan ka ring lova. Chuvangin, vawiinah he House-ah hian resolution, a siamtha tura sorkar phut emaw a kan kal kha tha ka ti lova. Resolution kan pass duh hrim hrim a nih chuan, “kan ram kawngchhia te hi pawl kan ti a, sorkar pawhin nasa taka a tawrh avangin thal a lo nih veleh rang taka sorkar hian working season ah tan lak nghal nise” tih erawh chu pawl pawh ka ti hranpa lova. Chuti ni lova, a fur chhe lai hnuai a tiang zawnga resolution pass hi chu vawi za pawh pass nawn ila kan Department ten hna an thawk thei dawn chuang lova, chuvangin “thal veleh khawtlai lovin kawngte hi a chhiat avangin, sorkar hian hma la vat sela, keini Mizo mipuite pawhin theihtawpin i tawiam ang u” tih te chu nisela a ropui khawpin ka ring Pu Speaker, ka lawm e.

**SPEAKER** : Awle, tunah chuan resolution neitu Pu Vanlalzawma wind up sela.

**Pu VANLALZAWMA** : Pu Speaker, ka lawm e. Ka resolution hi kan chhiar nawn leh ang a, “Mipui ten inkalpawhna kawngpui chhia avanga harsatna kan tawh mek sutkian thuai a nih theihna turin chak leh zualin hmalak ni rawh se” tih chu kan han sawi ho va. A tir lamah khan sawi mang lovin kan in nam liam mai dawn emaw ka ti a, amaherawhchu, a vanneihthlak hle in ka hria khati zat khan dar 4:00 pel thlengin kan han sawi thei kha a lawmawm ka ti a. Tin, member te pawh khalamah khan kan tui tlang a,

sawi tur kan lo nei deuh vek mai a ni maw tih kha ngaihtuahnaah a awm a, lehlamah chuan a resolution neitu nih pawh a inchnir awm lem love, kan pass leh pass loh chu thuhran nise tih kha ka thuhma ah chuan kan sawi duh a.

House Leader hi chu ding hma deuh sela chuan member tam tak te sawi dan hi chu a dang daih ang a, ka ti a. Amaherawhchu, a hnuhnung bera a din kha a ngai bawk si a, tiangkhan kan han sawi chho nawk nawk kha a ni a. Tin, kan resolution kha kan thahnemngaihna lutuk te pawh niin ka hria a, a tum loh zawkah hian kan lut nasa lutuk deuh em aw ka ti deuh a, mipui harsatna sutkian dan tur lai hi engtingge ni ang, tih lai kha ni a ka ngaih laiin, a thenin a chhe lutuk hleinem, tunhma atanga chhia a ni alawm, tih te leh kan Minister zahawm tak Pu John-a phei chuan a chhiat zia kha thiam em em khan a rawn sawi lawi a, khang vel kha a ni tehnuaih a.

Engpawhnise, helaiah hi chuan kan rilru chu a awm tlang a, Mizoram mipuite rilruah pawh a awm a, kan ngaihtuahnaah pawh a awm a. Tin, chutih mek lai chuan reilote kum hnih pawh la tling lo he House zahawm taka ka lo thut ve chhunga ka rilrua thil awm paitawih har deuh hlek ka tih chu, helai House-a kan thil tih phung hi pawnlama kan tih duh mang loh, hotute tih lawm tum niawm taka a lova luak chhuaka kan han infak lai hi chu a Mizo lo mang e, vai ho pawhin hetiang em em hi chuan an ti ang em aw, ka ti deuh a. Nimin lama demand kan sawihonaah te pawh, an demand kha kan support anih chuan a tha mai a. Mahse, a changtute kan han sawi mawi leh kan han fak ta lutuk deuh lai hi a mizo nihphung emaw ni aw, ka ti a, ka lo ip deuh thin a. Lok Sabha-ah te pawh hetiang teh hluak lutuk hi chuan an ti ngai lo, mizo te pawhin kan ti ngai lo, kan fak duh anih chuan an awmluh hnuah kan fak vak a, kan mi ngaihsan zawngte kha chu. Hmaichhana han infak tak te phei hi chu kan tih vak loh thin kha a ni a, mahse helaiah hian practiced ah te hian kan nei emaw ni aw, ka ti a. Sawi tawh ang khan kan la tel ve rei lova, tunhma atangin a ni thin em phei chu ka hre chiah chuang lova, chungte chu ka feel deuh a, kan sawilang tel duh a. Thusawi dan phungah hian a lo ngaihtlatute pawh a thenah chuan an tim deuh mai awm mange aw, tih turte hi ka nei ve. Mizo zia hi a awm ve ania, infak leh in chawimawiah pawh hian. Hmundanga infak duh der si lo te an awmlaia, han fak hluah mai te hi tunhma sorkar kalta ah pawh khan a ni tho a. Kan Minister te chet chhiat leh chet fuh loh chhan te pawh kha a ni a. Hei han sawi ta mai mai ila, hei ka bulah Pu Sangthuama a awm a kan senior hi, Minister anih hlim te khan kan thiante ho nen kan va tlawh a, M.P. ka ni ve a khatih lai khan, kan thian pakhat hian fiamthu titak deuh hian, ti hian i thiltih that lam hlir sawi hian kum nga a rawn hual che ang a, mi a ah chuan i chhuak ve dawn chu a ni mai a a ti a. Chu ang deuh chuan kan inbawl nasa lutuk deuh em aw ka ti a, chu chu a penhleah atan kan sawikai duh deuh a.

A chhan chu Mizo hian zia leh thiltih phung kan nei a. Kan Finance Minister zahawmtak khan a duh vak lo in ka hria a hmanni ah a reaction ah khan, hei



pawh hi ngaihtuah chian a tha mange kan ti a. Kan resolution ah khan lut ta ila, sawidan ah khan tlemin kan resolution tum thelh lek lek te khan kan sawi a. Engpawhnisela, kan han sawina ki leh kan han move-na ki ah erawhchuan mipuiin harsatna hrang hrang kan tawh a. Kawngchhiat chhan erawh kha chu sorkar hmasa hunlai daihte pawh a ni thei. Tin, Contractor thlansual deuh vangte pawh a ni thei, tin, monsoon rei lutuk pawh a ni thei, a engpawhnise, mipuiin harsatna kan tawh a. Heng hi engtinng e kan tih ang ? Hmathar han lak leh theih dan a awm em ?

He House zahawmtak hian resolution te pass ta ila, mipuite tan pawh a thlamuanthlak ang e. Chawp leh chilhin a tha vut vut thei dawn bawh si lova, zankhat thilthu ah kan siamtha mai thei dawn si lova, karkhatah pawh a tha mai dawn si lova. Chung avang chuan tiang hian he House zahawmtak hian ti ta ila, harsatna tawh mek te tan pawh a thlamuanthlak ang a. E, hmalak tum a ni e tiin a in thlamuan theih ang a. rilru ngaihtuah kun lutuk lo in a awm theih ang e tih kha a ni ber a. Engpawhnisela, heng kan sawi hrang hrang hian ka react vek pawh a tul lova, thil hre tak tak te pawh in ni a. Amaherawhchu, heng National Highway te kan tih Mizoram Sorkar kuta a lo luh dan te huai deuh deuh khan kan sawi a, a dik chiah lo deuh te pawh kha a awm in ka hria a. Engpawhnisela, thil a lo in thlak hret hret a, sorkar kalphungte pawh kha BRTF kut atanga a lo luh dan zawng zawngte pawh kha chipchiar taka sawi a tul hranpa lova. Amaherawhchu, tunah hian enkawl harsat dan te pawh a awm a, tin, kan capacity in a tlintawh loh dante pawh a awm a, chung zawng zawng vang chuan heng hi kan tawh a nih mek lai a awm a. Tin, kha kawng zawhna a awm lova, a daihlam a thu ta diai diai ang te khan kan inpuh deuh ringawt mai a.

Mahse, kan hriat mai mai atan chuan kan hotute nen pawh kan sawi khawm mai mai a. A in awm loh daih chuan Assembly rorelte pawh a khaihhlak lutuk, a diklo thei, Opposition ho zawng zawng awm loh te pawh a dik lo alawm an tih ang khan kan hotuten fel takin, inrawn tlangin tiang hian, helaiah kan thu a, engemaw kawng zawh peih loh vang leh ruah va do peih loh vang lam kha a ni lo tih kha kan hotute khan min lo hriatsak ula, kan hotute nen sawiho in helaia kan awm zawk kha an duh avangin kawngzawhna ah khan kan tello a ni tih kha min hriatsak ula. Kawng an zawh ve peih lo ang emaw, kawngchhia a ti lo ani ang tih lam ni lovin. Amaherawhchu, kawngtha kan duh avang leh mipuiten an tawrhna te kan hriatreng avangin heng resolution te pawh hi vawiiin ah kan han pulut a ni a. Sawibelh tur tam tak a awm thei ang a, hunrei tak ka la lovang a. Kan duh hi chu a in thuhmun, amaherawhchu, kan thutna hmun a in ang loh avang leh a lo luh dan lam a zirte pawh hian pass mai chi leh chi loh te pawh hi kan nei a ni awm mange aw tih kha a ni ber a. Chuvang chuan Pu Speaker, vawiiinah hun tha deuh mai, khatianga han khaihawmna hun min pe a, chutihlaiin resolution heti zatin kan sawi a. Ka duhthusamah chuan min pass pui ngei se, he House hian tih chu ka duhthusam a niin, ka

ngenna a ni tih kan sawinawn duh a ni. Ka lawm e. (SPEAKER : Pass i la dil hran lo) min pass pui ngei turin kan dil e.

**SPEAKER** : A nih chuan in, ngaihdan pahnih a awm ta niin a lang a. Lehlan khan kan pass avanga han tih hmanhmawh hleihtheih pawh ani lova. Kan sawiho hi kan duhtawk mai e, duhtawk mai ila, a tha lawm ni? Kan ngaipawimawh a kan sawiho nasa tawh a ti an awm a. Tin, resolution dinglai hi “Mipuiten inkalpawhna kawngpui chhia avanga harsatna kan tawh mek sutkian thuai a nih theihna turin chak lehzualin hmalak ni rawh se” tih a ni a. Kan buk mai a ni ang chu. Amaherawhchu, a hnukung zawk hi vote kan la hmasa thin a ni a.

**Pu K. SANGTHUAMA** : Pu Speaker, khawngaihin, kan House Leader khan siam danglam hleka pass chu a pawl lem em ni, a ti a. Chuvang chuan a rawt ang deuh kha thal chung lama chak deuh zawka hma la tur khan siam danglam ta ila, kan House Leader pawhin ngaihloh lamah ngai lo se, kan thahnemngaih vang a ni mai a. Amendment kha a theih hram lawm ni, tih kha ka han ngen ve leh a ni e.

**SPEAKER** : Amendment kha chu ziaka thehluh ve kha a ngai a, kan Dan angin. Chair atanga han ngaihthlak hi chuan ngaihdan pahnih lian tak a awm a ni. Lehlanin, ‘Kan sawiho hi a tawk e, kan pass kher avanga tihchak vak hleih theih pawh a ni lova, kan ngaipawimawh a kan sawiho a, a tawk e’ tih kha helam ngaihdan niin a lang a. Tin, resolution kha a ngaiin a la ding a, kan buk mai ang chu?

Kan buk mai ang a. Mizoram kawng tha a neih hi kan duh tlang a. Kan sawiho vek a, House in a ngaipawimawh a. Leader of the House tiamin 20 in an sawi a, hei hian kan ngaih pawimawh zia a tilang a. ‘Resolution pass kher lovin kan sawiho hi duhtawk mai ila’ ti zawng kha ban kan phar ang, ti dawn ila ni chiah silo.

Awle, “Mipuite’n inkalpawhna kawngpui chhia avanga harsatna kan tawh mek sutkian thuai a nih theihna turin chak lehzuala hmalak ni rawh se,’ tih hi, resolution puluh a ni a. Resolution ang hian pass ni rawh se ti apiangin, ‘remti’ ti rawh u le.( Members:Remti). Remti lo kan awm em? Awle, kan sawiho hi a tawk e tihnaah ngai ila.

Resolution pahnih dang kan la nei a...( DEPUTY SPEAKER :Pu Speaker, kan sawihona hi a tawk e, tih kha min zawt ve leh dawn lo em ni?). Rem tilo kha an tam zawk si a, kha kha kan ring mai ang chu. Anih leh, ‘kan sawihona hi pass kher ngai lovin kan duhtawk e’ kan ti dawn nge? Engpawhnise, a then a har a, remti lo lam khan ‘kan duhtawk e’ an ti tawh a. Khalam kha a tam zawk an ni a, kan duhtawk a ni tih kha tunah khan an sawi tawh a, khalam kha a tam zawk a ni. Tikhan i pawtchat mai ang. Engpawhnise, kha kha duhtawk ila. Resolution pahnih dang kan la nei a, kan duhtawk tawh rih mai dawn nge kan kal zel dawn?

Awle, tunah chuan vawiina kan tihtur kan zo tawh a. Thawhtan dt.19.10.2015 zing dar 10:30 AM a kalkhawm leh turin i haw rih ang u.

Sitting adjourned : 4:24 P.M.